

TZOTI' C'UL YET COLBANILE TZ'IBNEBILCANO YU NAJ SAN MATEO

*Istxolal isbi yichmam Comam Jesucristo
(Lc 3:23-38)*

¹ Ha' icham Abraham yeb naj rey David, ha' yichmam Comam Jesucristo. Hac ti' ye istxolal yichmam Comam haca' ti':

² Icham Abraham, ha' icham ismam naj Isaac, naj Isaac ha' naj ismam naj Jacob, naj Jacob, ha' naj ismam naj Judá yeb hunték'anxa yux'taj. ³ Naj Judá, ha' naj ismam naj Fares yeb naj Zara, ha' xin ismi' ebnaj cawañ tu' ha' ton ix Tamar. Naj Fares ha' naj ismam naj Esrom, naj Esrom ha' naj ismam naj Aram. ⁴ Naj Aram, ha' naj ismam naj Aminadab, naj Aminadab, ha' naj ismam naj Naasón, naj Naasón, ha' naj ismam naj Salmón. ⁵ Naj Salmón, ha' naj ismam naj Booz, wal ismi' naj Booz, ha' ton ix Rahab. Naj Booz, ha' naj ismam naj Obed, wal ismi' naj Obed tu', ha' ton ix Rut. Naj Obed, ha' naj ismam naj Isaí. ⁶ Naj Isaí, ha' naj ismam naj rey David.* Haxa naj David, ha' naj ismam naj Salomón, ismi' naj Salomón tu' xin, ha' ton ix yixaltic'a naj Urías yet yalañtocoj.

⁷ Wal naj Salomón, ha' naj ismam naj Roboam, naj Roboam, ha' naj ismam naj Abías, naj Abías, ha' naj ismam naj Asa. ⁸ Naj Asa, ha' naj ismam naj Josafat, naj Josafat ha' naj ismam naj Joram,

* **1:6** 1Cr 2:1-15; Rt 4:18-22

naj Joram, ha' naj ismam naj Uzías. ⁹ Naj Uzías, ha' naj ismam naj Jotam, naj Jotam, ha' naj ismam naj Acaz, naj Acaz ha' naj ismam naj Ezequías. ¹⁰ Naj Ezequías, ha' naj ismam naj Manasés, naj Manasés, ha' naj ismam naj Amón, naj Amón ha' naj ismam naj Josías. ¹¹ Naj Josías, ha' naj ismam naj Jeconías yeb hunték'anxa yux'taj. Ha' yiñ istiepohal naj Jeconías tu' ilaxto ebnaj Israel preso yul coñob Babilonia.*

¹² Hayet yelti ebnaj yalañ yip Babilonia tu' xin ha' naj Jeconías, ha' naj ismam naj Salatiel, naj Salatiel, ha' naj ismam naj Zorobabel. ¹³ Naj Zorobabel, ha' naj ismam naj Abiud, naj Abiud, ha' naj ismam naj Eliaquim, naj Eliaquim, ha' naj ismam naj Azor. ¹⁴ Naj Azor, ha' naj ismam naj Sadoc, naj Sadoc ha' naj ismam naj Aquim, haxa naj Aquim, ha' naj ismam naj Eliud. ¹⁵ Naj Eliud, ha' naj ismam naj Eleazar, naj Eleazar, ha' naj ismam naj Matán, haxa naj Matán, ha' naj ismam naj Jacob. ¹⁶ Naj Jacob, ha' naj ismam naj José, naj José tu' ha' naj yichamil ix María. Ix María tu' ha' ix ismi' Comam Jesús, ha' ton Comam Cristo.*

¹⁷ Wal xin ay cañlahoñwañ mame yiñ istxolal yichmam Comam Jesucristo chiichiti yiñ icham Abraham masanta yiñ naj rey David. Tzujanilo yinta naj rey David tu' yichipaxti cañlahoñwañ mame istxolal yichmam Comam masanta yet yilaxto ebnaj Israel preso bey Babilonia. Tzujanxa yet yilaxto ebnaj Israel preso yul coñob Babilonia

* **1:11** 2Re 24:14-15; 2Cr 36:10; Jer 27:20 * **1:16** Hune' bihe Mesías ayco yiñ abxubal hebreo, chalpaxilo Cristo yiñ abxubal griego; haxapaxo yiñ jabxubal xin ha' chalilo Jahawil.

tu' yichipaxti cañlahoñwañxa ebnaj mame yíñ istxolal yichmam Comam Jesucristo masanto yíñ istieñpohal yet ispitzc'a Comam.

*Yet ispitzc'a Comam Jesucristo
(Lc 2:1-7)*

¹⁸ Hac ti' ye istzoti'al yíñ yet ispitzc'a Comam Jesucristo. Wal ix María tak'webilxa yu ix ismohyi yeb naj José, yaja' yet mañto chiyik' isba, ispitzc'ati' nich'an unin yíñ ix yu yip Comam Espíritu Santo. ¹⁹ Wal naj José waxañca caw yijem naj tet isley naj Moisés, yaja' mach isje isc'ul naj isk'ana' yíñ ix María tu', yoc yíñ isnabal naj isbenicano ix yíñ ewantajil. ²⁰ Hayet lañan yec' hune' tu' yíñ isnabal naj, isyeni isba hune' yáñgel Comam Dios† tet naj yul iswayic; yalni naj áñgel tu' haca' ti':

—José, hach titnajach yíñ yuninal naj rey David, mach chinanon hac'ul hamohyi yeb ix María, yuto ha' nich'an unin ijbilico yu ix yet Comam Espíritu Santo. ²¹ Nich'an unin chipitzc'a tu', *Jesús*‡ chawaco isbihoj, yuto ha' naj chicolnilti yet coñob yalañ ismul, ñi naj áñgel.

²² Hac tu' yu yijni isba tzet yalcano Comam Dios tet hune' ischejab§ yet payat, yet istz'ibñencano haca' ti':

²³ Ay hune' ix k'opo mañto hunu winaj chik'le, yaja' chipitzc'ati nich'an winaj unin yíñ ix, nich'an unin chipitzc'a tu' *Emanuel* chiyij

† **1:20** Hune' tzoti' áñgel chal yelapno chejab; espíritu yehi, ha' ton ischejab Comam Dios ay yul satcañ chicolwa jíñ. ‡ **1:21** Hune' bihe Jesús ha' chalilo Colwawom. § **1:22** Profeta, yíñ castilla ha' chaliloj, ischejab Comam Dios yet payat.

isbi, xiayoj. Emanuel, ha' chaliloj *ayco Comam Dios coxol*.*

²⁴ Lahwi tu' yel iswayañ naj José, isyijen naj yiriñ tzet yal yángel Comam Dios, ismohyi naj yeb ix María. ²⁵ Yaja' mach ishunba isba masanto yet ispitzc'a nich'an yunin ix. Ha' nich'an unin pitzc'a tu' xin, Jesús yaco naj isbihoj.

2

Yet isbey huntেক'an ebnaj mago yila' nich'an Jesús

¹ Bey yul coñob Belén ayco yul ismajul tx'otx' Judea, ha' tu' pitzc'a nich'an Jesús. Yet hune' tiempohal tu' ha' naj Herodes ayco isreyalo tx'otx' Judea. Ay xin huntেক'an ebnaj caw ay ishelanil chicuyni yiriñ tzettaj ye tx'umel,* ispeto ebnaj yiriñ yetc'ulal bay chiahilo tz'ayic. Yet yapni ebnaj bey coñob Jerusalén,² isk'amben ebnaj:

—¿Baytu'wal ay hune' naj nich'an xapitzc'ahi, naj chioc isreyalo anma Israel ti'? Jilañ yahilo hune' tx'umel yiriñ yetc'ulal bay chiahilo tz'ayic, ha' xin ak'ni cotxumulojañ tato xapitzc'a naj. Yuxin macoñititañ jik'ayo cobahañ tet naj, xi ebnaj.

³ Yet yaben naj rey Herodes hune' tu', caw somchacañ yul iswi' naj yeb sunil anma ay yul coñob Jerusalén. ⁴ Yuxin yawte naj Herodes tu' ebnaj yahawil yiriñ ebnaj sacerdote† Israel, yeb ebnaj

* **1:23** Is 7:14 * **2:1** Ebnaj chicuyni yiriñ tzettaj ye tx'umel tu', ha' ton ebnaj mago. † **2:4** Cabeb ismunil ebnaj sacerdote ak'lax yu Comam Dios, ha' yanico xahanbal yiriñ ismul anma Israel tet Comam, yeb istzotel yiriñ anma Israel tet Comam. Ebnaj sacerdote tu' yiriñ naj Leví titna ebnaj. Heb 10:11; Jn 1:19; 7:32.

cuywawom yiri isley naj Moisés; isk'amben naj tet ebnaj:

—¿Baytaxca tu' chipitzc'a naj Cristo? xi naj.

⁵ Istak'wi ebnaj tet naj:

—Yul coñob Belén yul ismajul Judea chipitzc'a naj, yuto hac tu' yu istz'ibrielaxcanayo yul Yum Comam Dios yu hune' ischejab yet payat, bay chal haca' ti':

⁶ Coñob Belén, ha' caw nich'anch'an sata hunuxa coñob ay yul ismajul tx'otx' Judea, yaja' caw ec'balto yelapno ye sata huntেক'an coñob tu', yuto ha' bey tu' chipitzc'a hune' naj yahaw. Ha' naj xin chioc tañeno coñob *Israel*,[‡] xiayoj, xi ebnaj.

⁷ Lahwi tu' xin, yawten naj rey Herodes ebnaj mago yiri ewantajil, yoc naj isk'ambeno tet ebnaj yiri tzet tiempohal isye isba hune' tx'umel tu' tet ebnaj. ⁸ Lahwi tu' xin ischejnito naj Herodes tu' ebnaj bey coñob Belén, yalni naj tet ebnaj:

—Asiwe bey Belén tu', caw xin chek'ambe yiri tzet caw ye nich'an unin tu'. Lahwi yilcha naj heyu cat heyul heyalno wetan cat intopaxojan winayo inbahan tet naj, xi naj.

⁹ Lahwi yalni naj Herodes hune' tu' isto ebnaj. Wal hune' tx'umel yil ebnaj yiri yetc'ulal bay chiahilo tz'ayic babel sata ebnaj, yoc liño bay ay nich'an Jesús tu'. ¹⁰ Hayet yilni ebnaj hune' tx'umel tu' caw tzalacañ ebnaj. ¹¹ Hayet yapni ebnaj xin yocto ebnaj yul ña. Yilni ebnaj nich'an

[‡] **2:6** Hune' bihe Israel yaco Comam Dios isbiho naj Jacob yet tzujanilxa, Gn 32:28. Ha' hune' bihe tu' occano yiri anma pohcañ yiri yuninal naj Jacob. Ha'tic'a anma Israel tu' chihallaxpaxo Judío.

nene' tu' yeb ismi', yay jahno ebnaj sata nich'an nene' tu', yalni ebnaj c'ulla tzoti' yiñ. Lahwi tu' ishajni ebnaj isc'uwanbal, yak'ni ebnaj ch'en oro, yeb te' pom, yeb hunték'an añ caw xuk' sam chiyij mirra sabehal tet nich'an Jesús tu'. ¹² Yaja' xin hallax tet ebnaj yul iswayic tato matxa ch'ec' ebnaj yala' tet naj rey Herodes yiñ nich'an Jesús tu', yuxin nan behalxa bay to ebnaj yet ispaxto ebnaj bey iscoriob.

Yet yilaxto nich'an Jesús bey coriob Egipto

¹³ Haxa yet xapaxto ebnaj mago hulic'o ilno nich'an Jesús, isyeni isba hune' yáñgel Comam Dios tet naj José yul iswayic, yalni naj áñgel tu':

—Ahañwano yiñ añe, ito nich'an unin ti' yeb ismi' cat ható bey Egipto. Wal haweh bey tu' masanto haninan chiwalan tawet bak'in chachmeltzohi, yuto chati naj Herodes issayomal nich'an unin ti' cat ispotx'ni naj yalni, xi naj áñgel tet naj José.

¹⁴ Lahwi tu' yahwano naj José, yinito naj nich'an Jesús tu', isto naj yiñ isbel yeb ix María bey Egipto yiñ ak'balil. ¹⁵ Ha' bey tu' xin ehayo naj yeb ix masanto cam naj rey Herodes. Hac tu' yu yijnicano isba tzet halbilcano yu Comam Dios tet hune' ischejab yet payat yet istz'ibñencano naj haca' ti': “Bey Egipto chiwawteti Inc'aholan,”* xiayoj.

Ischej naj Herodes potx'laxo niñte winaj unin

¹⁶ Hayet yilni naj rey Herodes tato matxa ec' ebnaj mago yala' tet naj yiñ naj nich'an Jesús, caw tit ishawal naj yuto etli ebnaj yiñ naj yabe. Ischejni naj potx'laxo sunil niñte winaj unin, nene'

* 2:15 Os 11:1

masanta niñte yíñ cab habil ay yul coñob Belén yeb hunték'anxa coñob ayco yíñ ishoyanil, yuto hac tu' chielico istieñpohal yíñ tzet yal ebnaj mago tet naj. ¹⁷ Hac tu' yu yijnicano isba tzet tz'ibrñebilcano yu naj Jeremías, hune' ischejab Comam Dios yet payat bay chala:

¹⁸ Abelax hune' aw yul coñob Ramá, caw ay ok'il yeb nimeta bisc'ulal. Ha' ton ix Raquel chiok' yíñej yunin, machi xin chisje ix chiak'lax isnimanbal isc'ul ix, yuto camnaxa ej yunin ix tu',* xiayoj.

¹⁹ Haxa yet xacam naj rey Herodes, isyeni isba hune' yáñgel Comam Dios tet naj José yul iswayic bey Egipto, yalni naj ángel tu':

²⁰ —Ahañwanoj cat hameltzo yeb nich'an unin ti' yeb ismi' bey hacoñob Israel, yuto xacam ebnaj ochen potx'no camo nich'an unin ti', xi naj ángel.

²¹ Haxa yet yaben naj José hune' tu' yahwano naj, yinito naj naj nich'an Jesús tu' yeb ismi', ispaxti naj sat tx'otx' Israel hunelxa. ²² Yaja' yabelo naj tato naj Arquelao, isc'ahol naj rey Herodes tu' oc reyalo selelo bey Judea, yuxin xiw naj yapni bey tu'. Yaja' xin hallax tet naj yul iswayic yu Comam Dios tato chito naj yul ismajul Galilea. ²³ Yet yapni naj bey tu' yehayo naj yeb ix María yeb naj nich'an Jesús yul coñob Nazaret. Hac tu' yu yijni isba tzet tz'ibrñebilcano yu ebnaj ischejab Comam Dios yet payat bay chala tato *nazareno* chihallax yíñ Comam Jesús.

* **2:18** Jer 31:15

3

*Yet yalni naj Juan anicañ ha' iswi' anma Istzoti'
Comam Dios
(Mr 1:1-8; Lc 3:1-9, 15-17; Jn 1:19-28)*

¹ Yet hune' tiempohal tu' xin apni naj Juan anicañ ha' iswi' anma bey tx'otx' desierto, yul ismajul Judea. ² Yalni naj tet anma apni bey tu':

—Bejwecano hewatx'en istx'ojal, yuto yocxa Comam Dios ay yul satcañ yahawo teyiñ, xi naj.

³ Ha' ton yiñ naj Juan ti' bay yal naj Isaías, hune' ischejab Comam Dios yet payat, yet istz'ibriencano naj haca' ti':

Ay hune' naj chiawi yiñ caw ip bey hune' tx'otx' desierto, chalni naj: “Watx'eweco heyanna yuto chihul Comam Dios Jahawil. Haca' chu istoholbañelax hunu beh yet chihul hunu naj jahaw, hac tu' cheyute hayanna,” xi naj, * xi yul Yum Comam Dios.

⁴ Wal naj Juan tu', xil no' camello watx'ebilayo xilo isk'ap naj, tz'um no' xin ayco istx'ambalo naj. Ha' tzet chislo naj ha' ton no' niñte nok' haca' no' lit' yeb no' cab ay xolaj telaj. ⁵ Hantañe xin anma yul coñob Jerusalén yeb yul ismajul Judea, yebpaxo anma ayayo istila ha' niman Jordán apni abeno tzet yal naj. ⁶ Yet chalnati anma ismul xin, cat yahcano ha' iswi' yu naj Juan yul ha' niman Jordán.

* **3:3** Is 40:3

⁷ Hayet yilni naj Juan tato tx'i'al ebnaj fariseo* yeb ebnaj saduceo apni isc'atañ yu yah ha' iswi', yalni naj tet ebnaj:

—Hex ti' caw haca'tañe heyic'al heba yeb no' laba, caw helanex hecolni heba. ¿Mac halni teyet ta yuñe ch'ah ha' hewi' yuxin chexcolcha tet hune' isya'tajil chati Comam Dios? ⁸ Tato caw yeli xaheyacano sunilal istx'ojal, yilal heyenilo yu isc'ulal chewatx'e. ⁹ Tajca chetxum haca' ti': “Hañoñti'añ jichmamañ ye icham Abraham, yuxin xacoñcolchahañ yalañ isya'tajil chati' Comam Dios, tajca quexchi. Wal xin chiwalan teyet, tato choche Comam Dios chu yanico Comam huntেক'an ch'en ch'en ti' yuninalo icham Abraham heseleloj. ¹⁰ Cawilxa yeti hune' isya'tajil chati Comam Dios, lahan haca' yet yocxa ch'en eche yich xe' hunu te te' yu istz'oc'laxayo te'. Yuxin sunil te te' mach c'ulo issatni chitzoc'laxayo te' cat isk'ojlaxto te' yul k'a'. ¹¹ Yiñ caw yeli haninti'an hañe ha ha' chiwak'an yahbalo ha' hewi' yuñe isyenicanilo isba tato caw yeli xahebejcano istx'ojal. Yaj ay hune' naj tzujan yul wintajan, naj tu' chiyacañ naj ha' hewi', yaj yu isk'ak'al yip Comam Espíritu Santo. Ha' naj tu' caw ec'balcano yelapno ye naj insatajan, walinan xin caw matzet welapnojan chiwabejan, nitam int'uñnihan isxañab naj. ¹² Naj chul tu' lahan naj

* **3:7** Ebnaj fariseo ha' ton huntেক'an ebnaj Israel chiyijen hun majan ley ak'bilcano tet naj Moisés yu Comam Dios. Chiscuy ebnaj anma Israel yiñ huntেক'an chejbanile tu', yaja' ay huntেক'anxa chejbanile ak'bilcano yu ebnaj, ha' xin ayco yiñ isnabal ebnaj isyijeni, caw tze' ebnaj yiñ. Tit ishowal ebnaj yiñ Comam Jesucristo yu yal Comam ta mach c'ul isbeybal ebnaj.

haca' hunu naj chixunilo isk'al ixim trigo, nan chak' naj ixim sat, nan chak'paxo naj ixim yoj, wal ixim sat tu' chisc'ubato naj ixim yul isc'urña, haxa ixim yoj tu' xin chisk'ojto naj ixim xol k'a k'a' mach istañbal,” xi naj Juan tu'.

*Yet yah ha' iswi' Comam Jesús
(Mr 1:9-11; Lc 3:21-22)*

¹³ Yet hune' tiempohal tu' el Comam Jesús bey Galilea, isto Comam isti' ha' niman Jordán isc'atañ naj Juan, yu yah ha' iswi' Comam yu naj. ¹⁴ Wal naj Juan tu' mach chisje naj yak'a'cañ ha' iswi' Comam. Yalni naj tet Comam:

—Machoj, wal xin ha' hawet hach yilal hawan-icañ ha' inwi'an, mañtajach chachhul inc'atañan yu wanicañan ha' hawi', xi naj.

¹⁵ Yaja' tak'wi Comam tet naj:

—Mach chu hamañc'on hune' ti', wal xin yilal coyijen tzet chal Comam Dios, xi Comam.

Hac tu' xin yu isyijen naj Juan yanicañ ha' iswi' Comam Jesús. ¹⁶ Yet lahwi yah ha' iswi' Comam tu', yahti Comam xol ha', yirñena tu' ishajni isba satcañ. Yilni Comam yayilo Comam Espíritu Santo yibañ haca' hunu no' cuwis. ¹⁷ Yabelax hune' yul nuk'e satcañ, halni haca' ti':

—Ha' naj ti' Inc'aholan, caw xahan ay wuhan, caw chintzalahan yirñ naj, xiaytij.

4

*Yet yilwelax Comam Jesús yu naj matzwalil
(Mr 1:12-13; Lc 4:1-13)*

¹ Lahwi tu' yilaxto Comam Jesús yu Comam Espíritu Santo bey tx'otx' desierto yu yilwelax Comam yu naj matzwalil.

² Caw xin yulbal cawina tz'ayic yeb cawina ak'bal mach wa' Comam, lahwi tu' isñohchacañ.

³ Yapni naj matzwalil yilweno Comam, yalni naj tet Comam:

—Ta yeli Isc'ahol Dios hawehi, hal tet huntেক'an ch'en ch'en ti' meltzobjabico ch'en wahil, xi naj.

⁴ Istak'wi Comam tet naj:

—Wal xin tz'ibñebilcano yul Yum Comam Dios tato mañretaj yu tzet chico lo yuxin ay cok'inal, to yupaxo Istzoti' Comam,* xiayoj, xi Comam tet naj.

⁵ Lahwi tu' yinito naj matzwalil Comam yul coñob Jerusalén, iscoñob Comam Dios, yinato naj Comam yin iswi' yatut Comam bey tu', ⁶ yalni naj tet Comam:

—Tato caw yeli Isc'ahol Dios hawehi k'ojayto haba bey ti', yuto tz'ibñebilcano yul Yum Comam Dios haca' ti':

Chak'ati Comam Dios yá ngel chachistañe' yuñe mach chañischayo ebnaj sat tx'otx', haxinwal mach chilahwi hawoj yin ch'en ch'en,* xiayoj, xi naj.

⁷ Istak'wi Comam Jesús tet naj:

—Tz'ibñebilpaxcanayo yul Yum Comam Dios haca' ti': “Mach chinheyacojan yin ilwebal yuto Heyahawil yeb heDiosal wehan,”* xiayoj, xi Comam.

⁸ Lahwi tu' yinito naj Comam yin iswi' hune' witz caw nahat yecanocañ, isyeni naj sunilej

* 4:4 Dt 8:3 * 4:6 Sal 91:11-12 * 4:7 Dt 6:16

coñob ay yul sat yibañik'inal ti' yeb isk'alomal coñob tu' tet Comam. ⁹ Yalni naj tet Comam:

—Sunil huntেক'an chawil ti' chiwak'an tawet, yaj tato chařay jahno insatajan cat hawinayo haba wetan, ři naj tet Comam.

¹⁰ Istak'wi Comam:

—Ach matzwalil hitzañilo inc'atařan yuto chal yul Yum Comam Dios haca' ti': “Iweyo heba tet Comam Dios yuto Heyahawil yeb heDiosal ye Comam, haře tet Comam xin cheyije tzet chala,”* řiayoj, ři Comam.

¹¹ Yet yalni Comam Jesús haca' tu' isbejnicano naj Comam, yapni huntেক'an ebnaj ángel colwal yirñ Comam.

Yicheco Comam Jesús ismunil yirñ yalni Istzoti Comam Dios bey Galilea

(Mr 1:14-15; Lc 4:14-15)

¹² Hayet yaben Comam Jesús tato alaxicto naj Juan anicañ ha' iswi' anma yul preso, isto Comam yul ismajul Galilea. ¹³ Yaja' xin mach cancano Comam yul coñob Nazaret, wal xin to Comam yul coñob Capernaum, ha' tu' xin ehayo Comam. Hune' coñob tu' ayayo isti' ha' mar Galilea, tx'otx' chiyij Zabulón yeb Neftalí. ¹⁴ Hac tu' yu yijni isba tzet tz'ibñebilcano yu naj Isaías, ischejab Comam Dios yet payat, bay chala:

¹⁵ Tx'otx' Zabulón yeb tx'otx' Neftalí, tx'otx' ayic'to satac'to ha' Jordán, tx'otx' ayayo isti' ha' mar, yul ismajul tx'otx' Galilea bay ay tx'i'al anma mach Israeloj.

* **4:10** Dt 6:13

16 Hunték'an anma tu' aytic'aco xol k'ejhólo yaja' wal tinañ xin xaapni issajilk'inal tet. Hunték'an anma tu' iscambalxatic'a, yaja' wal tinañ xaapni issajilk'inal yak'lobal yanma,* xiayoj.

17 Ha' bey tu' xin ichico Comam Jesús yalnic'o Istzoti' Comam Dios, chalni Comam:

—Bejwecano hewatx'en istx'ojal yuto yocxa Comam Dios ay yul satcañ Yahawo teyirñ, xi Comam.

Yet yawten Comam Jesús carñwañ ebnaj ik'omati cay

(Mr 1:16-20; Lc 5:1-11)

18 Hayet lañan isbelwi Comam Jesús isti' ha' lago Galilea, yapni Comam isc'atañ cawañ ebnaj ik'omati cay, lañan yanayto ebnaj ishac' chiinahti no' cay xol ha'. Ebnaj cawañ ti' yuxta isba ebnaj, ha' ton naj Simón, naj chihallaxpaxo Pedro, yeb xin naj Andrés. 19 Yalni Comam tet ebnaj:

—Ocañwe tzujno wintajan, wal tinañ haxa anma chexoc heyik'ahtij cat yoc yul ink'aban, xi Comam.

20 Yet yaben ebnaj yalni Comam haca' tu', isbejnicano ebnaj ishac', yoc tzujno ebnaj yinta Comam.

21 Haniq'uiuxto chito Comam Jesús xin yilnipaxo Comam cawañxa ebnaj yuxta isba, ha' ton naj Jacobo yeb naj Juan, ebnaj isc'ahol icham Zebedeo. Ayahto ebnaj yul isbarco yeb ismam tu', lañan xin isbujni ebnaj ishac'. Yalnipaxo Comam tet ebnaj tato chioc tzujno ebnaj yinta Comam. 22 Yet yaben ebnaj hune' tu' yanicano ebnaj isbarco yeb ismam, yoc tzujno ebnaj yinta Comam.

* 4:16 Is 9:1-2

*Caw tx'i'al anma iscuyc Comam Jesús
(Lc 6:17-19)*

²³ Caw sunil yul ismajul Galilea ec' Comam Jesús, iscuyni Comam anma yul hunun iscapilla ebnaj Israel, yalni Comam tzoti' c'ul yiñ tzet chu yoc anma yul isk'ab Comam Dios. Yak'ni cawxo Comam anma yiñ sunilal yabil ayco yiñ, yeb anma chiec'ya' yanma. ²⁴ Caw xin pujnacañ isk'umal Comam yul ismajul Siria, chiniti anma macta ayco yabil yiñ. Ay mac ch'ec'ya' yanma yu yabil, ay mac ayco ischejab naj matzwalil yiñ, aypaxo mac chilow yaxcamic yiñ, yeb aypaxo mac camnajilo isnimanil. Sunil huntেক'an anma tu' yak' cawxo Comam.

²⁵ Caw hantañe anma oc tzujno yinta Comam; ay anma ah Galilea, ay anma ah Decápolis, ay anma ah Jerusalén yeb anma ah Judea, yebpaxo anma ay isk'axepic'to ha' niman Jordán.

5

*Cuywa Comam Jesús yiñ istzalanil hune' woñan
yiñ mac sak'al yet
(Lc 6:20-23)*

¹ Hayet yilni Comam Jesús tato caw hantañe anma apni isc'atañ, yahto Comam yiñ istzalanil hune' woñan, yay tz'oñno Comam, ishitzico ebnaj iscuycwom Comam isc'atañ. ² Yoc Comam iscuycno ebnaj iscuycwom tu', yichico Comam yalni haca' ti':

³ —Sak'al yet mac chitxumchalo yu ta mach chu iscolni isba ischuquil, yuxin yiññe Comam chicawxi isc'ul. Hune' mac tu' yet ay yoc yul isk'ab Comam Dios.

⁴ Sak'al yet mac chiyik' bisc'ulal yu istx'ojal chiswax'e, yuto chiak'lax yak'lobal isc'ul yu Comam Dios.

⁵ Sak'al yet mac chewchotañe chute isba yuto chischah hune' tx'otx' haltebilcano yu Comam Dios.*

⁶ Sak'al yet mac choche isc'ul iswax'e' tzet chal Comam Dios yuto hij isba tzet choche.

⁷ Sak'al yet mac chitz'ay isc'ul yin yet anmahil, yuto hac tu' chu istz'aypaxo isc'ul Comam Dios yin.

⁸ Sak'al yet mac sajxa ye yanma yul sat Comam Dios, yuto ha' anma tu' chiapni isc'atañ Comam.

⁹ Sak'al yet mac chisayni ak'anc'ulal yuto chal Comam Dios yuninaloj.

¹⁰ Sak'al yet mac caj chiillaxi yu chiswax'e isto-holal haca' choche Comam, yuto ayxaco yul isk'ab Comam Dios ay yul satcañ.

¹¹ Sak'al heyet yet chexbahlaxi yeb yet chexetaxi, cat ishoblxcañ lek'ti'al teyin yuto tzujanex wintajan. ¹² Caw ak'we tzalaho heyanna ta hac tu' chexutelaxi yuto ch'ak'lax ispaj selet teyet bey satcañ. Yuto haca' heyilni isya'tajil ti', hac tu' yu yec'ya' yanma ebna ischejab Comam Dios ec'lana yet payat, xi Comam.

Haca' atz'am atz'am yeb sajilk'inal je yul sat yibañk'inal

(Mr 9:50; Lc 14:34-35)

¹³ Yalnipaxo Comam Jesús:

—Hex ti', haca' atz'am atz'am, hac tu' heye yul sat yibañk'inal ti'. K'inalo ta chiel isc'achi'al

* 5:5 Sal 37:11; Dt 11:8-9; Sal 25:12-13

atz'am matxa chu yoc isc'achi'al atz'am hunelxa, hac' tu' xin matxa tzet ch'ocnico atz'am, to chitirlaxtoj cat isxañlaxic'o yu anma, xi Comam.

¹⁴ Yalnipaxo Comam Jesús:

—Hex ti' haca'paxo sajilk'inal heye yul sat yibañk'inal ti'. K'inalo ta ay hunu coñob yirñ iswi' hunu witz, caw haban jilnilto nahat. ¹⁵ Yet chicotzujbanico k'a' yirñ hunu cantil, mach chicoñohbaco hunu almuh yibañ, wal xin chicot'uñbacañ yuñe ismujli yirñ anma ayicto yul ña tu'. ¹⁶ Hacojab tu' xin istzejla hune' sajilk'inal ayxaco teyirñ yirñ sat anma, haxinwal chil anma isc'ulal chewatx'e. Hac tu' xin c'ul istzotel anma yirñ Comam ay yul satcañ, xi Comam.

Cuywa Comam Jesús yirñ isley naj Moisés

¹⁷ Yalnipaxo Comam Jesús haca' ti':

—Tajca chetxumu ta yu intañtzenilojan isley naj Moisés yeb cuybanile aycano yu ebnaj ischejab Comam Dios yuxin quinhulan, machoj, walxinto yuñe wak'nihan ohtañelaxilo yirñ tzet chaliloj yuxin quinhulan. ¹⁸ Yirñ caw yeli chiwalan teyet ta caw yilal yijni isba sunil tzet tz'ibñebilcano yul Yum Comam Dios. Yulbal yul sat yibañk'inal ti' yeb satcañ, machi hun tx'inano ayayo yirñ ley mach ch'ec'to yet yijni isba. ¹⁹ Yuxin ha' mac mach chiyijen hunu chejbanile ayco yirñ ley, waxañca machi bin tzet chaliloj, machi xin chiscuypaxo yet anmahil isyijeni, ha' hune' mac tu' machi yelapno chuco xol mac chioc yul isk'ab Comam Dios. Wal mac chiyijen xin cat iscuynipaxo yet anmahil isyijeni, ha' hune' mac tu' caw ay yelapno chuco xol anma ch'oc yul isk'ab Comam Dios. ²⁰ Yuxin

chiwalan teyet tato mach ec'balto c'ul cheyute heyijen yiri tzet halbilcano yu Comam Dios tu' sata ebnaj chicuywa yiri ley yeb ebnaj fariseo, mach chexoc yul isk'ab Comam Dios, xi Comam Jesús.

Cuywa Comam Jesús yibañilo mac chichiwa isc'ul

(Lc 12:57-59)

²¹ Yalnipaxo Comam Jesús:

—Hex ti' heyohtaj tato hallax tet ebnaj jichmam haca' ti': “Mach chepotx'camo heyet anmahil, yuto ha' mac chipotx'ni hunu yet anmahil yilal yilaxto sata naj juez cat yoc yiri isya'tajil yu naj,” xi.

²² Yaja' haninan chiwalan teyet, ha' mac chichiwa isc'ul yiri yet anmahil chiay isya'tajil yibañ yu Comam Dios. Ha' mac chibuchwa yiri yet anmahil xin, ha' ebnaj iswi'ehal yiri lahti' yul coñob* chiilni tzet chielicoj. Haxa mac chibahni yet anmahil cat yak'ni taco isc'ul, ha' hune' mac tu' ay ismay isto xol k'a k'a' mach istañibal.

²³ K'inalo tato yet lañan heyinito heyofrenda tet Comam Dios sat altar† cat henanitij tato ay hemul tet hunu maca, ²⁴ awecano heyofrenda tu' yich ismeñahil bay chiak'lax xahanbal tu', cat heto heyanoco heba yiri ak'anc'ulal yeb hune' mac tu',

* **5:22** Concilio, Junta Suprema maca Sanhedrín, hac tu' chihallax yiri ebnaj iswi'ehal yiri lahti' xol ebnaj Israel. Ox majan ebnaj Israel tu' ayco yiri hune' lahti' tu'; ebnaj yahawil yiri ebnaj sacerdote, ebnaj ichamta winaj ak'bil ismunil xol ebnaj Israel, yeb ebnaj cuywawom yiri isley naj Moisés, ha' ton ebnaj fariseo. Ebnaj iswi'ehal yiri lahti' tu', 72 isbisil ebnaj yiri sunil † **5:23** Altar, ha' chalilo meña yet xahanbal. Yibañ hune' meña tu' chialaxato xahanbal chiak'lax tet Comam Dios.

tzujan tu' xin xaisje heyak'ni heyofrenda tu' tet Comam Dios.

²⁵ Tato ay hunu mac chik'anni teyirñ yu hunu istx'ojal chawatx'e, watx'eweyo hune' tu' yirñ ak'anc'ulal yeb hune' mac tu' yet yalañto mañto chexto sata naj alcal. Yuto ta chexapni sata naj, chexyaco naj yul isk'ab ebnaj mayor, haxa ebnaj mayor tu' xin chexanicto yul preso. ²⁶ Yirñ caw yeli chiwalan teyet, mach chexelti yul preso tu' ta mach tz'ajano cheyak' hemulta, ñi Comam.

Cuywa Comam Jesús tato mach chu jochenico hunuxa ix ix

²⁷ Yalnipaxo Comam Jesús:

—Hex ti' heyohtaj tato hallax haca' ti': “Mach chexixli,” ñi. ²⁸ Yaja' haninti'an chiwalan teyet, mac xañetic'a chiilni hunu ix ix cat isnanico istx'ojal yirñ ix cat yochenico ix, ha' hune' mac tu' xayanaco ismul yul sat Comam Dios.

²⁹ K'inalo tato isbak' hesat yirñ hewatx'k'ab chexak'ni ayc'ayoj yirñ hunu istx'ojal, c'ulmi tato cheyilti hune' isbak' hesat tu' cat hek'ojnito nahat. Wal xin ec'bal c'ul tato ayto hunu tzet mach tz'ajano yirñ henimanil sata ta tz'ajan sunil henimanil cat heyalaxto xol k'a k'a' mach istañbal. ³⁰ K'inalo tato hewatx'k'ab chexak'ni ayc'ayo yirñ hunu istx'ojal, c'ulmi ta chetzoq'uulto hune' hek'ab tu', cat hek'ojnito nahat. Wal xin ec'bal c'ul tato matxa hune' hek'ab satato tz'ajan henimanil cat heyalaxto xol k'a k'a' mach istañbal, ñi Comam.

*Cuywa Comam Jesús yirñ pohlebahil
(Mt 19:9; Mr 10:11-12; Lc 16:18)*

³¹ Yalnipaxo Comam:

—Hallaxpaxo yet payat haca' ti': "Ta ay hunu naj chispoh isba yeb yixal, yilal iswatx'icano yu-mal cat yak'nicano naj hune' hum tu' tet ix," x̄iayoj. ³² Yaja' wal inti'an chiwalan, tato ay hunu naj chispoh isba yeb yixal, yaja' ta mach yuho issayni ix ismul yeb hunuxa winaj, hune' naj tu' lañan istubtento naj ix issaya' ismul yik'ni hunuxa yichamil. Ha' xin naj chiik'ni ix chispoh isba yeb yichamil tu', ha' hun naj चाहपखि ismul, x̄i Comam.

Mach chu jak'ni binaho isbi Comam Dios yin̄ tzet chijala

³³ Yalnipaxo Comam Jesús:

—Hex ti', heyohtapaxoj tato hallax tet ebnaj jichmam haca' ti': "Ta cheyawte isbi Comam Dios yin̄ hunu tzet chetak'we teyin̄, yilal heyijen hune' tu'," x̄iayoj. ³⁴ Yaja' wal inti'an chiwalan teyet, mach cheyak' binaho isbi Comam Dios yin̄ tzet chetak'weco teyibañ. Mach cheyak' binaho satcañ* yet chetak'wenico hunu tzet ye tu' teyibañ, yuto ha' bey tu' tz'oñan Comam Dios Jahawil. ³⁵ Mach cheyak'paxo binaho tx'o tx'otx' yet chetak'wenico hunu tzet ye tu' teyibañ, yuto tx'o tx'otx' isbatxobal yoj Comam ye tx'otx'. Mach cheyak' binaho isbi coñob Jerusalén yet chetak'wenico hunu tzet ye tu' teyibañ, yuto iscoñob Comam Dios Jahawil caw ay yelapno yehi.*

³⁶ Mach cheyak' binaho hewi' yin̄ tzet chetak'weco teyibañ, yuto mach chu hesajñen maca hek'ejñen hunu xil hewi'. ³⁷ Wal xin

* **5:34** Is 66:1; Mt 23:22; Stg 5:12; Sal 48:2 * **5:35** Sal 48:2

tato cheyal *ho'*, yelojab cheyala, taca *machoj* ta quexchi, machojabi; yuto ta cheyak' binaho isbi huntেক'an tu' yak'ni isba yiri tzet cheyala, wal xin yiri naj matzwalil chitit huntেক'an tu', xi Comam.

Mach chu jak'ni istx'ojal ispaj selelo tet mac chiwatx'en istx'ojal jiri

(Lc 6:29-30)

³⁸ Yalnipaxo Comam Jesús haca' ti':

—Hex ti' heyohtaj tato hallaxpaxo haca' ti': “Tato ay hunu mac chimak'ni poho isbak'sat hunu maca, mak'laxojabpaxo poho isbak'sat hune' mac tu'. Tato ay hunu mac chimak'nilti yeh hunu maca, mak'laxojabpaxilti yeh hune' mac tu',” xiayoj. ³⁹ Yaja' wal inti'an chiwalan, mach chu hepajtzen istx'ojal chiswatx'e hunu mac teyiri. Wal xin tato ay mac chipak'nilto hecotx', melt-zowepaxto k'axepxa tet. ⁴⁰ Ta ay hunu mac chik'anni teyiri tet naj alcal, cat yinito hecami xi yalni, matzet cheyala ta chipaxto hechumpa. ⁴¹ Yeb xin ta ay hunu mac chalni teyet tato cheyijto yijatz yictajo legua, colwahañwe yiri, iweto yijatz tu' hunu legua. ⁴² Ta ay mac chik'anni hunu tzet ye tu' teyet, ak'we tet. Tato ay hunu mac chik'anni hunu tzet ye tu' c'amil teyet, colwahañwe yiri hune' mac tu', xi Comam.

Xahan chijil mac ayco ishowal jiri

(Lc 6:27-28, 32-36)

⁴³ Yalnipaxo Comam Jesús:

—Hex ti' heyohtaj tato hallax haca' ti': “Xahan cheyil mac xahan chexilni. Mac ayco ishowal teyiri xin, ocojabpaxo hehowal yiri,” xiayoj. ⁴⁴ Yaja' wal inti'an chiwalan teyet, xahan cheyil

mac ayco ishowal teyirñ. K'anwe isc'ulal Comam Dios yibañ macta chexetani. ⁴⁵ Ta cheyije haca' tu', hac tu' chu heyeniloj tato quexyuninal Comam Dios ay yul satcañ, yuto ha' Comam Dios chiak'ni aholo tz'ayic yibañ anma c'ul yeb yibañ anma tx'oj. Lahan chapaxayo Comam ha' ñab yibañ mac c'ul yeb yibañ mac tx'oj. ⁴⁶ Wal xin tato hañc'añe anma xahan chexilni, ha'ñe xin xahan cheyipaxoj, ¿mataxca chechah ispaj hune' tu' tet Comam Dios? Machoj, yuto hac tu' chute isbeybalñe ebnaj mulum, haca' ebnaj ik'omilo tohlabal chito bey Roma. ⁴⁷ Yeb xin tato hañc'añe tet heyuxtaj chextioñli, ¿c'ulmi hune' tu'? Machoj. Wal xin ha' anma mach ohtañeho Comam Dios hac tu' chisbeybalñe. ⁴⁸ Tz'ajanojab chu hebeybalñe sunil isc'ulal, yuto Comam Dios ay yul satcañ tz'ajan lahan yehi, xi Comam.

6

Cuywa Comam Jesús yirñ tzet chu cocolwa yirñ jet anmahil

¹ Yalni Comam Jesús:

—Caw nanñe heyu yirñ tzet chewatx'e, machñehojab yirñ sat anma c'ul cheyute heba, yuto ta yuñe heyillaxi yuxin chewatx'e isc'ulal, mach chechah ispaj seles tet Comam Dios ay yul satcañ.

² Yuxin yet chexcolwa yirñ hunu meba', mach chepujbac'o haca' chute ebnaj chal isba c'ulal. Ebnaj tu' ch'ak' ebnaj issabehal yulaj capilla yeb yulaj calle, yuñe yallax ebnaj c'ulal. Yirñ caw yeli chiwalan teyet, yet chihallax c'ulla tzoti' yirñ ebnaj tu' lañan ischahnina ebnaj ispaj seles. ³ Wal hex

ti' xin, hayet chexcolwa yiri anma meba' machi mac tet cheyala, nitam tet hunu heyamigo. ⁴ Wal xin yiri ewantajil cheyak' tet, haxinwal Comam ay yul satcañ chiilni tzet chawatx'e yiri ewantajil, cat yak'ni Comam ispaj selet teyet, xi Comam.

*Cuywa Comam Jesús yiri tzet chu cotxahli
(Lc 11:2-4)*

⁵ Yalnipaxo Comam Jesús:

—Hayet chextxahli tet Comam Dios, mach cheyute haca' chute ebnaj chal isba c'ulal. Ha' ebnaj tu' yuñe yillax ebnaj yu anma, yuxin toñetic'a choche isliñba isba istxahli yulaj iscapilla ebnaj Israel, yebpaxo yiriñla istxiquin txoñbal. Yiri caw yeli chiwalan teyet, yet chitxahli ebnaj haca' tu' chischahnina ebnaj ispaj selet tet anma. ⁶ Walex hex ti', mach cheyute haca' tu'. Wal xin hayet chextxahli, chexocto yul heyatut cat hepeban ispultahil te', cat hetxahli tet Comam Dios, Comam chiaben tzet cheyala. Chil Comam sunil tzet cheyu yiri ewantajil cat yak'ni Comam ispaj selet teyet.

⁷ Hayet chextxahli, machojab chexoc hecayerie tzoti' matzet chaliloj haca' chute anma mañto ohtañohe Comam Dios. Yuto chistxum ebnaj ta yu caw nimej chute ebnaj yoj istxah, caw chabe Comam Dios tzet chal ebnaj yalni. ⁸ Wal xin mach cheyute haca' tu', yuto Comam Dios yohtaxa tzet chiocnico heyu yalaño yet mañto chek'an tet Comam.

⁹ Hayet chextxahli, hac ti' cheyute heyalni haca' ti':
Hach Comam, hach coDios, ayach yul satcañ, ni-
manojab yelapno habi yul sat anma.

- 10 Hulañ cat hawoc jahawilojañ yul sat yibañik'inal ti'. Yijab isba tzet chawoche sat tx'o tx'otx' ti' haca' chu yijni isba yul satcañ.
- 11 Mamin, chicok'anañ tawet, ak' tzet chicolohañ hunun tz'ayic.*
- 12 Ak' nimanc'ulal yin istx'ojal chicowatx'ehañ, haca' chu jak'ni nimanc'ulalañ yin anma chiwatx'en istx'ojal jinñ.
- 13 Mach choñhachayojañ xol ilwebal, caw colorilojañ yul isk'ab naj matzwalil, quexchi yin hetxah, xi Comam.

14 Yalnipaxo Comam:

—Ta cheyak' nimanc'ulal yin anma chiwatx'en istx'ojal teyin, ha' Comam Dios ay yul satcañ ch'ak'nipaxo nimanc'ulal teyin. ¹⁵ Yaj ta mach cheyak' nimanc'ulal yin heyet anmahil chiwatx'en istx'ojal teyin, mach chak'paxo nimanc'ulal Comam Dios teyin, xi Comam.

Cuywa Comam Jesús yin yet mach choñwa' yu cotxahli tet Comam Dios

¹⁶ Lahwi tu' yalnipaxo Comam Jesús:

—Hayet mach chexwa' yu hetxahli tet Comam Dios,* mach bisc'ulalo cheyute hesat haca' chute ebnaj chal isba c'ulal, yuto ebnaj tu' caw bisc'ulal chute ebnaj sat yuñe yillax ebnaj yu anma tato ayco ebnaj yin yet mach choñwahi yu cotxahli tet Comam Dios. Yin caw yeli chiwalan teyet chischahna ebnaj ispaj selet yet chiillax ebnaj yu anma tu'. ¹⁷ Walex ti' xin, yet mach chexwa' yu hetxahli tet Comam Dios, chetx'ahwe hesat cat

* **6:11** Pr 30:8-9 * **6:16** Yet mach choñwa' yu cotxahli, ha' chalilo ayuno yin castilla.

hexínito xil hewi', ¹⁸ yuñe mach chalilo isba tato ayexico yuñ yet mach chexwa' yu hetxahli tet Comam Dios. Wal xin hañic'añe Comam ewan yehi, ha' chiilni tzet cheyu cat yak'ni Comam ispaj selet teyet, xi Comam.

Jak'aweto cok'alomal satcañ
(Lc 12:33-34)

¹⁹ Yalnipaxo Comam Jesús haca' ti':

—Mach chetenba hek'alomal sat tx'o tx'otx' ti', yuto chioc no' ih yeta'toj, cat xin yocpaxo isk'uxewal. Macato chul ebnaj elk'om yuñ cat yinito ebnaj. ²⁰ Wal xin ha' hune' cheyute, tenbawe hek'alomal yul satcañ bay machi no' ih chietantoj, bay mach chiocpaxo isk'uxewal, yeb bay mach chiapni ebnaj elk'om yuñ. ²¹ Yuxin ha' bay ay hek'alomal ha' tu' cheyapaxico heyanma, xi Comam.

Isbak' cosat haca' cantil yehico yuñ conimanil
(Lc 11:34-36)

²² Isbak' cosat cantil yehico yuñ conimanil, yuxin ta hañic'añe isc'ulal choche yila' hesat tu', sunil henimanil ayco yuñ sajilk'inal. ²³ Yaja' ta yuññe istx'ojal ayco hemujlupal; sunil henimanil ayco yuñ k'ejholo. Ta hune' issajilk'inal ayco teyuñ tu' chimeltzoco yuñ k'ejholohal, chexcancano xol k'ejholo, xi Comam.

¿Aymico janma yuñ Comam Dios mato yuñ k'alomal?
(Lc 16:13)

²⁴ Yalnipaxo Comam Jesús haca' ti':

—Machi hunu mac chu yoc chejabo tet cawañ patrón, yuto ta chisyije naj tzet chal naj babel, chismañic'o naj tzet chal naj iscab. Yeb xin tato xahan chil naj naj babel, chisyah naj naj iscab. Hac tu' heye hex ti', mach chu heyijen tzet chal Comam Dios tato ec'bal cheyaco heyanna yirñ k'alomal, xi Comam.

*Yilal iscawxi coc'ul yirñ Comam Dios
(Lc 12:22-31)*

²⁵ Yalnipaxo Comam Jesús:

—Yuxin chiwalan teyet, mach cheyaco yirñ hec'ul yirñ tzet chelo, yeb yirñ tzet chu yoc xil hek'ap yul sat yibañik'inal ti'. Ta chak' Comam Dios cocawil, ¿ha' tom xin tzet chico mach chak' Comam, heyalni? Ta ha' Comam ak'ñe conimanil, ¿ha' tom xil cok'ap mach chak' Comam? ²⁶ Ilwec'anab no' ch'ic chiec' satcañ, machi yawal no' chacoj, mach chihatx'wi no', machipaxo isc'uña no', yaja' xin chiak'lax tzet chislo no' yu Comam ay yul satcañ. ¡Hajxamex to caw ec'bal heyelapno sata no'! ²⁷ ¿Aymi hunujex ti' yu caw cheyaco yirñ hec'ul yuxin chu heyanico hanic'oxa yak'bil hak'inal yul sat yibañik'inal ti'?†

²⁸ ¿Tzet yirñ xin caw cheyaco yirñ hec'ul yirñ tzet chu yoc xil hek'ap? Ilwec'anab te' caj chich'ib xol k'ebtaj, mach chimunla te', mach chichemlipaxo te', ²⁹ yaja' chiwalan teyet, naj rey Salomón yet payat mach apni isk'aptzen isba naj haca' isc'ulch'anil te'. ³⁰ Walca caw c'ulch'an jilni isxumaquil te' tinañ, yaja' yet hecal cabe chirñuslaxto

† **6:27** Ay manuscritos chalni: “¿Aymi hunujex ti' yu caw cheyaco yirñ hec'ul yuxin chu heyanico hanic'oxa yak'bil hetel?”

te' yul horno. Ta chak' Comam isc'ulch'anil te' caj tu', ¿ha' tom xin xil hek'ap mach chak' Comam? Hex ti' caw mach cheyaco heyanna yirñ Comam Dios. ³¹ Yuxin mach cheyaco yirñ hec'ul cheyalni haca' ti': ¿Baytaxca chitit tzet chicolo yeb xil cok'ap? ³² Yuto ha' anma mach ohtañe Comam Dios chianico huntেক'an tu' yirñ isc'ul. Yaja' wal Comam Dios ay yul satcañ, yohtaxa Comam tato chiocnico huntেক'an tu' heyu. ³³ Wal xin aweco yirñ hec'ul hesaynilo Comam Dios babel cat heyijen tzet chala, walpaxo tzet chiocnico heyu yul sat yibañk'inal ti' xatic'a yak'a' Comam Dios teyet. ³⁴ Mach cheyaco yirñ hec'ul yirñ tzet chu yec' heyu yet hecal, yuto yet hecal tu' nanto tzet cheyaco yirñ hec'ul yirñ tzet cheyu, yuto masan ay isya'tajil yetbi hunun tz'ayic, xi Comam.

7

Mach comono choñoc jila' tzet ye hunu jet anmahil

(Lc 6:37-38, 41-42)

¹ Yalnipaxo Comam Jesús:

—Mach comono chexoc heyila' tzet ye hunu heyet anmahil, ha' xin wal mach chiocpaxo Comam Dios yila' tzet heyehi. ² Yuto haca'tic'a chu heyilni tzet ye heyet anmahil, hac tu' chu quexyilnipayo Comam. Wal xin haca'tic'a hemal cheyacoj yet cheyilni tzet yeco hunu heyet anmahil, ha'tic'a xin chexmalenpaxo yu Comam. ³ K'inalo tato ay hunu hawuxtaj ayicto isk'al te' ch'im yul isbak'sat, wal hachpaxo xin patzab te' aypaxicto yul isbak' hasat. Ta mach chawilti te' patzab ayicto yul isbak' hasat tu', ¿hatoc'anab nich'an isk'alemal te' ch'im

ayicto yul isbak'sat hawuxta tu' chu hawiniltij? jMachoj! ⁴ ¿Mataxca xin chu hawalni tet heyuxta tu' haca' ti': “Wuxtaj, wik'altijan hune' isk'al te' ch'im ayicto yul isbak' hasat,” ta cachi? Wal hachpaxo xin k'atanicto hune' te' patzab yul isbak' hasat. ⁵ Tato hac tu' hawalni, jlek'ti'ach! Wal xin icanilti te' patzab ayicto yul isbak' hasat babel, lahwi tu' cat hawinilti isk'al te' ch'im ayicto yul isbak'sat hawuxtaj.

⁶ Istzoti' Comam Dios lahan yeb huntেক'an ch'en ch'en perla isbi, caw ay istohol. Yuxin mach chu jak'ni Istzoti' Comam tet hunu mac machi yelapno Comam yul sat, yuto lahan yeb metx tx'i' caw how, chitit lemna jiñ. Aypaxo mac haca' no' txitam, toñe chioc isxaña'to tzet ch'ak'lax tet, xi Comam.

*K'anwej cat yak'lax teyet
(Lc 11:9-13; 6:31)*

⁷ Yalnipaxo Comam Jesús:

—K'anwe tet Comam Dios cat yak'ni Comam teyet, saywej cat yilcha heyu, elojabico heyaw sat pulta cat ishajlax teyet. ⁸ Yuto ha' mac chik'anni chischah, ha' mac chisayni chiilcha yu. Ha' mac chielico yaw sat pulta chihajlax tet.

⁹ K'inalo tato chisk'an heyuninal tzet chislo teyet, ¿tom cheyak' hunu ch'en ch'en tet? ¹⁰ Maca tato chisk'an hunu no' cay isc'uxu', ¿tom cheyak' hunu no' laba tet? ¹¹ Yaja' waxaña caw tx'ojex heyohta heyak'ni isc'ulal tet heyuninal, hajxam xin Comam Dios ay yul satcañ, ¿tom mach ch'ak' isc'ulal teyet, ta chek'ana?

¹² Ta cheyoche c'ul chute isc'ul anma teyiñ, hex babel c'ul cheyute hec'ul yiñ anma tu', yuto hac tu'

yalni yin̄ ley yeb yin̄ tzet tz'ibñebilcano yu ebnaj ischejab Comam Dios yet payat, xi Comam.

Yechel te' pulta txanñe sat
(Lc 13:24)

¹³ Yalnipaxo Comam Jesús:

—Wal ispultahil satcañ bay ay Comam Dios, lahan haca' hunu pulta nich'anch'an sat, ha' tu' xin chexoctoj. Yuto hune' pulta yeb hune' beh caw nimajal sat, yul cambal chitohi. Caw xin niman anma chito yul hune' pulta yeb hune' beh tu'. ¹⁴ Wal hune' pulta yeb hune' beh nich'anch'an sat xin choñyito bay ay k'inale mach istañbal, yaja' haywaññe mac chiocto yul hune' pulta tu', xi Comam.

Ha' sat te te' chihalniloj tzet te'al te'
(Lc 6:43-44)

¹⁵ Yalnipaxo Comam Jesús:

—Caw cheyil heba tet ebnaj lek'ti'wom chisbalico isba ischejabo Comam Dios, yuto hayet chit-zotel ebnaj teyet, caw c'ulch'an chute isc'ul ebnaj haca' no' me', yaja' wal yanma ebnaj xin lahan haca' no' oj choñ'uxnitoj. ¹⁶ Ixtañ hetxumilo tzet nabil yu ebnaj yuto ha' tzet chiswatz'e ebnaj chihalniloj. K'inalo te' uva tinañ, ¿tom chak' te' sat te' tx'ix? Maca te' higo, ¿tom satpaxo te' tx'ix chak' te'? ¡Machoj! ¹⁷ Wal xin te' satnom te' c'ul, c'ul sat te' chak'a. Yaja' wal te' mach c'uluj xin machiswalil sat te' chak'a. ¹⁸ Te' satnom te' c'ul, ¿tom machiswalil sat te' chak'a? ¡Machoj! Yeb te' te' machiswalil, ¿tom c'ul sat te' chak'a? ¡Machoj!
¹⁹⁻²⁰ Yuxin ebnaj chal isba ischejabo Comam Dios, yin̄ tzet chiswatz'e ebnaj ha' yin̄ chetxumiloj tzet

nabil yu ebnaj. Haca' chu istzoc'laxcañ te te' mach c'ulo sat chak'a, chilahwi tu' xin cat isñuslaxto te' xol k'a k'a', hac tu' chiutelax huntেক'an ebnaj tu', ãi Comam.

Mach sunilo mac chiapni yul satcañ
(Lc 13:25-27)

²¹ Yalnipaxo Comam Jesús:

—Mach sunilo mac chihalni: “Mamin, Mamin,” wiñan, chioc yul isk'ab Comam Dios, wal xin hañe mac chiyijen tzet chal Inmaman ay yul satcañ.

²² Hayet chiapni islahobal tz'ayic hantañe mac chihalni haca' ti': “Mamin, Mamin, hañoñti'añ coñec'añ jala'añ hatzoti' tet anma. Jinipaxilo-jañ ischejab naj matzwalil yin anma yin habi, yeb xin tx'i'al c'aybalc'ule coyehañ tet anma,” ãi anma yin hune' tz'ayic tu'. ²³ Yaja' chintak'wihan tet haca' ti': “Mach quexwohtajojan, hitzañwelo yin insatan. Hex ti' istx'ojalñetic'a hewatx'e,” quinchiñetic'ahan, ãi Comam.

Yechel xe' cabeb te' ña
(Mr 1:22; Lc 6:47-49)

²⁴ Yalnipaxo Comam Jesús:

—Mac chiaben Intzoti'an cat isyijeni, lahan yeb hune' naj caw ay yitz'atil iswi', yuto hayet yanicañ naj yatut, yibañ ch'en ch'en yayto naj isxe'al te'.

²⁵ Lahwi tu' xin istit hune' niman jak'ek' ñab, isnohcañ ha ha', ismak'nico isba ha' yin te' ña tu', yaja' xin mach ayc'ay te', yuto caw c'ul yehayto xe' te' yibañ ch'en ch'en. ²⁶ Yaja' wal mac chiaben Intzoti'an, machi xin chisyije tzet chala, lahan yeb hune' naj mach isnabal, yibañ arena yayo xe' yatut. ²⁷ Lahwi tu', yak'ni hune' niman jak'ek'

ñab, isch'ibcañ ha ha', ismak'nico isba ha' yiñ te' yayc'ay te', yuchc'acanto te', ñi Comam.

²⁸ Hayet lahwi istzotel Comam Jesús tu' xin, caw sunil anma c'aycanocañ isc'ul yaben iscuylwa Comam, ²⁹ yu caw ay yip Comam iscuylwahi, mach haca'o chu iscuylwa ebnaj cuywawom yiñ isley naj Moisés.

8

Yak' cawxo Comam Jesús hune' naj ayco lepra yiñ

(Mr 1:40-45; Lc 5:12-16)

¹ Yet ispaxayti Comam Jesús iswi' hune' woñan tu', caw hantañe anma oc tzujno yinta Comam.

² Yelilo hune' naj yul beh, ayco hune' yabil chiyij lepra yiñ. Ishitzico naj isc'atañ Comam, yay jahno naj sata Comam, yalni naj:

—Mamin, ta chawoche chu hawinilo hune' yabil ti' wiñan, ñi naj tet Comam. ³ Yanayo Comam isk'ab yibañ naj, yalni Comam:

—Ho', chiwochehan ta chiel hune' yabil ti' tawiñ, ñi Comam. Yiññena xin yel hune' yabil tu' yiñ naj. ⁴ Lahwi tu', yalni Comam tet naj:

—Machi mac tet chawalic'o hune' ti', wal xin as ye haba tet naj sacerdote, cat hawak'ni haxahanbal haca' yalni isley naj Moisés, yuñe yohtañencanilo anma tato xaelcano hune' yabil ti' tawiñ, ñi Comam tet naj.

Yak' cawxo Comam Jesús ischejab hune' naj capitán romano

(Lc 7:1-10)

⁵ Hayet yoc apno Comam Jesús yul coñob Capernaum, yapni hune' naj capitán romano isc'atañ Comam, isk'anni naj ta chak' cawxo Comam hune' ischejab naj. ⁶ Yalni naj tet Comam:

—Mamin, ay hune' inchejaban caw ya'ay, mach chibili isnimanil, caw xin ch'ec'ya' yanma naj yu hune' yabil tu', xi naj tet Comam.

⁷ Yalni Comam tet naj:

—C'ultic'a, chintohan wak'a' cawxojan naj, xi Comam.

⁸ Istak'wi naj capitán tu' tet Comam:

—Mamin, caw mach chu hawapni yul watutan chiwabehan yuto caw matzet welapnojan. Wal xin torie chachtzotelnato yin hacñe ti' cat iscawxicañ inchejabu'an. ⁹ Wohtajan hune' ti', yuto haninti'an ayinictojan yalañ ischejbanil ebnaj wahan, aypaxo xin ebnaj soldado ayico yalañ wipan. Ta chiwalan tet hunu naj: “Asi' bey tu',” ta quinchian, cat isto naj. Taca chiwalan tet hunuxa naj: “Cata,” ta quinchian, cat istit naj. Yebpaxo xin ta chiwalan tet hunuxa naj inchejaban: “Watx'e hune' tilah,” ta quinchian, cat yoc naj iswatx'enoj, xi naj.

¹⁰ Hayet yaben Comam yalni naj haca' tu', caw c'ayilo isc'ul Comam, yalni Comam tet anma tzujanico yinta tu':

—Yin caw yeli chiwalan teyet, mahto hunu mac chiwilan yanico yanma yin Comam Dios yul coñob Israel haca' hune' naj ti'. ¹¹ Wal xin chiwalan teyet, chitit anma bay chiahilo tz'ayic, yeb bay chito tz'ayic cat iscutxbanico isba yeb naj Abraham, naj Isaac yeb naj Jacob sat ismeña Comam Dios bey satcañ. ¹² Ha' anma Israel yettic'a

ay yoc sat hune' meġa tu', yaj ay ebnaj chicancano yintajilo xol k'ejholo. Ha' bey tu' xin ch'oc ok'oj cat isrietx'la yeh yu isya'tajil, ġi Comam tet anma.

¹³ Lahwi tu' xin, yalni Comam tet naj capitán:

—Paxaño hawatut, yubojab haca' chawoche yuto maxawayto yul hawanma wiñan, ġi Comam tet naj. Yiñtic'a hune' orahil tu' xin cawxicañ ischejab naj capitán.

*Yak' cawxo Comam Jesús ismi' yixal naj Pedro
(Mr 1:29-31; Lc 4:38-39)*

¹⁴ Lahwi tu' xin, isto Comam Jesús yatut naj Pedro. Yet yapni Comam yilni tato hilanto ismi' yixal naj Pedro tu' sat tx'at yu hune' niman k'a'.

¹⁵ Yoc tzaġno Comam yiñ isk'ab ixnam, yelna hune' k'a' tu' yiñ ixnam, iscawxicañ ixnam. Lahwi tu' yahwano ixnam, yoc ixnam iswatx'eno tzet chislo Comam.

*Caw tx'i'al anma cawxicañ yu Comam Jesús
(Mr 1:32-34; Lc 4:40-41)*

¹⁶ Hayet lañanxa yay numnahi caw hantañe anma ayco ischejab naj matzwalil yiñ ilaxto isc'atañ Comam. Caw xin hune' ñech'an tzoti' chal Comam cat yel ischejab naj matzwalil yiñ anma. Yak'nipaxo cawxo Comam anma ya'ay. ¹⁷ Yiñ huntex'an iswatx'e Comam tu' yijcano isba tzet halbilcano yu naj Isaías, hune' ischejab Comam yet payat, yet yalni naj haca' ti': “Yibañ naj chitocano yabil ayco jiñ, cat xin yabenpaxo isya'il coseleloj,”* ġi naj Isaías tu'.

* **8:17** Is 53:4

Huntek'an mac yoche oco tzujno yinta Comam Jesús

(Lc 9:57-62)

¹⁸ Hayet yilni Comam Jesús tato caw hantañe anma hoyanico yirñ, yalni Comam tet ebnaj iscu-ywom tato chiec'to ebnaj yeb Comam isk'axepic'to ha' lago. ¹⁹ Yaja' yet yalañto mañto chito Comam yeb ebnaj, ishitzico hune' naj chicuywa yirñ isley naj Moisés isc'atañ Comam, yalni naj:

—Mam cuywawom, chinoc tzujnojan tawintaj bajxañetu'wal chachtohi, ñi naj.

²⁰ Yalni Comam tet naj:

—No' wech ay isñach'en no' bay chiwayi, yebpaxo no' ch'ic ay yatut no'. Yaja' Hanin Ak'bilintijan texol yu Comam Dios,* machi watutan bay chinxewninojan, ñi Comam.

²¹ Yalnipaxo hune'xa naj iscu-ywom Comam:

—Mamin, chinoc tzujnojan tawintaj, yaj estam chawak' inhamanilan chito inmuycano inmaman babel, ñi naj.

²² Yalni Comam tet naj:

—Wal xin ocañ tzujno wintajan yuto ha' mac camom yul sat Comam Dios, ha' chimujni yet camomal, ñi Comam tet naj.

Yet isliñban Comam Jesús hune' jak'ek' yibañ ha' mar

(Mr 4:35-41; Lc 8:22-25)

* **8:20** Hanin Ak'bilintijan texol yu Comam Dios, ha' chalilo El Hijo de Hombre yirñ castilla. Ha' chalpaxilo ta ak'bil ismunil Comam Jesús yu Comam Dios yet yulic'o Comam yul sat yibañk'inal ti' xol anma. Yuteco isba Comam anmahil yuñte yoc Iscolomalo anma. Dn 7:13-14; Ap. 1:13; 1Ts 4:17.

²³ Lahwi tu' xin, yocto Comam Jesús yeb ebnaj iscuwym yul hune' te' barco. ²⁴ Hayet lañan yec'to Comam yeb ebnaj yibañ ha ha' tu' xin, yichico yec' hune' niman jak'ek' caw how. Toxañe chitiñla yah ha ha' tu' yin te' barco, wal Comam Jesús xin wayo chu yul te'. ²⁵ Hayet yilni ebnaj iscuwym Comam hune' tu', yoc ebnaj yinolo iswayañ Comam, yalni ebnaj:

—¡Mamin colorañ, yuto lañan coto yich ha'! ñi ebnaj tet Comam.

²⁶ Istak'wi Comam tet ebnaj:

—¿Tzet yin xin caw cheggiwi? ¡Caw mach cheyaco heyanna yin Comam Dios! ñi Comam tet ebnaj. Lahwi tu' xin yahwano Comam, iscachni Comam jak'ek' yeb ha ha'. Hac tu' yu isliñban isbili ha ha' tu' yeb jak'ek', ispaxtz'iñnahi. ²⁷ Wal ebnaj iscuwym Comam tu', caw c'aycanilo isc'ul ebnaj, yalni ebnaj tet hunun:

—¿Mac anmahil hune' ya' ti' yuxin chisyije jak'ek' yeb ha ha' tzet chal ya'? ñi ebnaj yin Comam.

Cawañ ebnaj ayco ischejab naj matzwalilyin bey Gadara

(Mr 5:1-20; Lc 8:26-39)

²⁸ Hayet yapni Comam Jesús yeb ebnaj iscuwym isk'axepic'to ha' lago bey hune' tx'otx' chiyij Gadara, yapni cawañ ebnaj ayco ischejab naj matzwalil yin isc'atañ Comam; ispeto ebnaj yul camposanto. Ebnaj cawañ tu' caw chixiw anma tet ebnaj yuto caw aycono yip ebnaj. Caw xin machi hunu mac chiec' bay ay ebnaj tu'.

²⁹ Yah yaw ebnaj tet Comam yin caw ip:

—¿Tzet hawoc jiñañ hach Jesús Isc'ahol Dios? ¿Tom chachhul hawak'a' ec'oya' janmahañ yalañto mañto chiapni istiehpohal? Xi ebnaj tet Comam.

³⁰ Iscawilal tu', ay hunték'an no' txitam lañan istañelaxi, ³¹ yuxin isk'an ebnaj ischejab naj matzwalil tu' tet Comam haca' ti':

—Tato choñhawilojañ yin ebnaj ti', chicok'anañ tawet, chejoñtojañ yin no' txitam tu' lah, xi ebnaj tet Comam.

³² Istak'wi Comam:

—C'ultic'a, asi'wej, xi Comam.

Hac tu' xin yu yel ebnaj ischejab naj matzwalil yin ebnaj cawañ tu', istocano ebnaj yin no' txitam. Lahwi tu' xin yelcañ no' txitam tu', isk'ojnito isba no' sat pahaw, yay apno no' xol ha ha', ishik'nito no' ha'.

³³ Wal ebnaj tañem txitam xin elcañ ebnaj. Hayet yapni ebnaj yul coñob yalni ebnaj tet anma yin tzet yu ebnaj cawañ bay aytic'aco ebnaj ischejab naj matzwalil. ³⁴ Yuxin sunil anma yul coñob tu' to ilno Comam. Hayet yapni anma isc'atañ Comam tu' xin, yoc anma isk'anno tet Comam tato chiel Comam yul ismajul istx'otx' ebnaj tu'.

9

Yak' cawxo Comam Jesús hune' naj mach chibili isnimanil

(Mr 2:1-12; Lc 5:17-26)

¹ Lahwi tu' xin yocto Comam Jesús yul te' barco, ismeltzoti Comam isk'axepxac'ti ha' lago tu', yapni Comam yul iscoñob. ² Yilaxto hune' naj mach chibili isnimanil isc'atañ Comam sat batxte'. Hayet yilni Comam xin tato caw ayco yanma ebnaj

initi naj tu' yirñ Comam, yalni Comam tet naj ya'ay tu':

—Hach wet anmahil aco yip hawanma, tinañ chiak'laxcano nimanc'ulal yirñ hamul, xi Comam tet naj.

³ Ay xin huntেক'an ebnaj cuywawom yirñ isley naj Moisés, istxum haca' ti': “Hune' naj ti' caw tx'oj istzotel naj yirñ Comam Dios, yuto chaco isba naj Diosal,” xi ebnaj yul yet ischuquil. ⁴ Wal Comam xin, yohta tzet chiec' yirñ isnabal ebnaj, yuxin yal Comam:

—¿Tzet yirñ xin caw tx'oj chiec' yirñ henabal? ⁵ ¿Baytet subuta walnihan heyalni, tom “ch'ak'lax nimanc'ulal yirñ hamul,” mato “ahañwanoj cat hapaxtoj?” ⁶ Tinañ xin chinyehan heyila' tato Hanin Ak'bilintijan texol yu Comam Dios, ay wipan wak'nihan nimanc'ulal yirñ ismul anma yul sat yibañk'inal ti', xi Comam. Yalni Comam tet naj ya'ay tu':

—Ahañwanoj, icañ habatxte' ti' cat hapaxto hawatut, xi Comam tet naj.

⁷ Yirñena tu' xin yahwano naj, ispaxto naj yatut. ⁸ Hayet yilni anma hune' tu' caw xiwcanocañ, yoc anma yak'no tzalaho isc'ul yirñ Comam Dios, yuto caw tx'i'al yip Comam isye tet anma.

*Yet yawten Comam Jesús naj Mateo iscuywomoj
(Mr 2:13-17; Lc 5:27-32)*

⁹ Lahwi tu' isto Comam Jesús. Hayet yec'to Comam xin, yilni Comam hune' naj ik'omilo tohlabal, Mateo isbi. Tz'oñanayo naj bay chiel ch'en tohlabal chialaxto bey Roma. Yalni Comam Jesús tet naj:

—Ocañ tzujno wintajan incuywomojan, xi Comam.

Hayet yaben naj hune' tu', yahwano naj, yoc tzujno naj yinta Comam.

¹⁰ Lahwi tu' yawtelax Comam wa'o yu naj yul yatut, yoc Comam sat mexa yeb ebnaj iscuywom, yebpaxo xin hunték'anxa ebnaj ik'omilo tohlabal, yeb hunték'an anma tx'oj isbeybal. ¹¹ Hayet yilni ebnaj fariseo hune' tu', yalni ebnaj tet ebnaj iscuywom Comam:

—¿Tzet yini xin chiwa' naj hecuywawom ti' xol ebnaj ik'omilo tohlabal, yeb xol ebnaj tx'oj isbeybal? xi ebnaj.

¹² Hayet yaben Comam hune' tu' xin, yalni Comam tet ebnaj:

—Ha' anma mach ya'o ay, matzet chiocnico naj añlom yu, to ha' anma ya'ay ha' chiocnico naj añlom yu. ¹³ Yuxin chiwalan teyet, saywe yul Yum Comam Dios cat hetxumni yini bay chal haca' ti': “Ha' hune' chiwochewan ta chitz'ay hec'ul yini heyet anmahil, maññetaj heyak'ni hexahanbal wetan,”* xiayoj. Mach hulnajojinan wawte'an anma chalni ta c'ul yecoj, ¡machoj! Walxinto yu anma chistxumu ta mulum, yuxin hulnajinan, yuñe isbejnicano yanico ismul,* xi Comam.

Mach chischah isba payat beybale yeb ac' beybale

(Mr 2:18-22; Lc 5:33-39)

¹⁴ Yet hunel apni ebnaj ischejab naj Juan anicañ ha' iswi' anma isc'atañ Comam Jesús, isk'amben ebnaj tet Comam:

* **9:13** Os 6:6; Mt 12:7 * **9:13** Os 6:6

—Hañoñiti'añ yeb ebnaj fariseo caw chicoyije-hañ hune' yet mach choñwa' cotxahli. Walpaxo ebnaj hacuywom xin, ¿tzet yirñ xin mach chisyije ebnaj hune' tu'? Xi ebnaj.

¹⁵ Yalni Comam tet ebnaj:

—K'inalo tato ay hunu mohyilal tinañ, aypaxo xin anma awtebil yirñ mohyilal tu'. ¿Tom xin chioc anma tu' yijle wahil yet ayc'o naj mohyom tu'? ¡Machoj! Wal xin hato yet chiapni istieñpohal yilaxilo naj mohyom tu' xol anma, catto yoc anma yirñ yijlen wahil, Xi Comam.

¹⁶ Yalnipaxo Comam:

—Mach chu yalaxico hunu k'ap k'ap ac'to isbujilo huno xilk'ape xilxa, yuto hayet chitx'ahlx k'ap, chimoq'ui k'ap ac' ayco isbujilo k'ap xilxa tu', cat xin istzilmocanto hune' xilk'ape tu'. ¹⁷ Hacpax tu' xin, mach chu yalaxayto ac' vino yul no' tz'um xilxa yuto chiliñmo no' cat ismalto vino tu', cat yetaxpaxcanto no' tz'um tu'. Wal xin yul no' tz'um ac'to chialaxayto ac' vino, hac tu' xin mach chietaxto te' vino yeb no' tz'um, Xi Comam Jesús tet ebnaj iscuymom naj Juan.

Hulcañ isc'ul iscutz'in naj Jairo yeb xin añcha hune' ix pitni xil isk'ap Comam Jesús

(Mr 5:21-43; Lc 8:40-56)

¹⁸ Hayet lañan yalni Comam Jesús hunték'an cuybanile tu', yapni hune' naj yahawil yirñ ebnaj Israel isc'atañ Comam, yalni naj tet Comam:

—Mamin, ay hune' nich'an incutz'inan lañanto iscamayoj, yaj ta chachto wintajan cat hawanayo hak'ab yibañ ix, chihulcañ isc'ul ix, Xi naj tet Comam.

¹⁹ Lahwi tu' yah liřno Comam, isto yinta naj yeb ebnaj iscuymom. ²⁰ Xol anma tzujan yinta Comam tu' xin, ay hune' ix ya'ay, cablahořebxa habil mach chiliři yay istx'ahwobal ix. Yuxin hitzico ix isc'atař Comam, ispitni ix isti' xil isk'ap Comam, ²¹ yuto istxum ix haca' ti': "Walca haře isti' xil isk'ap Comam chinpitan cat incawxocařan," ři ix. ²² Wal Comam xin, ismeltzo isba Comam, yoc t'ařno Comam yiř ix, yalni Comam haca' ti':

—Aco yip hawanma miyay. Macachcawxicař tinař yuto maxawaco hawanma wiřan, ři Comam tet ix.

Yiřřena tu' xin iscawxicař ix.

²³ Hayet yapni Comam Jesús bey yatut naj yahawil ebnaj Israel tu' xin, yilni Comam tato ayxac'o ebnaj chianico te' su' yiř ismujubal ix nich'an iscutz'in naj Jairo tu', yebpaxo xin wejanxaře anma yok'i. ²⁴ Hayet yilni Comam hune' tu', yalni Comam tet anma:

—Elařwetoj, ix nich'an ti' mach camnajo ix, toře chiway ix, ři Comam. Wal anma tu' xin oc tzebo yiř tzet yal Comam. ²⁵ Lahwi ischejni Comam eloti sunil anma yul řa, yocto Comam isc'atař ix nich'an tu'. Yoc tzařno Comam yiř isk'ab ix, yahwano ix. ²⁶ Sunil anma ay yul ismajul hune' cořob tu', abenilo tzet yuhi.

Yak' cawxo Comam Jesús cawař ebnaj mach chu yilni

²⁷ Yet yel Comam bey tu', ay cawař ebnaj mach chu yilni oc tzujno yinta Comam. Chi-xin-awito ebnaj tet Comam haca' ti':

—Mamin, isc'ahol jichmam David, tz'ayojab hac'ul jiñañ, xi ebnaj.

²⁸ Hayet yapni Comam yul ña, yocpaxto ebnaj yul ña yinta Comam, yalni Comam tet ebnaj:

—¿Chimheyayto yul heyanma tato chu wak'ni hajlojan hesat? xi Comam. Istak'wi ebnaj tet Comam:

—Ho' Mamin, chijaytojañ yul janmahañ, xi ebnaj.

²⁹ Yanico Comam isk'ab yin isbak'sat ebnaj, yalni Comam tet ebnaj:

—Yubojab haca' cheyoche yuto maxeyaco heyanma wiñan, xi Comam tet ebnaj.

³⁰ Hac tu' xin yu ishajlo isbak'sat ebnaj, yalnicanano Comam tet ebnaj:

—Tinañ xin, machi mac tet cheyalic'o hune' ti', xi Comam.

³¹ Yaja' haniq'uixto chito ebnaj, yichico ebnaj yalni tet anma yin tzet yu ishajlo isbak'sat ebnaj.

Tzotelcañ hune' naj mañtic'a chu istzoteli

³² Hayet caw lañan ispaxto ebnaj hajlo isbak'sat yu Comam Jesús tu', yapni hunttek'an ebnaj yak'nocano hune' naj isc'atañ Comam. Hune' naj tu' mach chu istzotel naj yuto ayco ischejab naj matzwalil yin naj. ³³ Hayet ischejnulo Comam ischejab naj matzwalil yin naj, yichico naj istzoteli. Wal anma ilni hune' tu' xin caw c'aycanocañ isc'ul. Yalni anma haca' ti':

—Mañto hunelo chijil yuni yul coñob Israel haca' hune' ti', xi anma.

³⁴ Wal ebnaj fariseo xin yal ebnaj haca' ti':

—Hune' naj ti' chílo naj ischejab naj matzwalil yirñ anma yu yip naj matzwalil, xi ebnaj yirñ Comam.

Caw tz'ay isc'ul Comam Jesús yirñ anma

³⁵ Caw sunil yulajla coñob yeb yulajla aldea bay ec' Comam Jesús, iscuyni Comam anma yulaj iscapilla ebnaj Israel yul hunu coñob tu'. Yalnic'o Comam yirñ tzet chu yoc anma yul isk'ab Comam Dios, yak'ni cawxo Comam anma tzijxañe yabilal ayco yirñ. ³⁶ Hayet yilnico Comam yirñ anma xin caw tz'aycañ isc'ul yirñ anma tu', yuto bejbilcanoj, mach chitxumcha yu tzet wal yuten isba. Haca' no' me' machi mac chitañeni, hac tu' ye anma. ³⁷ Yuxin yal Comam tet ebnaj iscuywom:

—Huntek'an anma ti' lahan haca' ixim trigo lañan isk'anbiloj. Caw hantañe munil, yaja' haywañe ebnaj munlawom. ³⁸ Yuxin k'anwe tet Comam Dios yahaw munil, haxinwal chati Comam ismunlawom xol anma, xi Comam tet ebnaj.

10

Issayilo Comam Jesús cablahoñwañ ebnaj chioc ischejaboj

(Mr 3:13-19; Lc 6:12-16)

¹ Lahwi tu', iscutxbanico Comam Jesús ebnaj cablahoñwañ iscuywom, yak'ni Comam yip ebnaj yinilo ischejab naj matzwalil yirñ anma, yebpaxo xin yu yak'ni cawxo ebnaj anma ya'ay, yeb yu yinilo ebnaj tzettaj ya' yu anma.

² Hac ti' xin isbi ebnaj cablahoñwañ ischejab Comam* haca' ti': Naj Simón chiyijpaxo Pedro, naj Andrés yuxta naj Simón, naj Jacobo yeb naj Juan, ebnaj cawañ ti' isc'ahol icham Zebedeo ye ebnaj. ³ Naj Felipe, naj Bartolomé, naj Tomás, naj Mateo, naj chitic'a inilo ch'en tohlabal chito bey Roma, naj Jacobo isc'ahol icham Alfeo, naj Tadeo. ⁴ Yebpaxo xin naj Simón, aytic'aco yiñ hune' partido chiyij cananista, yeb naj Judas Iscariote, naj anico Comam yul isk'ab camical.

*Yet ischejnito Comam Jesús ebnaj ischejab yal-noc'o Istzoti' Comam Dios
(Mr 6:7-13; Lc 9:1-6)*

⁵ Ha' ebnaj cablahoñwañ ti' ischejto Comam Jesús, yalni Comam ischejbanil ebnaj haca' ti':

—Mach chexec' yulaj iscoñob anma mach Israeloj, yebpaxo xin mach chexec' yulajla coñob ay yul ismajul Samaria. ⁶ Cachanñe xol jet coñob Israel chextohi, yuto lahan anma haca' no' me' chic'ayic'oj. ⁷ Asi'we xin, cat heyalni tet anma tato Comam Dios ay yul satcañ yocxa yahawo yiñ anma. ⁸ Ak'we cawxo anma ya'ay, ta ay mac chicami cheyak' hulucañ isc'ul, ta ay mac ayco lepra yiñ cheyak' cawxoj, cat heyinipaxilo ischejab naj matzwalil yiñ anma. Hune' heyip chiwak'ti'an matanil chechah, yuxin mach chek'an hetohol yet cheyak'ni cawxo anma.

* **10:2** Apostol yiñ castilla ha' ton ebnaj cablahoñwañ issiq'uilo Comam Jesús xol ebnaj iscuwym, yu yoccano ebnaj ischejaboj. Chihallaxpaxo apostohal yiñ naj Pablo.

⁹ Yiriñ hebel tu' xin matzet cheyitoj; mach cheyito hemelyu, nitam hunu centavo, ¹⁰ mach cheyipaxto hetz'ispa, yeb hehelbal, mach cheyipaxto ishelbal hexañab, yebpaxo xin mach cheyik' hek'ojoch. Chiwalan hunték'an ti' teyet yuto naj munlawom chiak'lax tzet chislo naj yiriñ ismunil.

¹¹ Hayet chexapni yul hunu coñob maca yul hunu aldea chesay mac c'ulch'an isc'ul, ha' tu' xin chexcani masanto yet chexmeltzohi. ¹² Yet chexapni bey te' ña bay chexcancano tu', cheyal tet anma tu' haca' ti': “Ayojab ak'anc'ulal texol,” quexchi. ¹³ Ta choche mac ay yul hune' ña tu' ak'anc'ulal, chiak'lax ak'anc'ulal tu' tet, taca mach choche xin, mach chiak'lax tet. ¹⁴ Yaja' tato mach chexchahlaxi, yeb xin mach chibelax tzet cheyala, chexel yatut anma tu' maca yul hune' coñob tu', cat xin hetzicnilo pojor yiriñ heyoy yuñe heyeniloj tato matxa heyoc yiriñ anma tu'. ¹⁵ Yiriñ caw yeli chiwalan teyet, yet chilni Comam yiriñ tzet chielico anma tu', caw ec'balto isya'tajil chischah sata anma ay bey coñob Sodoma yeb coñob Gomorra, xi Comam Jesús.

Yilal yak'lax ec'oya' yanma macta ayxaco yul isk'ab Comam Jesús

¹⁶ Yalnipaxo Comam Jesús tet ebnaj iscuymom tu':

—Chexinchejtojan xol anma haca' no' me' chito xol no' oj. Yuxin helan cheyute heba haca' no' laba, yaja' huncuentañe cheyute hec'ul haca' no' cuwis. ¹⁷ Caw cheyil heba, yuto chexilaxto sata ebnaj iswi'ehal yiriñ lahti' yul coñob. Chexmak'lax

yulajla capilla. ¹⁸ Chexalaxico sata ebnaj gobernador, maca sat ebnaj nimeta yahaw, yuto ayexico yul ink'aban. Hac tu' chu quinheyak'nihan yohtañelo ebnaj, yeb tet anma mach Israeloj. ¹⁹ Hayet chexalaxico sata ebnaj yahaw tu', mach cheyaco yin hec'ul yin tzet chu hetzoteli, yuto ha' Comam Dios chiak'ni hehelanil hetzoteli. ²⁰ Wal xin maɁtajex chextzoteli, to ha' Yespíritu Comam chitzotel teyiñ.

²¹ Yet chihul hune' tiempohal tu' ay ebnaj chianico yuxta yul isk'ab camical, aypaxo ebnaj mame chianico isc'ahol yul isk'ab camical, aypaxo xin ebnaj c'ahole chianico howal yin ismam cat ispotx'ni camo ebnaj ismam. ²² Sunil anma chichiwa isc'ul teyiñ yuto ayexxaco yul ink'aban, yaja' wal mac chitecha yu masanto yet islahobal, chicolchahi. ²³ Hayet chextzumbelaxilo yul hunu coñob, chexel bey tu' cat heto yul hunuxa coñob, yuto yin caw yeli chiwalan teyet; maɁtotic'a chilahwi heyec' yul sunil coñob Israel ti' cat wul lemnahan, Hanin Ak'bilintijan texol yu Comam Dios.

²⁴ Machi hunu naj lañan iscuylaxi chipalc'onnacari yibañ naj chicuyñi tu', yeb xin machi hunu naj chejab chipalc'onnacari yibañ ispatrón. ²⁵ Yaja' tato ay hunu naj chicuywi tu' chiapni yitz'atil iswi' haca' naj cuywawom tu', caw c'ul hune' tu', yeb xin tato ay hunu naj chejab chiapni islahanñe isba yeb ispatrón, c'ulpaxo hune' tu'. Ta chinhallaxan *Beelzebú*,† naj yahawil

† **10:25** *Beelzebú*, ha' hunxa isbi naj matzwaliñ yu ebnaj Israel. Hune' bihe chaliloj yahaw lek'ti'. Mt 9:34; 12:27; Mr 3:22; Lc 11:15.

yiri ebnaj ischejab naj matzwalil, hajexxampaxoj, ¿tzet mach hallaxo teyiri? Xi Comam Jesús.

*Haric'arñehojab tet Comam Dios choixiwi
(Lc 12:2-7)*

²⁶ Yalnipaxo Comam Jesús:

—Mach chexxiw tet anma, yuto machi hunu tzet ye tu' ewan mach chiel yeñel, yeb xin machi hunu tzet chihallax yiri ewantajil mach chiabchaloj. ²⁷ Sunil tzet chiwalan teyet yiri ewantajil tinañ, pujbawec'o tet anma. Yeb huntেক'an toñe chinsahan yul hetxiquin, halwec'o yiri caw ip yulaj calle. ²⁸ Mach chexxiw tet ebnaj chipotx'ni henimanil, yuto wal heyanma mach chik'oji ebnaj ispotx'ni. Wal xin hañe tet Comam Dios bay wal hexiwi, yuto chu yanito Comam henimanil yeb heyanma xol k'a k'a' mach istañbal.

²⁹ Chisje hetxumni yiri no' niñte ch'ic tinañ, cac'oñ no' chitxoñlax yiri centavo. Yaja' machi hunu no' chicami tato mañtaj Comam ay yul satcañ chihalni. ³⁰⁻³¹ Hajxam hex ti' to caw ec'bal heyelapno sata no' niñte ch'ic tu', caw bisbil xil hewi' yiri hununtajil yu Comam. Yuxin chiwalan teyet, mach chexxiwi, xi Comam.

*Mac mach chitx'ixwi yiri Comam Jesús sata anma
(Lc 12:8-9)*

³² Yalnipaxo Comam Jesús:

—Ha' mac mach chitx'ixwi yalni yiri sat anma tato wetxahan yehi, haquintu'an mach chintx'ixwihan walnihan tet Inmaman ay yul satcañ tato wetan yehi. ³³ Yaja' wal mac chihalni yiri sat anma tato mach wetojan yehi,

chiwalpaxojan yiri sat Inmaman ay yul satcañi tato mach wetojan yehi, xi Comam.

Iscajlecañi isba anma yu Comam Jesús
(Lc 12:51-53; 14:26-27)

³⁴ Yalnipaxo Comam Jesús:

—Tajca chetxumu tato hulnajinan yu wanicojan ak'anc'ulal xol anma yul sat yibañk'inal ti', machoj, walxinto yu yak'lencañi howal wiñan. ³⁵ Quinhulan yu yak'nicañi howal naj c'ahole yeb ismam, ix unine chioc ix howal yiri ismi', ix alibe chioc ix howal yiri ixnam alibe, ³⁶ yuxin xoltic'a mac ayto yu isba chiah howal.

³⁷ Mac ec'bal chaco yanma yiri ismam maca ismi' insatajan, mach istzano yoc wetojan, yeb xin ha' mac ec'bal ayco yanma yiri isc'ahol maca iscutz'in insatajan, mach istzano yoc yul ink'aban. ³⁸ Ha' mac hinan yak'len isya'tajil wiñan, waxañca chiak'lax camo yiri culus, ha' chu yoc wetojan. ³⁹ Ha' mac ec'bal chisya'ilñe isba insatajan, chic'aytoj, mach chik' isk'inal mach istañbal. Wal mac hinan iscam wiñan xin chischah isk'inal mach istañbal, xi Comam.

Ebnaj chichahni ispaj selet tet Comam Dios
(Mr 9:41)

⁴⁰ Yalnipaxo Comam Jesús:

—Ha' mac chexchahni, haninan chinischahan, ha' mac chinchahnihan chischah Mac añeintijan. ⁴¹ Ha' mac chichahni hunu ischejab Comam Dios, lahan ismatan chischah haca' ischejab Comam tu'. Mac chichahni hunu mac isc'ulalñetic'a chiswax'e, lahan ispaj chischah yeb mac isc'ulalñetic'a chiswax'e tu'. ⁴² Haxa mac chiak'ni

hunu vaso chewala' tet hunu incuywoman, waxarıca caw comon jilni, yiri caw yeli chiwalan teyet, hune' mac tu' chischah ispaj selet tet Comam Dios, xi Comam.

11

*Yato naj Juan anicari ha' iswi' anma cawari is-cuywom yak'a' isk'ambabal tet Comam Jesús
(Lc 7:18-35)*

¹ Lahwi yalnicanano Comam Jesús ischejbanil ebnaj cablahoriwari iscuywom, isto Comam cuywal; yec' Comam yalnoc'o Istzoti' Comam Dios yul hunun coriob ayco yiri ishoyanil bay ay Comam.

² Yiri hune' tiempohal tu' ayicto naj Juan anicari ha' iswi' anma yul preso. Yabe naj isk'umal yiri tzettaj chiswax'e Comam Cristo. Ischejnito naj cawari ebnaj iscuywom ³ isk'ambeno tet Comam:

—¿Ham hach ti' Cristo echmabil yul juhari, mato chijechmahari yul hunuxa naj? xi ebnaj.

⁴ Istak'wi Comam:

—As halwe tet naj Juan tu' yiri sunil tzet maxeyabe yeb yiri tzet maxeyila. ⁵ Halwe tet naj tato ha' mac maxtic'a chu yilni hajlocanocari sat, haxa mac maxtic'a chu yeq'ui, belwicari. Ha' mac ayco lepra yiri xin arhacanoj, ha' mac maxtic'a chabe, hajlo istxiquin. Aypaxo camom hulcari isc'ul, cat xin yallaxpaxo Tzoti' yet colbanile tet anma machi bay chicawxi isc'ul. ⁶ ¿Sak'al yet mac mach chicabcon yanma wirian! quexchi, xi Comam tet ebnaj.

⁷ Hayet lahwi ispaxto ebnaj xin, yichico Comam yalni tet anma yiri tzet yelapno ye naj Juan, yalni Comam haca' ti':

—Nawetij tzet quexbey heyila' bey tx'otx' desierto, ¿tom ha' hune' te' ah ch'ec' k'elah yu jak'ek'?
 8 ¿Mato hunu naj caw nanxa yoc xil isk'ap ayco quexbey heyila'? ¡Machoj! Yuto ebnaj caw nanxa islow yehico xil isk'ap yulñe yatut ebnaj rey ay ebnaj. 9 ¿Mac quexbey heyila'? Wal xin hune' ischejab Comam Dios quexbey heyila'. Yiñ caw yeli hune' ischejab Comam Dios quexbey heyila' tu' caw ec'balto yelapno ye ismunil naj sata ebnaj ischejab Comam Dios ec'lena yet payat. 10 Yiñ naj Juan tz'ibrñebilcano yul Yum Comam Dios bay chal haca' ti':

Haninan chinchejtojan inchejaban babel tasataj, yuñe iswatx'en habeh yalañto mañto chachapni,* xiayoj.

11 Yiñ caw yeli chiwalan teyet, xol sunil anma yul sat yibañk'inal ti' machi hunu mac ec'bal yelapno yibañ naj Juan tu'. Yaja' wal mac chioc yul isk'ab Comam Dios xin waxarica caw comonñe yeq'ui, ec'bal sak'al yet sata naj Juan.

12 Yet taxtic'a yichiti naj Juan tu' yanicañ ha' iswi' anma masanta tinañ, yiñ isya'tajil choc anma yul isk'ab Comam Dios, yaja' hañcañe mac chihti yanma yiñ, ha' chitzujcha apno yu yoc yul isk'ab Comam. 13 Sunil tzet yal ebnaj ischejab Comam Dios yet payat yeb sunil tzet yal isley naj Moisés yalañto mañto chiichico ismunil naj Juan, toñe bina yiñ tzet chu yoc anma yul isk'ab Comam Dios. 14 Ta cheyoche cheyayto yul heyanna yiñ tzet chiwalti'an, txumchaojabilo heyu tato ha' naj Juan tu', ha' naj haca' naj Elías* echmabil

* 11:10 Mt 3:1 * 11:14 Lc 1:17

yul heyu.* ¹⁵ Maquex cheyabe hune' ti' ak'we heyanna hetxumniloj.

¹⁶ Anna ay yul hune' tiempohal ti', c'ul inlah-banan yeb nište unin chiay tz'ořno yul txořbal cat issajchi, cat yahwi tet nište yet uninal, chalni: ¹⁷ “Nabaře jeta cobahař jok'tzenař te' su', yuto mach quexcařalwi. Nabaře jacojař bit caw bisc'ulal yoqui, yuto mach quexok'paxoj,” ři nište unin tu'. ¹⁸ Chiwalan hune' ti', yuto yet yul naj Juan anicař ha' iswi' anma mach wa' naj yeb anma, yuxin hallaxi tato ayco ischejab naj matzwalil yiř naj. ¹⁹ Haxa Hanin Ak'bilintijan texol yu Comam Dios, chinwa'an yeb anma yuxin chihallax wiřan haca' ti': “Wal naj Jesús ti' wa'ořetic'a chu naj yeb uc'u vinořetic'a chu naj, yamigo isba naj yeb ebnaj tx'oj chiswatx'e yeb ebnaj ik'omilo tohlabal ch'en chito bey Roma,” ři anma wiřan. Yaja' wal anma ayco ishelanil Comam Dios yiř haban isyenilo isba yiř tzettaj isc'ulal chi-la-iswatx'e, ři Comam.

Huntek'an cořob mach yijemo yiř tzet chal Comam Jesús

(Lc 10:13-15)

²⁰ Yet hunel xin oc Comam Jesús yala' istx'ořal huntek'an cořob bay caw tx'i'al c'aybald'ule xaisye Comam, yuto anma ay yul huntek'an cořob tu' mařtic'a chisna isba isbejnicano iswatx'en istx'ořal, yuxin yal Comam haca' ti':

²¹ —Hex ay yul cořob Corazín c'anch'anex, yeb hex ay yul cořob Betsaida, c'anch'anexpaxoj, yuto ta yul cořob Tiro yeb cořob Sidón yelax huntek'an

* **11:14** Ml 4:5; Mt 17:10-13; Mr 9:11-13

c'aybalc'ule chiyelax texol ti', payxam isbejcano anma iswatx'en istx'ojal, yamahto anma tañ yirñ iswi', yeb yamico anma xil isk'ap chiyenilo bisc'ulal. ²² Yaja' chiwalan teyet, yet chiapni istz'ayical bay chil Comam Dios yirñ tzet chielico anma, caw ec'balto isya'tajil chischah hunttek'an anma ti' sata anma ay yul coñob Tiro yeb anma ay yul coñob Sidón. ²³ Haxa hex ay yul coñob Capernaum, ham heyalni ta chexilaxcañ satcañ, machoj; wal xin chek'ojlaxayto xol camom. Yuto ta yul coñob Sodoma yelax hunttek'an c'aybalc'ule chiyelax texol ti', isbejmicano anma yanico ismul, aytomic'o hune' coñob tu' tinañ. ²⁴ Yuxin chiwalan teyet yet chilni Comam Dios yirñ tzet chielico anma, caw ec'balto isya'tajil chechah sata anma ah Sodoma tu', xi Comam.

*Ha' Comam Jesús choñak'ni xewoj
(Lc 10:21-22)*

²⁵ Hayet hune' tiempohal tu' txahli Comam Jesús, yalni Comam:

—Mamin, yahawil satcañ yeb tx'o tx'otx', chiwak'an yuch'andios tawet yuto haweba hunttek'an ti' tet ebnaj ay ishelanil yeb tet ebnaj ay iscuyu yul sat anma, hawak'ni yohtañelo anma matzet yohtaj. ²⁶ Mamin, hac tu' chuhi yuto hac tu' el yirñ hac'ul, xi Comam.

²⁷ Lahwi tu' yalni Comam tet anma:

—Sunil tzet ye tu' ayco yul ink'aban yu Inman. Machi hunu mac ohtañeinan hanin C'ahole inti'an, cachanñe Inmaman ohtañeinan. Machi hunu mac ohtañe Inmaman, cachanñe haninan quinisc'aholti'an wohtajan, cat wak'nihan Inmamtu'an yohtañelo tet mac bay chiwochehan.

28 Maquex sic'omexxa yu hemunil yeb hex xati-bayo heyu yalañ yalil heyijat, titañwe inc'atañan, yuto haninan chexwak' xewojan. 29 Ijwe hune' ijatz chiwak'an heyija'. Cuywañwe wintajan hax-inwal chixew heyanna, yuto haninti'an c'ulch'an inc'ulal yeb xin ay isnimanil inc'ulan. 30 Hune' ijatz chiwak'an heyija' ti' mach aloj, mach ya'tajo heyijenpaxoj, xi Comam tet anma.

12

Yet yinilo iscuwym Comam Jesús iswi' ixim trigo

(Mr 2:23-28; Lc 6:1-5)

1 Yiñ hune' tz'ayical xewilal ec'to Comam Jesús yeb ebnaj iscuwym yul hune' nich'an beh xol ixim trigo. Caw xin xañohcha ebnaj yuxin oc ebnaj yik'alo iswi' ixim trigo, ischilnilo ebnaj ixim isc'uxu'. 2 Hayet yilni ebnaj fariseo hune' tu', yalni ebnaj tet Comam:

—Ilc'anab tzet chu ebnaj hacuywom tilah, lañan yinilo ebnaj iswi' ixim trigo isc'uxu'. Yaja' xin caw txahul comunla yiñ istz'ayical xewilal, xi ebnaj.

3 Istak'wi Comam tet ebnaj:

—¿Tom mañto cheyil yul Yum Comam Dios yiñ tzet yak'le naj rey David yet caw chiñohcha naj yeb ebnaj tzujan yintaj? 4 Naj David tu' octo naj yul yatut Comam Dios iswahnito naj ixim pan haltebilxa tet Comam Dios, iswahnipaxo ebnaj tzujan yinta naj tu' ixim. Wal xin hañc'añe ebnaj

sacerdote chu iswahni ixim. ⁵ ¿Tom maŕto cheyil-paxo yirñ isley naj Moisés yirñ tzet yu ebnaj sacerdote ay yul yatut Comam Dios? Ebnaj sacerdote tu' mach chixew ebnaj yirñ tz'ayic xewilal, yaja' mach chaco ebnaj ismul yul sat Comam Dios yirñ hune' tu'. ⁶ Yaja' yirñ caw yeli chiwalan teyet: Haninti'an ec'bal welapnojan sata yatut Comam Dios. ⁷ Tzettam sak'al tato chitxumchalo heyu bay chal yul Yum Comam Dios haca' ti': "Ha' hune' chiwochehan tato chitz'ay hec'ul yirñ heyet anmahil, maŕñetaj heñusni no nok' yirñ xahanbalil wetan,"* xiayoj. Ta chetxum hune' ti' mach chimcheyala tato ay ismul ebnaj, wal xin mach ismul ebnaj yirñ hune' ti'. ⁸ Wal Hanin Ak'bilintijan texol yu Comam Dios chu walnihan yirñ tzet cheyu yirñ istz'ayical xewilal,* xi Comam tet ebnaj fariseo tu'.

Yak' cawxo Comam Jesús hune' naj camnajilo hune' isk'ab

(Mr 3:1-6; Lc 6:6-11)

⁹ Lahwi tu' isto Comam Jesús, yocto Comam yul iscapilla ebnaj Israel, ¹⁰ ha' tu' xin ayicto hune' naj camnajilo hune' isk'ab. Yuñe yoc ebnaj fariseo ak'oc'ule yirñ Comam, yuxin isk'ambe ebnaj tet Comam:

—¿Chimyu jak'ni cawxo hunu anma ya'ay yirñ istz'ayical xewilal? xi ebnaj tet Comam.

¹¹ Istak'wi Comam tet ebnaj:

—K'inalo ta ay hunujex chitohc'ay hunu heme' yul hunu c'uh yirñ istz'ayical xewilal, ¿mataxca mach chexto heyik'ahti no'? ¹² Hajxam hunu

* **12:7** Os 6:6 * **12:8** Dt 23:25; 1Sa 21:1-6

anma, to ec'balto yelapno sata no' me' tu', yuxin chisje cowatx'en hunu tzet ye tu' c'ul yir̃ istz'ayical xewilal, xi Comam.

¹³ Lahwi tu' yalni Comam tet naj camnajilo hune' isk'ab tu':

—Toholbañelto hak'ab, xi Comam. Hayet istoholbañenilto naj isk'ab tu', iswatx'icanilo.

¹⁴ Hayet yilni ebnaj fariseo hune' tu' yelti ebnaj yul capilla, yoc ebnaj islahti'rien isba yir̃ tzet chu yak'ni camo ebnaj Comam Jesús.

Huntek'an tzoti' halbilcano yir̃ Comam Jesús

¹⁵ Hayet yabenilo Comam Jesús hune' tu', isto Comam. Caw hantañe anma oc tzujno yinta Comam; yak'ni cawxo Comam macta ya'ay. ¹⁶ Yalni Comam tet anma ta mach chispujbac'o yir̃ tzet iswatx'e Comam. ¹⁷ Hac tu' yu yijnicano isba tzet tz'ibñebilcano yu naj Isaías, ischejab Comam Dios yet payat, bay chal haca' ti':

¹⁸ Ha' naj ti' inchejaban sic'bilico wuhan, caw xahan ay wuhan, caw chintzalahan yir̃ naj. Chiwacojan Wespírituhan yir̃ naj cat ispujbanic'o naj tetej coñob mach Israelo yir̃ tzet chu isbeybalñen istoholal.

¹⁹ Machi mac yeb chiah howal yu naj, machi xin caw chiel yaw naj yir̃ caw ip, machipaxo chiel yaw naj yulaj calle.

²⁰ Ay anma caw c'anch'an haca' te' ah k'ahnatoj, maca haca' te' tah toñe chimutz'mun xaj k'a' yir̃ hac tu' yehi. Yaja' ha' naj xin chicolwa yir̃; mach chislah naj yetantoj. Hac tu' chute naj masanta chioc sunil yalañ istoholal yu naj.

21 Sunilej coñob chicawxi isc'ul yirñ naj, * xiayoj.

Hallaxi tato naj matzwalil chiak'ni yip Comam Jesús

(Mr 3:20-30; Lc 11:14-23; 12:10)

22 Yilaxto hune' naj mach chu yilni yeb mach chu istzotel yu ischejab naj matzwalil tet Comam Jesús, yak'ni cawxo Comam naj. Hac tu' xin yu ishajlo isbak'sat naj, istzotelpaxocañ naj. 23 Sunil anma ilni hune' tu' caw c'ayilo isc'ul, yalni haca' ti':

—¿Ham naj ti', titna yirñ yuninal naj rey David echmabil yul ju? Xi anma.

24 Yaja' hayet yaben ebnaj fariseo yalni anma hune' tu', yalni ebnaj:

—Hune' naj ti' chilo naj ischejab naj matzwalil yirñ anma, yaj yu ayco yip naj Beelzebú, naj yahawil ebnaj ischejab naj matzwalil yirñ naj, xi ebnaj.

25 Wal Comam yohtaxa tzet chiec' yirñ isnabal ebnaj, yuxin yal Comam:

—K'inalo ta chispoh isba anma yul hunu niman coñob, hune' coñob tu' yirñ añemi chipax yip. Maca ta hunu coñob maca hunu ñahil anma chispoh isba cat yanico howal yirñ hunun, caw yirñ añemi chitañiloj. 26 Hac tu' ye naj matzwalil, ta chaco naj howal yirñ yet matzwalilal, yirñtic'a naj chaco howal. ¿Tzet xin chu yik'ni yip naj yirñ haca' tu'? 27 Hex ti' cheyala tato yu naj yahawil ebnaj matzwalil yuxin chiwilojan ischejab naj matzwalil yirñ anma. Ta hac tu', ¿mac xin chiak'ni yip ebnaj tzujan yirñ hecuybanil yet

* 12:21 Is 42:1-4

chinilo ebnaj ischejab naj matzwalil yirñ anma? Yuxin ha' ebnaj tu' chiyenilo teyet tato mach c'ulo tzet cheyal wirñan. ²⁸ Yaja' ta yu Yespíritu Comam Dios chiwilojan ischejab naj matzwalil yirñ anma, ha' chalniloj tato ayxac'o yip Comam Dios texol.

²⁹ K'inalo hunu naj yahaw ña caw ay yip, machi hunu mac chu yocto yul yatut naj cat yelk'anilto tzet ay naj. Yaja' ta chic'albalax naj, wal tu' chu yilaxilo tzet ay naj.

³⁰ Ha' mac mach ayoco wetbihojan ayco ishowal wirñan. Ha' mac mach chicolwa yanico anma yul ink'aban, ha' istzumbenilo anma tu' ha' chu.

³¹ Yuxin chiwalan teyet, tzijxañe istx'ojal yeb ismul anma chacoj, ay nimanc'ulal yirñ yu Comam Dios. Yaja' tato ay hunu mac tx'oj istzotel yirñ Comam Espíritu Santo, hune' mac tu' matxa bak'inal ay nimanc'ulal yirñ. ³² Tato ay hunu mac tx'oj istzotel wirñan, Hanin Ak'bilintijan texol yu Comam Dios, ayto nimanc'ulal yirñ. Wal mac tx'oj istzotel yirñ Comam Espíritu Santo matxa nimanc'ulal yirñ, yirñ hune' cotiempohal ti' yeb yirñ hune' chihul cosataj, xi Comam.

Ha' tzet ay yul janma ha' chal coti'

(Lc 6:43-45)

³³ Yalnipaxo Comam Jesús:

—K'inalo hunu te te' c'ul, c'ul sat te' chak'a, wal te' machiswalil, mach c'ulo sat te' chak'a. Yuxin yirñ sat te te' chicotxumu tzet te'al te'. ³⁴ Hex ti' lahanex yeb no' laba, caw tx'ojex. ¿Tzet chu heyalni tzoti' c'ul tato tx'oj ayayto yul heyanma? Wal xin ha' tzet ayayto yul heyanma ha' chal heti'. ³⁵ Ha' mac isc'ulal ayayto yul yanma, c'ul tzoti' chala,

haxa' mac istx'ojal ayayto yul yanma, ha' istx'ojal chala. ³⁶ Yaja' chiwalan teyet, yet chilni Comam Dios yin' tzet chielico anma, sunil mac chilchahoti yin' tzettaj tzoti'al chielti yul isti', waxa'rica comon tzoti'. ³⁷ Hatatic'a haca' hetzoteli hac tu' chu yilni Comam Dios yin' tzet chexelicoj, ta ay hemul maca machi hemul yin' tzet cheyala, xi Comam.

Anma tx'oj chisk'an c'aybalc'ule yila'

(Mr 8:12; Lc 11:29-32)

³⁸ Yet hunel tu', ay huntex'an ebnaj cuywawom yin' isley naj Moisés yeb ebnaj fariseo halni tet Comam:

—Mam cuywawom chijochehañ chaye hunu c'aybalc'ule jila'añ, xi ebnaj.

³⁹ Istak'wi Comam tet ebnaj:

—Hex ayex yul hune' tiempohal ti' caw tx'ojexcanoj, caw mañ'omex tet Comam Dios. Chek'an c'aybalc'ule heyila', hune' chiyenilo ishelanil yip Comam Dios. Yaja' hune'ñe c'aybalc'ule chiak'lax heyila', ha' ton hune' haca' tzet yak'le hune' ischejab Comam Dios yet payat chiyij Jonás, ha' chiak'lax heyila'. ⁴⁰ Naj Jonás tu' oxeb tz'ayic yeb oxeb ak'bal ayayto naj yul isc'ul hune' no' niman cay. Haca' yak'le naj tu', hac tu' chiwak'lehan, Hanin Ak'bilintijan texol yu Comam Dios. Oxeb tz'ayic yeb oxeb ak'bal chinmujihan yul tx'otx'. ⁴¹ Yet isbey naj Jonás tu' yalno Istzoti' Comam Dios tet anma ay yul coñob Nínive isbejnicano anma iswatx'en istx'ojal.* Wal tzet chiwalti'an ec'balto yelapno sata tzet yal naj Jonás tu', yaja' mach chebejcano hetx'ojal. Yuxin

* **12:41** Jon 3:3-10

hayet islahobal tz'ayic ha' hune' coñobal anma ah Nínive tu' ha' chihalnilo hemul. ⁴² Hacpax tu' yu ix reina ay yul ismajul tx'otx' Sabá, waxařica caw nahat ay ix yaja' masan hul ix yabe yitz'atil iswi' naj rey Salomón. Yaja' wal haninti'an ec'bal welapnojan sata naj rey Salomón tu', yaja' mach cheyaco yiř hec'ul yiř tzet chiwalan. Yuxin yet islahobal tz'ayic ha' caw ix reina tu' chihalnilo hemul,* ři Comam.

Ischejab naj matzwalil meltzo yul yehobal hunelxa

(Lc 11:24-26)

⁴³ Yalnipaxo Comam Jesús:

—K'inalo ta ay hunu ischejab naj matzwalil chiel yul yanma hunu anma. Lahwi yel naj tu' cat isto naj bey tx'otx' desierto issaya' bay chixewi, yaja' mach chiilcha bay chixew naj tu' yu. ⁴⁴ Lahwi tu' cat yec' yiř isnabal naj haca' ti': “Etzařem c'ul inmeltzohan baytic'a ayinan,” ři naj. Haxa yet chiapni naj xin cat yilni naj yanma hune' naj tu' haca' hunu řia machi yahaw, caw c'ul yecař k'alem yul. ⁴⁵ Hayet chilni naj hune' tu' xin cat isto naj yinoti hujwařixa yetbi caw ec'balto istx'ojal sataj, cat yocto ebnaj ehoyo yul yanma hune' naj tu'. Hune' naj bay chiocto ebnaj tu', caw ec'balto tx'oj chielico naj sata yet babelal. Haca' chak'le hune' naj tu' hac tu' chak'le hunttek'an anma caw tx'oj ti' tinař, ři Comam.

Apni ismi' yeb yuxta Comam Jesús ilwal yiř
(Mr 3:31-35; Lc 8:19-21)

* **12:42** 1Re 10:1-10

⁴⁶ Hayet lañan istzotel Comam tet anma tu' xin yapni ismi' Comam yeb ebnaj yuxta Comam, is-cancano isti' ispultahil te' ña bay ayicto Comam. Yaja' xin yoche ismi' Comam yeb ebnaj yuxta tu' tzotelo tet. ⁴⁷ Yuxin yal hune' naj tet Comam:

—Mamin, ayc'o hami' yeb ebnaj hawuxta istiaña, choche ebnaj tzotelo tawet yalni, xi naj.

⁴⁸ Yaja' tak'wi Comam tet naj:

—¿Mac xin inmi'an yeb wuxtatun hawalni? xi Comam. ⁴⁹ Lahwi tu' isyenito Comam tet ebnaj iscuwym, yalni Comam:

—Ha' huntেক'an anma ti' ha' haca' inmi'an yeb haca' wuxtajan. ⁵⁰ Yuto ha' mac chiyijen tzet chal Inmaman ay yul satcañ, ha' ton wuxtajan, wanaban yeb inmi'an, xi Comam.

13

Yechel yin hune' naj txihom trigo

(Mr 4:1-9; Lc 8:4-8)

¹ Yiritic'a hune' tz'ayic tu', elti Comam Jesús yul ña, isto Comam isti' ha' lago, yay tz'oño Comam bey tu'. ² Yaja' caw tx'i'al anma apni isc'atañ Comam, yuxin ahto Comam yul hune' te' barco, yay tz'oñoj, yichico Comam iscuwahi. Wal anma xin cancano isti' ha' lago tu'. ³ Caw tx'i'al yechel yaco Comam yet iscuyni Comam anma tu', yichico Comam yalni haca' ti':

—Yet hunel ay hune' naj to txiho trigo. ⁴ Yet lañan istxihni naj ixim, ay ixim apni c'atna yul beh, yapni no' ch'ic issic'nocañ ixim. ⁵ Aypaxo ixim apni c'atna xolaj ch'en ch'en bay machi bin tx'o tx'otx'; caw xin pet ahilo ixim yuto mach

nahato yehayto yich tx'otx'. ⁶ Yaja' haxa yet yahilo tz'ayic yet yik'nicañ yip k'a' istajilo ixim yuto machi bay yayto isxe' ixim yu ch'en ch'en tu'. ⁷ Aypaxo ixim apni c'atna xol yirañatil te' tx'ix, hayet isch'ibcañ ixim isch'ibpaxocañ te' tx'ix tu', hac tu' yu istz'onbayo ixim xol te'. ⁸ Walpaxo ixim hirañat apni xol tx'o tx'otx' caw c'ul, caw sak'al yu isch'ibcañ ixim. Yet yak'ni ixim sat, ay ixim ak'ni cien yirañ hunun iswi', aypaxo ixim sesenta, aypaxo ixim yak' treinta sat yirañ hunun iswi'. ⁹ Maquex cheyabe hune' ti' ak'we heyanna hetxumniloj, xi Comam tet anma.

Tzet yirañ xin yechelñe yaco Comam Jesús yet is-cuywahi

(Mr 4:10-12; Lc 8:9-10)

¹⁰ Lahwi tu' ishitzico ebnaj iscuymom Comam Jesús isc'atañ, isk'amben ebnaj:

—Mamin, ¿tzet yirañ yuxin yet chacuyni anma yechelñe chawak'balñe tet? xi ebnaj.

¹¹ Istak'wi Comam:

—Teyetñe chak' Comam Dios heyohtañelo huntেক'an tzet ye tu' ewan yehi, yuñe hetxumni yirañ tzet chu heyoc yul isk'ab Comam Dios. Walpaxo tet huntেক'anxa anma xin mach ch'ak'lax yohtañeloj. ¹² Yuto ha' mac chiyoche chiyohtañelo huntেক'an ti' caw ec'naxa chiak'lax yohtañeloj, wal mac mach choche yohtañeloj, ha' nich'an etza chitxumcha yu chiilaxilo tet. ¹³ Yuxinto yechelñe chiwacojan yet chincuynihana anma. Wal xin waxañca chiyila, yaja' mach chinachalo yu, waxañca chabe yaja' mach chitxumchalo yu. ¹⁴ Yuto lañan yijni isba tzet tz'ibñebilcano yirañ huntেক'an anma ti' yu naj

Isaías, ischejab Comam Dios yet payat, bay chal haca' ti':

Wal huntেক'an anma ti' waxańca chabe, yaja' mach chitxumchalo yu. Waxańca chiyila, yaj mach chináchalo yu.

¹⁵ Yuto huntেক'an anma ti' caw nohna yanma yu ec'najil, haca'tańe majan istxiquin yuxin mach chabe. Haca'tańe mutz'an sat yuxin mach chila, hac tu' xin mach chitxum isba cat yanico isba yul ink'aban cat yańchahi, xiayoj.*

¹⁶ Yaja' walex ti' sak'al heyet, yuto haban istxumchalo heyu yet cheyilni, yeb xin yet cheyabeni haban henaniloj. ¹⁷ Yiri caw yeli chiwalan teyet, caw tx'i'al ebnaj ischejab Comam Dios, yeb tx'i'al mac c'ul isbeybal yet payat yoche' yila' huntেক'an cheyil ti', yaja' mach yil ebnaj. Yochepaxo ebnaj yabe huntেক'an cheyabe ti' yaja' mach yabe ebnaj, xi Comam.

Yal Comam Jesús yiri tzet chal yelapno naj txihom trigo

(Mr 4:13-20; Lc 8:11-15)

¹⁸ Yalni Comam Jesús:

—Tinań xin chiwalan teyet yiri tzet chal yelapno naj txihom trigo. ¹⁹ Ixim hińat ayc'ay yul beh, yechel yeco ixim yiri mac chiaben Istzoti' Comam Dios, yaja' mach chitxumchalo yu. Lahwi tu' cat yul naj matzwalil yinolo Istzoti' Comam tu' yul yanma. ²⁰ Haxa ixim hińat ayc'ay yibań ch'en ch'en, yechel hune' tu' yiri anma chiaben Istzoti' Comam Dios cat ischahni yul yanma yiri tzalahilal.

* **13:15** Is 6:9-10

²¹ Yaja' machi caw yip yanma yin yet Comam, yeb xin mach hunelñeho chucanico yin yanma, yuxin hayet chihul ilwebal yin yu Istzoti' Comam, yin añe chicabconcañ isc'ul cat ismeltzo yintaj.

²² Haxa ixim hiñat apni c'atna xol yinñatil te' tx'ix, yechel hune' tu' yin mac chiaben Istzoti' Comam Dios yaja' yu ec'balto chaco yanma yin k'alomal yeb yin tzet ay yul sat yibañik'inal ti', yuxin chilo yanma yin Istzoti' Comam Dios. Ha' huntেক'an anma tu' lahan haca' ixim trigo tz'onbayoj, machi sat yak'a. ²³ Wal ixim hiñat ayc'ay bay caw c'ul tx'o tx'otx' xin, yechel hune' tu' yin anma chiaben Istzoti' Comam Dios, caw c'ul istxumni cat ischahni yul yanma, lahan yeb ixim trigo caw niman sat yacoj. Ay mac haca' ixim trigo yak' cien sat yin hunun iswi', aypaxo mac haca' ixim yak' sesenta, aypaxo xin mac haca' ixim yak' treinta yin hunun iswi', xi Comam.

Yechelyin huntেক'an te' ch'im ahilo xol ixim trigo

²⁴ Yalnipaxo Comam Jesús hune' yechel haca' ti':

—Hayet chioc Comam Dios yahawilo anma, lahan haca' chak'le hunu naj chitxihni ixim hiñat trigo caw c'ul sat istx'otx'. ²⁵ Yaja' yet ak'balil xin yet wayo chu naj, yapni hune' naj ayco ishowal yin naj, istxihnayo naj yinñatil te' ch'im haca' ixim trigo tu' xol ixim, isto naj. ²⁶ Lahwi tu' isch'ibcañ ixim, haxa yet yoc iswi' ixim isyenilo isba te' ch'im tu' xol ixim. ²⁷ Hayet yilni ebnaj munlawom hune' tu', isto ebnaj yalno tet naj yahaw munil haca' ti: “Mamin, caw c'ul ixim hiñat trigo cachbey hatxihayoj, yaja' ¿tzet yin xin caw ay te' ch'im ahilo xol ixim?” xi ebnaj. ²⁸ Istak'wi naj: “Ham hunu mac

ayco ishawal wiñan txihnayo yiñatil te' ch'im xol ixim,” xi naj. Isk'ambenpaxo ebnaj ismunlawom naj tu': “Ta chisje hac'ul choñtohañ cohoc'ocañariñ te' ch'im tu' xol ixim,” xi ebnaj. ²⁹ Yalni naj: “Machoj, yuto ta chehoc'cañ te' ham hun ixim trigo chehoc'cañ yinta te'. ³⁰ Wal xin ch'ibojabna te' xol ixim, hatojab yet chiapni istempohal bay chic'uplaxcañ ixim cat yah te', cat walnihan tet ebnaj inmunlawoman tato chisc'upcañ ebnaj te' xol ixim cat isc'alnayo ebnaj te' yiñ hunun yachan, lahwi tu' cat isñuslaxto te'. Wal ixim trigo tu' xin chic'ubalaxto ixim yul inc'uñahan,” xi naj yahaw munil tu', xi Comam.

*Yechel yiñ yiñatil te' mostaza
(Mr 4:30-32; Lc 13:18-19)*

³¹ Yanipaxico Comam Jesús yiñatil te' mostaza yechelo yet iscuylwahi, yalni Comam haca' ti':

—Chiwalpaxojan teyet yiñ tzet chu isch'ib isbisil anma chioc yul isk'ab Comam Dios, lahan haca' nich'an yiñatil te' mostaza chistz'un hunu naj sat istx'otx'. ³² Yiñ caw yeli, te' hiñat mostaza tu', ha' te' caw niñch'an xol te' hiñat, yaj haxa yet chiahilo te' cat isch'ibcañ te', ha' te' caw nimej chielico xol sunilej te' itah chitz'unlaxi. Te' mostaza tu' nimej chu te' yuxin chiapni no' ch'ic iswatx'e yatut xol isk'ab te', xi Comam.

*Yechel yiñ yañal ixim pan
(Lc 13:20-21)*

³³ Yanipaxico Comam Jesús yañal ixim pan yechelo yet iscuylwa tet anma, yalni Comam tet anma tu':

—Chiwalpaxojan teyet yirñ tzet chu isch'ib is-bisil anma chaco isba yul isk'ab Comam Dios. Lahan haca' nich'an yañal ixim pan chaco hunu ix ix xol oxeb mal ixim harina. Haxa yet chissomni ix ixim cat issipc'a ixim yu nich'an yañal chioqui, xi Comam.

*Tzet yirñ yechelñe yak' Comam Jesús tet anma
(Mr 4:33-34)*

³⁴ Yet yak'ni Comam Jesús Istzoti' Comam Dios iscuycu anma naba yechelñe bay tzotel Comam, ³⁵ yuñe yijni isba tzet tz'ibñebilcano yu ischejab Comam Dios yet payat, bay chal haca' ti':

Yechelñe chiwak'an tet anma yet chintzotelan.

Chiwalan tet yirñ huntex'an tzet ewan yehi yichitaxtic'a iswatx'i yul sat yibañk'inal ti,*
xiayoj.

*Oc Comam Jesús yala' yirñ tzet chal yelapno te'
ch'im ahilo xol ixim trigo*

³⁶ Lahwi tu' istak'li Comam Jesús tet anma chiaben tzet chal tu', yocto Comam yul ña yeb ebnaj iscuycu. Ishitzico ebnaj isc'atañ Comam isk'amben ebnaj yirñ tzet chal yelapno te' ch'im ahilo xol ixim trigo. ³⁷ Yalni Comam tet ebnaj xin:

—Naj txihom trigo yechel yeco naj wiñan, Hanin Ak'bilintijan texol yu Comam Dios. ³⁸ Ha' tx'o tx'otx' bay txihlaxayo ixim trigo, yechel anma ay yul sat yibañk'inal ti' ye tx'otx'. Ha' ixim hiñat c'ul, yechel anma chioc yul isk'ab Comam Dios ye ixim. Haxa te' ch'im ch'ibcañ xol ixim trigo tu', yechel anma ayco yul isk'ab naj matzwalil ye te'. ³⁹ Naj txihnayo te' hiñat ch'im

* 13:35 Sal 78:2

xol ixim trigo tu', yechel naj matzwalil ye naj. Yet chic'uplaxcañ ixim trigo tu' xin, yechel yin yet chilahwi yul sat yibañk'inal ti'. Haxa ebnaj chic'upni ixim trigo tu', yechel ebnaj ángel ye ebnaj. ⁴⁰ Haca' yet chiilaxilo te' ch'im xol ixim trigo cat isñuslaxto te', hac tu' chiutelax anma mach chaco isba yul isk'ab Comam Dios yet chitañ yul sat yibañk'inal ti'. ⁴¹ Hanin Ak'bilintijan texol yu Comam Dios ti', chinchejtijan ebnaj ángel iscutxbaco sunil mac ch'ak'ni ayc'ayo yet anmahil yeb mac istx'ojalñetic'a chiswax'e, ⁴² cat yalaxto huntex'an mac tu' xol k'a k'a' bay ch'ok'i, cat isñetx'la yeh yu isya'il. ⁴³ Wal mac chiyijen tzet chal Comam Dios xin, chitzejla haca' tz'ayic yul isk'ab Comam Dios ay yul satcañ. Maquex cheyabe hune' ti' ak'we heyanna hetxumnij, xi Comam.

Yechel yin hune' k'alomal mujbil

⁴⁴ Yalnipaxo Comam Jesús:

—Anma ch'oc yul isk'ab Comam Dios, lahan yeb hune' k'alomal caw ay istohol mujbil yul tx'o tx'otx' chiilcha yu hune' naj, lahwi tu' cat ismujnipaxo naj. Caw xin chitzala naj yin hune' k'alomal tu' cat isto naj istxoñoto sunil tzet aya yuñe islok'ni naj hune' tx'otx' bay mujan hune' k'alomal tu', xi Comam.

Yechel yin hune' ch'en perla caw ay istohol

⁴⁵ Yalnipaxo Comam Jesús:

—Ha' anma ch'oc yul isk'ab Comam Dios, lahan haca' hunu naj txoñwom chiec' sayno huntex'an ch'en ch'en caw ay istohol chiyij *perla*. ⁴⁶ Haxa yet chiilcha hunu ch'en yu naj, chito naj istxoñoto

sunil tzet aya cat islok'ni naj hune' ch'en perla caw c'ul tu', xi Comam.

Yechel tx'añ hac' ik'omati cay

⁴⁷ Yalnipaxo Comam Jesús:

—Chiwalpaxo jan teyey, ha' anma chioc yul isk'ab Comam Dios, lahan yeb hune' tx'añ hac' ik'omati cay chayto hunték'an ebnaj xol ha ha'. Yet chibejlaxayto tx'añ xol ha' caw tx'i'al no' cay chioc yul tx'añ. ⁴⁸ Haxa yet chinohilo tx'añ yu no' xin cat yilaxahti tx'añ xol ha', cat yay tz'oñino ebnaj isti' ha', cat issic'nilo ebnaj no' c'ul cat yanayto ebnaj no' yul motx. Haxa no' mach c'uluj xin, chisk'ojto ebnaj no'. ⁴⁹ Hac tu' chak'le anma yet chilahwi hune' yul sat yibañk'inal ti'. Chul ebnaj ángel ispholo anma tx'oj xol anma c'ul. ⁵⁰ Ha' hunték'an anma tx'oj chialaxto xol k'a k'a', ha' bey tu' xin chiok' yin cat isñetx'la yeh yu isya'il, xi Comam.

Ac' cuybanile yeb xil cuybanile

⁵¹ Lahwi tu' isk'amben Comam Jesús tet ebnaj iscuwym haca' ti':

—¿Chimhetxum sunil hunték'an yechel chiwalti'an? xi Comam. Istak'wi ebnaj:

—Ho' Mamin, xi ebnaj.

⁵² Yalni Comam xin:

—Ha' chalilo hune' ti', ta ay hunu naj cuywawom yin ley chicuywa yin tzet chu yoc anma yul isk'ab Comam Dios, lahan haca' hunu naj mame yohta yocnico hunték'an tzet ye tu' ac' yu yeb hunték'an tzet ye tu' xilxa c'uwan yul isc'uwanbal, xi Comam.

*Apni Comam Jesús bey Nazaret
(Mr 6:1-6; Lc 4:16-30)*

⁵³ Lahwi yalnicanano Comam hunték'an cuyban-ile tu', isto Comam. ⁵⁴ Yet yapni Comam yul iscoñob, iscuyni Comam anma yul iscapilla ebnaj Israel. Hayet yaben anma istzotel Comam, caw c'ayilo isc'ul, yuxin yal anma haca' ti':

—¿Bay chitit ishelanil hune' naj ti', yeb bay chitit iscañil ye naj iswatx'en hunték'an c'aybalc'ule ti'?

⁵⁵ Naj ti' isc'ahol naj hutx'um te' ye naj, yebpaxo yunin ix María ye naj, yeb yuxta isba naj yeb naj Jacobo, naj José, naj Simón yeb naj Judas.

⁵⁶ Yebpaxo xin ebix yanab naj, coxol ti' ay ebix. ¿Baytaxca xin chitit ishelanil naj ti'? xi ebnaj yin Comam.

⁵⁷ Yuxin machi cam isc'ul anma yaben tzet chal Comam. Yalni Comam tet anma tu':

—Sunil bay xahan chiillax ischejab Comam Dios yu anma, yaja' wal yul iscoñob yeb yul yatut chiyahlaxi, xi Comam.

⁵⁸ Wal Comam xin mach tx'i'alo c'aybalc'ule isye Comam yul iscoñob tu', yuto mach chayto anma yul yanma yin Comam.

14

*Iscamical naj Juan anicañ ha' iswi' anma
(Mr 6:14-29; Lc 9:7-9)*

¹ Yin hune' tiempohal tu' xin, yabelo naj rey Herodes, naj ayco gobernadoral bey Galilea, isbina Comam Jesús. ² Yuxin yal naj tet ebnaj chimunla yinta tu':

—Hune' naj chibina tu', ham naj Juan anicañ ha' iswi' anma itzitzbicañ, yuxin ay yip naj iswaxt'en huntেক'an c'aybalc'ule tu', xi naj.

³ Yal naj hune' tu' yuto ha' naj chejni tzablaxoyo naj Juan, isc'allaxayo naj yu ch'en cadena, yalaxicto naj yul preso yuto cachwa naj yin naj Herodes tu' yet yik'nicañ naj ix Herodías, yixal yuxtaj, ha' ton naj Felipe. ⁴ Caw xin tx'i'al el yal naj Juan tu' tet naj Herodes haca' ti':

—Mach c'ulo hawik'ni yixal hawuxtaj, xi naj.

⁵ Wal naj Herodes tu' xin caw yoche naj ispotx'o' naj Juan, yaj xin xiw naj yuto sunil anma chalni tato ischejab Comam Dios ye naj. ⁶ Yet hunel xin, yec'tze naj Herodes hune' k'iñ yuto tz'ajna naj yin ishabilal,* caw xin tx'i'al anma yawte naj. Yin k'iñ tu', cañalwi ix yunin ix Herodías yin sat naj Herodes yeb yin sat sunil anma awtebil. Caw xin c'ulch'an yu iscañalwi ix yil naj, ⁷ yuxin yalte naj tet ix tato chak' naj tzijxañe tzet chisk'an ix. ⁸ Yalni ismi' ix tet tato chisk'an ix iswi' naj Juan; yuxin yal ix tet naj Herodes tu':

—Ha' iswi' naj Juan anicañ ha' iswi' anma chawak' wetan yul hunu plato, xi ix tet naj.

⁹ Hayet yaben naj Herodes hune' tu' yoc bisc'ulal yin isc'ul naj. Yaja' yu xayal naj yin sat sunil anma tet ix tato chak' naj tzet chisk'an ix, yuxin yal naj ta chiak'lax tzet chisk'an ix tu'. ¹⁰ Ischejni naj yilaxolo iswi' naj Juan yul preso. ¹¹ Hac tu' xin yu yilaxti iswi' naj yul hune' plato yak'lax tet ix, yinito ix tet ismi'.

* **14:6** Mr 6:19-20

¹² Lahwi tu' xin, yapni ebnaj iscuwymom naj Juan tu', yinito ebnaj isnimanil naj mujlaxoj. Tzujan tu' isbey ebnaj yalno tet Comam Jesús.

Yet yak'ni wa'o Comam Jesús howeb mil ebnaj winaj

(Mr 6:30-44; Lc 9:10-17; Jn 6:1-14)

¹³ Hayet yaben Comam Jesús ta cam naj Juan yel Comam bey tu', yahto Comam yul hune' te' barco, yec' apno Comam isk'axepic'to ha' lago bay machi anma. Hayet yaben anma ay yulaj coñob xin tato to Comam, istopaxo anma yu yoj isti'la ha' bay chiapni Comam tu'. ¹⁴ Hayet yelti Comam yul te' barco tu' xin yilnitoj ta tenanxato anma yechmani. Istz'aycañ isc'ul Comam yiri anma, yak'ni cawxo Comam anma ya'ay ilaxto bey tu'. ¹⁵ Haxa yet lañanxa isk'ejbayo xin, ishitzico ebnaj iscuwymom Comam isc'atañ, yalni ebnaj tet Comam:

—Mamin, mak'ejbi lah yebpaxo xin machi te' ña bey ti', yuxin c'ulmi hachejnito anma ti' yulaj wayañbal cocawilal ti' islok'o tzet chislo, xi ebnaj.

¹⁶ Yalni Comam tet ebnaj:

—Mach yilalo chipaxto anma ti', ak'we tzet chislo, xi Comam.

¹⁷ Istak'wi ebnaj tet Comam:

—Mamin, caw hañcañe howeb ixim pan yeb cac'oñ cay coxol ti', xi ebnaj tet Comam.

¹⁸ Yalni Comam:

—Iweti ixim yeb no' cay tu' bey ti', xi Comam.

¹⁹ Lahwi tu' ischejni Comam anma cutxanico tu' tato chiay tz'oñino sat chek'an. Yinicañ Comam ixim howeb pan yeb no' cac'oñ cay, yah t'año Comam satcañ, yak'ni Comam yuch'andiosal tet

Comam Dios yirñ ixim yeb yirñ no'. Lahwi tu' isk'axponayo Comam ixim, yak'ni Comam ixim tet ebnaj iscuwom, yoc ebnaj yitxk'anoto ixim yirñ anma. ²⁰ Caw sunil anma wa'i hantatic'a caw yoche isc'ul, caw xin cablahoñebto motx nohcañ yirñ ixim matxa lahwi yu anma. ²¹ Caw howeb mil ebnaj winaj wa'i, wal ebix ix yeb niñte unin mach oc istz'ajo yirñ hune' isbisil tu'.

Yet isbelwic'o Comam Jesús yibañ ha ha'
(Mr 6:45-52; Jn 6:16-21)

²² Lahwi tu' xin, yalni Comam Jesús tet ebnaj iscuwom ta ch'octo ebnaj yul hune' te' barco yu ishabito ebnaj isk'axepxac'to ha' lago tu'. Wal Comam cancano Comam tak'lo tet anma. ²³ Hayet lahwi istak'licano Comam tet anma tu' xin, yahto Comam txahlo ischuquil istzalanil hune' witz. Ha' tu' xin ah ak'bal yirñ Comam. ²⁴ Wal ebnaj iscuwom Comam nahatxa chito ebnaj yibañ ha' lago tu', yaj xin ay hune' niman jak'ek' chimak'nicañ ha ha' sata te' barco tu'. ²⁵ Haxa yet lañanxa issajbilo xin istzujcha ebnaj yu Comam, belwito Comam yibañ ha ha' tu'. ²⁶ Hayet yilni ebnaj isbelwi Comam yibañ ha' isxiwcañ ebnaj, yah yaw ebnaj yu xiwquílal, yalni ebnaj:

—¡Hune' ti' ispixan camom! Xi ebnaj.

²⁷ Yalnicañ Comam:

—Mach chexxiwi, haninan, xi Comam.

²⁸ Yalni naj Pedro tet Comam:

—Mamin, ta hach hune' tu', hala ta chinbelwihan yibañ ha ha' ti' cat wapnihan bay ayach tu', xi naj.

²⁹ Yalni Comam tet naj xin:

—C'ultic'a, titañ, xi Comam.

Hayet yaben naj Pedro hune' tu', yel naj yul te' barco, isto naj isc'atañ Comam, yichico naj isbel yibañ ha'. ³⁰ Yaja' yet yilni naj isbili ha' tu' yu jak'ek' isxiwcañ naj, yichico naj isto xol ha', yah yaw naj tet Comam yiriñ caw ip:

—Mamin, colinan, xi naj.

³¹ Yiriñ añie xin oc ttabno Comam yiriñ isk'ab naj, yalni Comam tet naj:

—Hach ti' caw mach ayoco hawanma wiñan. ¿Tzet yiriñ xin macabconcañ hac'ul? xi Comam.

³² Haxa yet yahto Comam yul te' barco yeb naj, isliñi yec' jak'ek'. ³³ Wal sunil ebnaj ayicto yul te' barco tu' xin ay jahno ebnaj sata Comam, yalni ebnaj haca' ti':

—¡Yiriñ caw yeli hach ti' Isc'ahol Comam Dios hawehi! xi ebnaj tet Comam.

*Yet yak'ni cawxo Comam Jesús anma ya'ay bey coñob Genesaret
(Mr 6:53-56)*

³⁴ Hayet isk'axponic'to Comam Jesús yibañ ha' lago tu' yeb ebnaj iscuwom, yapni Comam yul ismajul tx'otx' Genesaret. ³⁵ Haxa yet yohtañenilo anma Comam xin, ispujbalaxic'o isk'umal Comam sunil yul ismajul tx'otx' Genesaret tu'. Caw xin hantañe anma ya'ay ilaxto tet Comam. ³⁶ Isk'anni anma tet Comam ta waxañca hañech'an isti' xil isk'ap Comam chistzab anma ya'ay, yuxin sunil anma ya'ay ttabni isti' xil isk'ap Comam tu' cawx-icanocañ.

15

Huntek'an tzet chietanto anma yul sat Comam Dios

(Mr 7:1-23)

¹ Yet hunel apni huntek'an ebnaj fariseo yeb ebnaj cuywawom yiri isley naj Moisés ilwal yiri Comam Jesús, ispeto ebnaj bey Jerusalén. Isk'amben ebnaj tet Comam:

² —¿Tzet yiri xin mach chisyije hacuywom ti' huntek'an chejbanile yet ebnaj jichmam? Yuto ebnaj hacuywom ti' mach chistx'ah ebnaj isk'ab yet chiwa' ebnaj,* xi ebnaj tet Comam.

³ Istak'wi Comam tet ebnaj:

—Haquexpax tu', ¿tzet yiri xin chemañ'o ischejbanil Comam Dios cheyijento ischejbanil anma? ⁴ Yuto chal yul Yum Comam haca' ti': “Ayojab yelapno hamam, hami' yul hasat. Mac chitz'acti'ri'en ismam maca ismi' yilal iscami,”* xiayoj. ⁵ Yaja' hex ti' cheyala tato mach yilalo iscolwa anma yiri ismam maca ismi' ta chiyal haca' ti': “Mam, mach chu incolwahan tawiri yuto ha' tzet ayinti'an yetxa Comam Dios ye wuhan,” ta xi. ⁶ Ha' mac chihalni haca' tu' matxa yilalo iscolwa yiri ismam maca ismi', heyalni. Yaja' yiri haca' tu' chemañ'o ischejbanil Comam Dios yu heyijento ischejbanil anma. ⁷ Wal xin nabrie cheyal heba c'ulal. Teyiri bay yalcano naj Isaías, ischejab Comam Dios yet payat yet yalnicano haca' ti':

* **15:2** Hune' yet chistx'ahni isk'ab ebnaj chitzotel yiri iscostumbre ebnaj Israel, chalni ta yet chistx'ahni isk'ab ebnaj chiel ismul ebnaj yu, hac tu' yalni yichmam ebnaj * **15:4** Ex 20:12

⁸ Huntek'an anma ti', isti'rie chinak'ni binahojan, yaja' wal yanma nahat yehilo wiřan.

⁹ Nabrie chala ta chiyo isba wetan, wal xin hařic'aře ischejbanil ebnaj winaj chak' ebnaj iscuylu' yet anmahil,* řiayoj, ři Comam Jesús.

¹⁰ Lahwi tu' yawtenti Comam anma isc'atař, yalni Comam tet anma tu':

—Abewej cat hetxumni yiri tzet chiwalti'an.

¹¹ Mařtaj tzet chiocto yul isti' anma, ha' chietanto yul sat Comam Dios, walxinto ha' istx'ořal chiahti yul isti', ha' chietanto yul sat Comam,* ři Comam.

¹² Ishitzico ebnaj iscuylu' Comam isc'atař, yalni ebnaj:

—Mamin, řmamxatxumu tato yet maxawalni hune' ti' machiwacař isc'ul ebnaj fariseo? ři ebnaj.

¹³ Istak'wi Comam:

—Sunil te te' mařtaj Inmaman ay yul satcař tz'unrie chihoc'laxcař. ¹⁴ Wal xin yila'xam ebnaj, lahan ebnaj haca' anma mach chu yilni cat yoc-paxo ebnaj yijbanpaxic'o anma mach chu yilni. K'inalo ta ay hunu naj mach chu yilni chixecnito hunuxa naj mach chu yilni, chisxecleto isba ebnaj iscawaril yul xab, ři Comam.

¹⁵ Yalni naj Pedro tet Comam haca' ti':

—Mamin, hal jetař tzet chalilo hune' maxawal tet ebnaj fariseo tu', ři naj.

¹⁶ Istak'wi Comam:

—řTom ha' hunex machi maxetxumpaxo yiri tzet mawaltu'an? ¹⁷ řTom mach heyohtajoj ta

* **15:9** Is 29:13 * **15:11** Mt 15:17-20

sunil tzet chiocto yul isti' anma yul isc'ul chi-apni, chilahwi tu' xin cat yel yiriñ? ¹⁸ Yaja' ha' tzoti' chiahti yul isti' anma, yiriñ yanma chitita, ha' xin huntেক'an tu' chietanto yul sat Comam Dios. ¹⁹ Yuto yul yanma anma chipitzc'ati sunil istx'ojal haca' potx'wal, ixloj, winajloj, elek', lek'ti'al, yeb buchwal. ²⁰ Ha' ton huntেক'an tu' chietanto anma yul sat Comam Dios, yaj wal hune' yet mach chicotx'ah cok'ab yet choñoc wa'oj, ischejbanil ebnaj winaj yehi, mach chetato janma yul sat Comam Dios, xi Comam Jesús.

*Hune' ix ix mach Israelo yayto yul yanma yiriñ
Comam Jesús*

(Mr 7:24-30)

²¹ Lahwi tu' xin isto Comam Jesús yul ismajul tx'otx' Tiro yeb tx'otx' Sidón. ²² Bey tu' ay hune' ix ix ah Cananea, mach Israeloj. Apni ix yila' Comam Jesús, yalni ix yiriñ caw ip:

—Mamin, hach yuninal isc'ahol naj David, tz'ayojab hac'ul wiñan. Ay hune' nich'an wuninan caw chietalax yu ischejab naj matzwalil, caw xin chiec'ya' yanma ix yu naj, xi ix tet Comam.

²³ Yaja' xin machi tak'wi Comam tet ix, yuxin hitzico ebnaj iscuwym Comam tu' isc'atañ, yalni ebnaj:

—Mamin, hal tet ix paxojabto ix haxinwal chis-bej ix yel yaw jiriñ, xi ebnaj tet Comam.

²⁴ Istak'wi Comam:

—Tetñe anma Israel chejbilintijan yu Comam Dios, yuto lahan anma tu' haca' no' me' c'aynatoj, xi Comam tet ebnaj.

²⁵ Yaja' hitzico ix, yay jahno ix sata Comam, yalni ix:

—Mamin, colwahañ nino wiñan, xi ix.

²⁶ Yalni Comam tet ix:

—Mach c'ulo ta ch'ilaxilo tzet chislo ebnaj uninale cat yak'lax tet metx tx'i', xi Comam.

²⁷ Yalnipaxo ix:

—Ho' Mamin yeli, yaja' metx tx'i' tu' chi-tic'a-yicañ metx isk'al isti' ebnaj uninale chiayc'ay yalañ meña yet chiwa' ebnaj, xi ix tet Comam.

²⁸ Lahwi tu' xin, yalni Comam tet ix:

—Miyay, caw ayco hawanma yiñ Comam Dios, yuxin yubojab haca' choche hac'ul, xi Comam. Yiññaena tu' xin iscawxicañ nich'an yunin ix tu'.

Caw tx'i'al anma ya'ay cawxicanocañ yu Comam Jesús

²⁹ Yel Comam Jesús bey tu', isto Comam isti' ha' lago Galilea, ha' tu' xin ahto Comam yiñ hune' woñan, yay tz'orño Comam bey tu'. ³⁰ Caw xin hantañe anma apni isc'atañ Comam. Ay mac ik'ñe anma ya'ay yeb ay mac ik'ñe anma mach chu yeq'ui, yeb anma mach chu yilni, yeb anma tx'oj ye isk'ab, yeb anma mach chu istzoteli; yalax-ayo sunil anma tu' yich yoj Comam. Sunil anma tu' xin cawxicanocañ yu Comam. ³¹ Hayet yilni anma hune' tu' caw c'aycanilo isc'ul yuto yak' tzotelo Comam anma mañtic'a chu istzoteli, yeb-paxo anma tx'oj ye isk'ab watx'icaniloj. Isbel-wipaxocañ anma mañtic'a chu yeq'ui, yeb anma mañtic'a yu yilni hajlocanocañ issat yu Comam. Yu hune' tu' caw sunil anma yak' tzalaho isc'ul yiñ Comam Dios, isDiosal Israel.

*Cañeb mil ebnaj winaj wa' yu Comam Jesús
(Mr 8:1-10)*

³² Lahwi tu', yawtenti Comam ebnaj iscuwymom isc'atañ, yalni Comam tet ebnaj:

—Caw chitz'ay inc'ulan yiñ huntek'an anma ti' yuto isyoxebxa tz'ayic yehic'o inc'atañan, matxa xin tzet chislo. Mach chisje inc'ulan inchejatojan yatut yuto tato mach chiwa'i, chalotaxca ispaxilo yip yulaj beh, xi Comam.

³³ Yalni ebnaj iscuwymom Comam tet:

—Mamin, caw tx'i'al anma lah, ¿baytu'wal xin choñtohañ jik'atijañ tzet chislo anma ti'? Yuto bay ayori ti' machi te' ña, xi ebnaj.

³⁴ Isk'amben Comam tet ebnaj:

—¿Hayeb ixim pan coxol ti'? xi Comam. Istak'wi ebnaj:

—Hujebch'an ixim yeb hayc'oñ no' niñte cay, xi ebnaj.

³⁵ Yalni Comam tet anma tato chiay tz'oñno sat tx'otx'. ³⁶ Lahwi tu' xin yinicañ Comam ixim hujeb pan yeb hayc'oñ no' cay tu', yak'ni Comam yuch'andiosal tet Comam Dios. Lahwi tu' isk'axponayo Comam ixim, yak'ni Comam ixim yeb no' cay tu' tet ebnaj iscuwymom, yoc ebnaj yitxk'anto yiñ anma. ³⁷ Caw sunil anma wa'i hantatic'a yoche isc'ul, caw xin hujebto motx no-hcañ yiñ ixim matxa lahwi yu anma. ³⁸ Xol sunil anma wa' tu' cañeb mil isbisil ebnaj winaj, machi xin oc ebix ix yeb niñte unin istz'ajo yiñ hune' isbisil ti'. ³⁹ Lahwi istak'licano Comam Jesús tet anma, yahto Comam yul hune' te' barco, isto Comam yul ismajul tx'otx' Magdala.

16

Isk'an ebnaj fariseo yeb ebnaj saduceo c'aybalc'ule yila'

(Mr 8:11-13; Lc 12:54-56)

¹ Ay hunték'an ebnaj fariseo yeb ebnaj saduceo apni ilno Comam Jesús yuñe yilwen ebnaj Comam. Yalni ebnaj tet Comam ta chisye hunu c'aybalc'ule chiyeniloj tato caw yeli ha' Comam Dios chejñeti Comam Jesús.

² Istak'wi Comam tet ebnaj:

—Yiñ k'ejbiyalil yet cheyilni istz'ay moyan, cheyal haca' ti': “Wal tinañ yeloxa hajan, yuto lañan istz'ay moyan,” quexchi. ³ Taca yet sac'ayal xin cheyal haca' ti': “Wal tinañ yocxa ha' ñab yuto caw k'ej moyan,” quexchi. Hex ti' caw helanex hetxumni yiñ tzet chute isba tiempo, ta chak' ha' ñab maca machoj. Yaja' wal yiñ hune' tiempohal bay ayex ti', mach chitxumchalo heyu. ⁴ Anma yiñ hune' tiempohal ti', caw tx'ojcanoj yeb caw mach yijemoj. Chisk'an c'aybalc'ule yila', yaja' hune'ñech'an c'aybalc'ule chiak'lax yila', haca' hune' isye Comam Dios yiñ naj Jonás, xi Comam Jesús. Lahwi tu' yel Comam isc'atañ ebnaj, isto Comam.

Tzotel Comam Jesús yibañilo iscuybanil ebnaj fariseo

(Mr 8:14-21)

⁵ Yet yec' apno Comam Jesús yeb ebnaj iscuywom isk'axepic'to ha' lago isnaniti ebnaj tato mach yito tzet chislo. ⁶ Yalni Comam tet ebnaj:

—Cheyil heba tet yañal ispan ebnaj fariseo yeb ebnaj saduceo, xi Comam.

⁷ Yet yaben ebnaj hune' tu', yichico ebnaj yalni tet hunun:

—Chal Comam hune' ti' yumi machi majiti tzet chico, xi ebnaj.

⁸ Yet yabenilo Comam hune' tu', yalni Comam tet ebnaj:

—¿Tzet yiñ xin cheyala ta machi hepan ik'bil heyu? Caw mach chicawxi hec'ul yiñ Comam Dios. ⁹ ¿Tom mach chinachalo heyu? yeb ¿tom matxa chitit yul hec'ul yiñ ixim howeb pan yabe yiñ howeb mil ebnaj winaj? Tijab yiñ henabal hayeb motx ixim matxa lahwi yu anma. ¹⁰ Yeb xin, ¿tom matxa chenati yiñ ixim hujeb pan yabe yiñ ebnaj cañeb mil? Yeb xin, ¿tom matxa chenapax-tij hayeb motx ixim matxa lahwi yu anma tu'?

¹¹ ¿Tzet yiñ xin machi matxumchalo heyu tato mañtaj yiñ ixim pan mantzotelan yet mawalnihan teyet ta cheyil heba tet yañal ispan ebnaj fariseo yeb ebnaj saduceo? xi Comam.

¹² Lahwi tu' istxumnilo ebnaj tato mañtaj yiñ yañal ixim pan tzotel Comam, to yiñ cuybanile chak' ebnaj fariseo yeb ebnaj saduceo.

Yal naj Pedro tato Comam Jesús ha' ton Comam Cristo

(Mr 8:27-30; Lc 9:18-21)

¹³ Yet yapni Comam Jesús yeb ebnaj iscuwym bey Cesarea yul ismajul Filipino, isk'amben Comam tet ebnaj iscuwym tu' haca' ti':

—Hanin Ak'bilintijan texol yu Comam Dios, ¿mac anmahilinan yalni anma? xi Comam.

¹⁴ Istak'wi ebnaj:

—Ay mac chalni ta hach ti' naj Juan anicañ ha' iswi' anma, aypaxo mac chalni tato Elías hach,

aypaxo mac chalni tato hach ti' naj Jeremías, maca to hunuxa ischejab Comam Dios ec'lena yet payat, xi ebnaj.

¹⁵ Isk'ambenpaxo Comam tet ebnaj:

—Haxaca hex ti', ¿mac anmahilinan heyalni? xi Comam.

¹⁶ Istak'wi naj Simón Pedro:

—Hach ti', Cristo hach, Isc'ahol Comam Dios itzitz, xi naj.

¹⁷ Yalni Comam tet naj:

—Simón, isc'ahol naj Jonás, caw sak'al hawet yuto hune' maxawal ti' mach anmaho chiyenilo tawet. Walxinto ha' Inmaman ay yul satcañ, ha' chiak'ni hatxumu'. ¹⁸ Haquinpaxtu'an chiwalan tato *Pedro* chijcano habi.* Yibañ hune' ch'en niman ch'en ti'† chiwacañan wiglesiahan,‡ machi xin chik'oji camical istařtzeniloj. ¹⁹ Chiwacanicojan lawe tawet yuñe chu yoc anma yul isk'ab Comam Dios. Ha' tzet mach t'iñano yeco yul sat yibañk'inal ti' hawalni, mach t'iñano chucano yul satcañ. Haxa tzet t'iñan yeco sat tx'o tx'otx' ti' hawalni, hune' tu' t'iñan chucano yul satcañ, xi Comam.

²⁰ Lahwi yalni Comam huntেক'an tu' xin, yalnican Comam tet ebnaj iscuwymom tato machi bay chalic'o ebnaj tato ha' Comam Jesús ha' ton Cristo.

Yal Comam Jesús yirñ tzet chu yak'lax camoj
(Mr 8:31–9:1; Lc 9:22-27)

* **16:18** Pedro chaliloj nich'an ch'en yirñ abxubal griego. † **16:18** Hune' ch'en niman ch'en yechel yirñ tzet yal naj Pedro, yet yalni naj tato ha' Comam Jesús ha' ton Comam Cristo, Isc'ahol Comam Dios.

‡ **16:18** Iglesia ha' ton sunil anma chichahni Comam Jesucristo Iscolomalaj.

²¹ Ha' yiñ hune' tiempohal tu' ichico Comam yalni tet ebnaj iscuwymom tato yilal yul isya'tajil yibañ, yalni Comam haca' ti':

—Caw yilal intohan bey Jerusalén, cat xin yec'ya' wanmahan yu ebnaj ichamta winaj iswi'ehal coñob Israel, yeb yu ebnaj iswi'ehal yiñ ebnaj sacerdote yeb ebnaj cuywawom yiñ isley naj Moisés. Chinispotx'an ebnaj, yaja' yiñ yox tz'ayic cat witzitzbicañan hunelxa, xi Comam.

²² Hayet yaben naj Pedro hune' tu', yawtenilo naj Comam Jesús, iscachwa naj yiñ Comam haca' ti':

—Mamin, ¡ha'ojab Comam Dios chachcolni yiñ hune' isya'tajil tu'! Machojab chachyaco yul isk'ab, xi naj.

²³ Ist'añxico Comam yiñ naj, yalni Comam:

—Ach matzwalil, elañ yiñ insatan yuto chachoc quinhawak'a' ayc'ayojan, wal xin mañtaj ha' tzet nabil yu Comam Dios chiec' yiñ hanabal, walxinto haca' tzet chisna anma ha' chiec' yiñ hanabal, xi Comam.

²⁴ Lahwi tu' yalni Comam tet ebnaj iscuwymom:

—Tato ay hunu mac choche chioc incuwymom- ojan, caw matzahojab yeto isba ischuquil, yeb xin caw hinanojab yaben isya'tajil wiñan. Ta hinan yetan yanma haca' tu' ec'ojab tzujuztun win-tajan. ²⁵ Yuto ha' mac mach hinan iscam wiñan yul sat yibañk'inal ti', chisc'ayto isk'inal mach istañbal. Wal mac chishin isba iscam wiñan xin chischah isk'inal yiñ hunelñe. ²⁶ K'inalo ta ay hunu mac chik'oji ismajnilo sunil tzet ay yul sat yibañk'inal ti', yaj ta chisc'ayto isk'inal mach istañbal, ¿tzettaxca chischah hune' mac tu' selelo isk'inal chisc'ayto tu'? ²⁷ Hanin Ak'bilintijan texol

yu Comam Dios chinhulan yeb isk'ak'al yip Inman yeb ebnaj ángel, cat wak'nihan ispaj selet tet hunun anma, hatatic'a tzet chiswatx'e.* 28 Yiñ caw yeli, chiwalan teyet, ay haywañ mac texol ti' maŕto chicami masanto chiyil wulan cat wocan Yahawoj, Hanin Ak'bilintijan texol yu Comam Dios, xi Comam Jesús.

17

Ishel isba yillax yiñ Comam Jesús (Mr 9:2-13; Lc 9:28-36)

¹ Wajebxa tz'ayic xin, ishec'nilo isba Comam Jesús xol anma yinito Comam naj Pedro, naj Jacobo yeb yuxtaj, ha' ton naj Juan, yiñ iswi' hune' witz caw nahat yecañ. ² Ha' bey tu' xin ishel isba yillax yiñ Comam, caw toxañe chitzejtzon sat Comam haca' tz'ayic. Wal xil isk'ap Comam xin, caw sajhopoñe elicoj. ³ Lañantotic'a xin yilni ebnaj naj Elías yeb naj Moisés, lañan istzotel ebnaj yeb Comam. ⁴ Yalnicañ naj Pedro tet Comam Jesús:

—Mamin, caw c'ul ta wal je bey ti', ta chisje hac'ul chu cowatx'enañ oxebo niŕte pat; hunu hawet, hunu yet naj Moisés, yeb hunu yet naj Elías ti', xi naj Pedro.

⁵ Hayet lañan yalni naj Pedro hune' tu' xin, yayilo hune' moyan caw sajhopoñe, yoc hoyno yiñ ebnaj yeb Comam. Yaben ebnaj iscuywom Comam tu' hune' yul nuk'e xol moyan tu' yalni haca' ti':

—Ha' naj ti' Inc'aholan caw xahan ay wuhan, caw chintzalahan yiñ naj; abewe tzet chal naj, xiayti xol moyan.

* 16:27 Sal 62:11-12

⁶ Hayet yaben ebnaj oxwari iscuwom Comam hune' tu', caw xiwcañ ebnaj, yaycano xulno ebnaj sat tx'otx'. ⁷ Lahwi tu', ishitzico Comam isc'atañ ebnaj, yanayo Comam isk'ab yibañ ebnaj, yalni Comam:

—Ahañwewanoj, mach cheggiwi, xi Comam.

⁸ Hayet yilniti ebnaj xin, matxa mac liñancañ isc'atañ Comam.

⁹ Haxa yet lañan yayti Comam yin iswi' hune' witz tu' yeb ebnaj iscuwom, yalni Comam:

—Machi bay cheyal hune' maxeyil ti' masanto yet chinitzibicañan xol camom, Hanin Ak'bilintijan texol yu Comam Dios, xi Comam tet ebnaj.

¹⁰ Lahwi tu' isk'amben ebnaj tet Comam:

—¿Tzet yin xin chal ebnaj cuywawom yin isley naj Moisés tato yilal babel chul naj Elías sata naj Cristo? xi ebnaj tet Comam.

¹¹ Istak'wi Comam tet ebnaj iscuwom tu':

—Yeli hac tu', yilal yul naj Elías tu' babel yuñe isnani isba anma cat yoc yin istoholal. ¹² Yaja' chiwalan teyet tato xahul naj Elías tu' yaja' mach txumchalo naj yu ebnaj, yuxin iswatx'e ebnaj baytet yal isc'ul yin naj Elías tu'.* Hac tu' xin chinutelaxan Hanin Ak'bilintijan texol yu Comam Dios, chiec'ya' wanmahan yu ebnaj, xi Comam.

¹³ Lahwi tu' xin, istxumchalo yu ebnaj tato ha' yin naj Juan anicañ ha' iswi' anma tzotel Comam.

* **17:12** Yet chitzotel Comam Jesús yin naj Elías bey ti', ha' naj Juan anicañ ha' iswi' anma chal Comam

Yilo Comam Jesús ischejab naj matzwalil yirñ hune' naj nich'an tzeh

(Mr 9:14-29; Lc 9:37-43)

¹⁴ Yet yayilo Comam yeb iscuwymom xol anma xin, ishitzico hune' naj isc'atañ Comam, yay jahno naj sata Comam, yalni naj tet Comam:

¹⁵ —Mamin, caw tz'ayojab hac'ul yirñ inc'aholti'an yuto caw chilow hune' yaxcamic yirñ naj, caw chiec'ya' yanma naj yu. Tx'i'alxa el chito naj yul k'a' yeb xol ha ha'. ¹⁶ Mawitijan naj tet ebnaj hacuwymom ti', yaja' xin machi yu yak'ni cawxo ebnaj naj, xi naj tet Comam.

¹⁷ Istak'wi Comam:

—Hex ti', caw mach cheyaco heyanna yirñ Comam Dios, caw tx'ojexcanoj. Caw nimanxa tiempo ayinic'ojan texol. ¿Hantatoc'anab tiempo chextecha wuhan? Caw ya'xa wanmahan heyu. Iweti naj bey ti', xi Comam.

¹⁸ Ischejnilo Comam ischejab naj matzwalil ayco yirñ naj tzeh tu'. Lañantotic'a xin iscawxilo naj.

¹⁹ Haxa yet ischuquilxañe Comam Jesús yeb ebnaj iscuwymom tu', isk'amben ebnaj tet Comam:

—Mamin, ¿tzet yirñ xin machi mayu jinilojañ ischejab naj matzwalil yirñ naj tzeh ti'? xi ebnaj.

²⁰ Istak'wi Comam tet ebnaj:

—Yuto hex ti' ayto mach chiapni heyánico heyanna yirñ Comam Dios. Yirñ caw isyelal chiwalan teyet ta chicawxi hec'ul yirñ Comam Dios waxañca txanñe yeco heyanna yirñ Comam haca'ñe hunu nich'an yirñatil te' mostaza, chu heyalni tet hunu witz haca' ti': “Heq'uilo haba bey ti', asi' hunuxa bayah,” ta quexchi, chisyije hune'

witz tu' tzet cheyala.* Sunil chu hewatx'eni ta ayco heyanna yin Comam Dios. ²¹ Yuto huntex'an ischejab naj matzwalil ti', machi el yin anma ta mach chextxahli yeb heyak'len wahil hetxahli tet Comam Dios, xi Comam Jesús.

Yal Comam Jesús yin iscayelal yin tzet chu yak'lax camoj

(Mr 9:30-32; Lc 9:43-45)

²² Hayet yec' Comam Jesús yeb ebnaj iscuwym yul ismajul Galilea, yalni Comam tet ebnaj:

—Hanin Ak'bilintijan texol yu Comam Dios chináloxicojan yul isk'ab anma. ²³ Chinak'lax camojan, yaja' yin yox tz'ayic xin cat witzitzbi-cañan hunelxa, xi Comam. Hayet yaben ebnaj hune' tu' caw occano bisc'ulal yin yanma ebnaj.

Ch'en tohlabal chiak'lax yin yatut Comam Dios

²⁴ Hayet yapni Comam Jesús yeb ebnaj iscuwym bey coñob Capernaum, yapni ebnaj chiinilo ch'en tohlabal yin yatut Comam Dios isc'atañ naj Pedro. Isk'amben ebnaj tet naj:

—¿Chimyak' naj chachcuyni istohlalal yin yatut Comam Dios? xi ebnaj.

²⁵ Istak'wi naj Pedro:

—Ho' chitohlawi ya', xi naj. Hayet yocto naj Pedro tu' yul ña ha' Comam babel k'amben tet naj:

—Simón, ¿tzet chu hatxumni yin hune' ti'? Mac tet chisk'an ebnaj yahaw coñob ch'en tohlabal, ¿ham tet yet coñob ebnaj, mato tet anma nan coñobal? xi Comam.

²⁶ Istak'wi naj Pedro:

* **17:20** 1Co 13:2

—Ha' anma nan coñobal, ha' ch'ak'ni ch'en, xi naj. Yalni Comam:

—Ta hac tu', ha' mac yuninaltic'a coñob yehi mach yilalo chak' ch'en. ²⁷ Yaja' yuñe mach ch'oc ishowal ebnaj jiñ, asi' isti' ha' lago cat hawanayto ch'en ik'omati cay xol ha'. Ha' xin yul isti' no' babel cay chiahti hawu ayicto hune' ch'en melyu c'uxan isk'oji istohlan hawet yeb wetan. Chaw-iti ch'en cat hato hawak'nocano ch'en tet ebnaj chichahni ch'en tohlabal tu', xi Comam tet naj Pedro.

18

*Yal Comam Jesús yirñ mac ec'bal yelapno yehi
(Mr 9:33-37; Lc 9:46-48)*

¹ Yirñ hune' tiempohal tu', isk'ambe ebnaj iscuymom Comam Jesús tet haca' ti':

—¿Mac ec'bal yelapno xol anma ayxaco yul isk'ab Comam Dios? xi ebnaj.

² Yawtenti Comam hune' nich'an unin yanico Comam xolbal ebnaj. ³ Yalni Comam:

—Yirñ caw yeli chiwalan teyet, ta mach chehel hebeybal, yeb ta mach cheyiyo heba haca' nich'an unin ti', mach chu heyoc yul isk'ab Comam Dios.

⁴ Yuxin mac chiyiyo isba haca' nich'an unin ti', ha' ec'bal yelapno xol mac ayxaco yul isk'ab Comam Dios. ⁵ Yuxin ha' mac chichahni hunu nich'an unin yuto wetan yehi, haninan chinischahan, xi Comam Jesús.

*Caw ay ismay ta chijak' ayc'ayo hunu mac yirñ
istx'ojal*

(Mr 9:42-48; Lc 17:1-2)

⁶ Yalnipaxo Comam Jesús:

—Ha' mac chiak'ni lectaho hunu mac uninto yanico isba yul ink'aban, c'ul isc'allaxico hunu niman isch'enal ch'en molino* yet trigo yirñ isnuk', cat isk'ojlaxayto xol ha' mar, sata ta chioc yak'a' ayc'ayo hunu maca. ⁷ Caw bisc'ulal yet anma ay yul sat yibañk'inal ti' yuto hantañe tzet bay wal yayc'ayi. Wal tu' caw yeli, yul sat yibañk'inal ti' ayñetic'a yirñ bay chayc'ay anma, yaja' xin c'anch'an mac chiak'ni ayc'ayo hunu maca.

⁸ Yuxin tato hek'ab maca heyoj chexak'ni ayc'ayo yirñ istx'ojal, c'ulmi hetzoc'niltaj cat hek'ojnito nahat. Waxañca matxa tz'ajano henimanil yet chechahni hek'inal mach istañbal ec'balto c'ul sata ta tz'ajan henimanil yet chexalaxto xol k'a k'a' mach istañbal. ⁹ Ta isbak' hesat chexak'ni ayc'ayo xin, c'ulmi heyiniltaj cat hek'ojnito nahat, wal xin waxañca hunxañe isbak' hesat ayicto yet chechahni hek'inal mach istañbal sak'almi heyet sata ta chexalaxto xol k'a k'a' yeb iscabil isbak' hesat, xi Comam.

Yechel yirñ no' me' c'aynatoj
(Lc 15:3-7)

¹⁰ Yalnipaxo Comam Jesús:

—Nanñe heyu, tajca chehinc'ulñe hunu mac uninto yanico isba yul ink'aban, chiwalan teyet, ebnaj ángel chitañen ebnaj ti' ayco ebnaj yirñ sat Inmaman yul satcañ, ¹¹ yuto Hanin Ak'bilintijan texol yu Comam Dios, hulnajinan insaya'an mac c'aynatoj.

* **18:6** Isch'enal ch'en molino yet trigo yet payat tu', cheh no' chiinic'o ch'en yuto caw al ch'en

¹² K'inalo ta ay hunu naj ay cien isme' cat xin isc'ayto hunu no', ¿mataxca xin mach chacano naj no' noventa y nueve, cat isto naj issayno no' c'aynato tu'? ¹³ Yaja' ta chiilcha no' yu naj xin, yirñ caw yeli chiwalan teyet tato ec'balto chitzala naj yirñ no' c'aynatic'ato tu' sata yirñ no' noventa y nueve mach c'aynahotoj. ¹⁴ Hac tu' Comam ay yul satcañ, mach chisje isc'ul tato ay hunu mac uninto yul ink'aban chic'aytoj, xi Comam.

*Yirñ tzet chu jak'ni nimanc'ulal jirñ hununorñ
(Lc 17:3)*

Yalnipaxo Comam Jesús:

¹⁵ —Ta ay hunu hawuxta chiwaxt'en hunu istx'ojal tawirñ, as tzotelañ tet naj hachuquil, cat xin hacachni naj. Ta chabeto naj tzet chawala, yocxa ak'anc'ulal texol chal tu'. ¹⁶ Yaja' ta mach chabeto naj tzet chawala, awteti hunuj maca cawaño mac chito tawintaj, haxinwal chiwaxt'icanayo tzet cheyal tu' yirñ sat cawañ maca oxwañ testigo. ¹⁷ Yaja' ta mach chabeto naj yirñ haca' tu', hal tet ebnaj juxtaj. Taca mach chabeto naj tzet chal ebnaj juxta tu' xin, haca' hunu mac mach ohtaño Comam Dios, hac tu' chucano naj yul hesat, maca haca' hunu ebnaj chiinilo ch'en tohlabal.

¹⁸ Yirñ caw yeli chiwalan teyet, sunil tzet chec'alba yul sat yibañk'inal ti' chic'albalaxpaxo yul satcañ, yebpaxo tzet chepuhilo yul sat yibañk'inal ti', chipuhlaxpaxo yul satcañ.

¹⁹ Chiwalpaxojan teyet: Tato ay cawañojex hun chu hek'anni hunu tzet ye tu' yirñ hetxah tet Comam Dios yul sat yibañk'inal ti' chiak'lax teyet yu

Inmaman ay yul satcañ. ²⁰ Yuxin ha' bay chis-cutxba isba cawañ maca oxwañ mac yu yinayo isba wetan, ayinicojan xolbal, xi Comam.

²¹ Lahwi tu', ishitzico naj Pedro isc'atañ Comam, isk'amben naj:

—Mamin, ta ay hunu wuxťajan chiyaco ismul wetan, ¿hayelmi chiwak' nimanc'ulalan yin, tom hujel mato hantaj? xi naj.

²² Istak'wi Comam:

—Mach chiwalan tawet tato hujelñe, walxinto hujel el chielto setenta chawak' nimanc'ulal yin hawuxťaj, xi Comam.

Yechel yin hune' naj machi ak'ni nimanc'ulal

²³ Yalnipaxo Comam Jesús:

—Chiwalpaxoan teyet yin anma ayxaco yul isk'ab Comam Dios, lahan haca' hune' naj rey inli hanta isc'as ebnaj ismunlawom. ²⁴ Hayet lañan yichico naj yilni hanta isc'as ebnaj tu', yilaxti hune' naj caw ismilalxa isc'as tet naj. ²⁵ Yaja' hune' naj tu', mach chik'oji naj istohlan sunil isc'as tu'. Yuxin ischej naj rey tu' txoñlaxoto naj yeb yixal, yeb yuninal, yeb sunil tzet aya. ²⁶ Wal naj ay isc'as tu' xin ay jahno naj sata naj rey, yoc naj yalno tet naj haca' ti': “Mamin, caw niman chawute hac'ul wiñan hayeboxa tz'ayic, chink'uyayojan ch'en cat wak'nihan sunil inc'astu'an tawet,” xi naj. ²⁷ Wal naj rey tu', caw tz'aycañ isc'ul naj yin naj, yak'ni taño naj isc'as naj tu' sunil, isbejtzolax naj.

²⁸ Haxa yet yelti naj sata naj rey tu', yilnayo naj hune' naj yet munlawomal, ay xin hanic' isc'as naj tet naj. Yoc yachno naj yin isnuk' naj, etzaxañe xin majayto ishak'o naj yu naj, yalni naj tet naj:

“Tinañ xin chawacanayo hac'as wetan,” xi naj.
²⁹ Wal naj ay isc'as tu' ay jahno naj yirñ sat naj, yalni naj tet naj: “Mamin, niman chawute hac'ul, hawechman hayeboxa tz'ayic, chink'uyayojan ch'en cat wak'ni inc'astu'an tawet,” xi naj. ³⁰ Yaja' naj bay ay isc'as naj tu', mach yabeto naj tzet yal naj, walxinto yito naj naj tet naj alcal, yalaxicto naj yul preso masanto yak'cano naj sunil isc'as tu'. ³¹ C'uxan xin ay huntেক'an ebnaj yet munlawomal naj ilni hune' tu', caw xin tac isc'ul ebnaj, yuxin to ebnaj yala' tet naj rey yirñ tzet yu tu'. ³² Hayet yaben naj rey hune' tu', yanito naj yawtemal naj. Yalni naj tet naj: “Hach ti' caw mach hawalil, wak' nimanc'ulalan yirñ hac'as yuto hak'an nimanc'ulal wetan. ³³ Estam xin matz'ay hac'ul yirñ hawet munlawomal tu' haca' mayu istz'ay inc'ulan tawiñ,” xi naj. ³⁴ Caw xin tit ishowal naj rey tu' yirñ naj, ischejni naj yalaxocto naj tx'oj tu' yul preso masanto istohlacano naj sunil isc'as tu', xi Comam.

³⁵ Yalnipaxo Comam haca' ti':

—Hac tu' chute Inmaman ay yul satcañ teyirñ tato mach cheyak' nimanc'ulal yirñ sunil heyanna yirñ heyuxta chaco ismul teyet, xi Comam.

19

Cuybanile yirñ mac chispoh isba yeb yixal
(Mr 10:1-12; Lc 16:18)

¹ Lahwi yalnicano Comam Jesús huntেক'an cuybanile tu' xin, yel Comam yul ismajul Galilea, isto Comam yul ismajul tx'otx' Judea isk'axepic'to ha' Jordán. ² Caw xin hantañe anma oc tzujno yinta

Comam, hac tu' xin yu yak'ni cawxo Comam anma ya'ay.

³ Ay xin huntেক'an ebnaj fariseo apni isc'atañ Comam, yoc ebnaj yilweno Comam yuñe yauc'ay yuñ hunu ismul, isk'amben ebnaj tet Comam:

—Mamin, ¿chimyú ispohni isba hunu naj yeb yixal waxañca yu hunu comon tzet ye tu'? xi ebnaj.

⁴ Istak'wi Comam tet ebnaj:

—¿Tom maḁto cheyil yul Yum Comam Dios bay chala tato hayet iswatx'encano Comam Dios anma, iswatx'e Comam Dios naj winaj, iswatx'enpaxo Comam ix ix? ⁵ Yalni Comam Dios haca' ti': “Yuxin chacano naj winaj ismam yeb ismi' cat ishunbancano isba naj yeb yixal, hac tu' xin hunxañe anmahil chielcanico iscawañil, xicano Comam. ⁶ Yuxin maḁxa cawaño anmahil yehi, to hunxañe chielcanicoj. Yuxin ha' mac chishunba Comam Dios machi hunu mac chu ispohni,” xi Comam Jesús.

⁷ Isk'ambenpaxo ebnaj fariseo tu' tet Comam:

—¿Tzet yuñ xin yalcano naj Moisés tato chu yak'lax te' hum yet pohlebahil tet ix ixale cat yalaxcano ix yu yichamil? xi ebnaj.

⁸ Yalni Comam tet ebnaj:

—Yu hetx'ojal yuxin yal naj Moisés hune' tu' ta chu hepohlencano heba yeb heyixal. Wal yet yichebanil yul sat yibañk'inal ti', mach haco tu' ye yu Comam Dios. ⁹ Yuxin chiwalan teyet, ha' mac chibejnicano yixal, yaja' ta mach taj yu issayni ix hunuxa winaj, cat ismohyipaxo naj yeb hunuxa ix, yuñ haca' tu' chaco naj ismul yul sat Comam Dios, xi Comam.

¹⁰ Yalni ebnaj iscuymom Comam haca' ti':

—Tato matxa chu copohni coba yeb jixal, c'ulmi mach chijik' jixal chal tu', xi ebnaj.

¹¹ Istak'wi Comam tet ebnaj:

—Yaja' mach sunilo mac chijcha yu yiñ hune' cheyal ti', wal xin hañc'añe mac yettic'a yehi.

¹² Ay ebnaj mañtic'a tz'ajano isnimanil yettic'a chipitzc'ahi, yuxin mach chu yik'ni ebnaj yixal. Aypaxo ebnaj yet anmahil chiuteni, yuxin mach chu yik'nipaxo ebnaj yixal. Aypaxo ebnaj xin yu ismunla yiñ ismunil Comam Dios yuxin machi yixal. Yuxin ha' mac chitecha yu, machojab chik' yixal, xi Comam.

Isk'an Comam Jesús isc'ulal Comam Dios yibañ niñte unin

(Mr 10:13-16; Lc 18:15-17)

¹³ Lahwi tu' xin, yilaxti haywañ niñte unin isc'atañ Comam Jesús yu yanayo Comam isk'ab yibañ, yebpaxo yu istxahli Comam yiñ. Wal ebnaj iscuymom Comam xin, oc ebnaj iscacha' anma ik'ñe niñte unin tu'.

¹⁴ Yuxin yal Comam tet ebnaj:

—Mach checach istit niñte unin ti' inc'atañan, yuto ha' mac chaco yanma yiñ Comam Dios haca' yeco yanma niñte unin ti' yiñ ismam ismi', ha' chu yoc yul isk'ab Comam ay yul satcañ, xi Comam.

¹⁵ Yanayo Comam Jesús isk'ab yibañ iswi' niñte unin tu', lahwi tu' xin isto Comam.

Hune' naj tzeh caw k'alom tzotel tet Comam Jesús

(Mr 10:17-31; Lc 18:18-30)

16 Ay hune' naj tzeh apni isc'atañ Comam Jesús, isk'amben naj tet Comam:

—Mam cuywawom, ¿tzet hunu c'ul inwatz'enan yurte inchahnihan k'inale mach istañbal? ñi naj.

17 Yalni Comam Jesús tet naj:

—¿Tzet yirñ xin chak'ambe wetan yirñ tzet ye tu' c'ul? Wal xin hune'rie mac c'ul. Yaj ta chawoche hachab hak'inal mach istañbal, yije chejbanile ak'bilcano yu naj Moisés, ñi Comam.

18 Isk'amben naj haca' ti':

—¿Baytet xin huntেক'an chejbanile chawal ti'? ñi naj. Yalni Comam:

—Mach chachpotx'wahi, mach chachixli yebpaxo mach chachelk'awi, yeb mach chahobcañ lek'ti'al yirñ hawet anmahil. 19 Yije tzet chal hamam, hami', yebpaxo xin xahan chawil hawet anmahil haca' haya'ilñien haba, ñi Comam tet naj.

20 Istak'wi naj tet Comam:

—Sunil huntেক'an chawal ti' yijebiltic'a wuhan yichitaxtic'a inch'ibcañan. ¿Tzet hunuxa wal inyijenana? ñi naj.

21 Yalni Comam tet naj:

—Yaja' ta chawoche chachoccano c'ulal, as txorito sunil tzet ayach, cat hapohnicañ istohol yirñ anma meba', haxinwal ay hak'alomal yul satcañ. Lahwi tu' cat hawoccano tzujno wintajan, ñi Comam.

22 Hayet yaben naj tzeh tu' yalni Comam haca' tu', ispaxto naj yirñ bisc'ulal yuto caw k'alomcano naj sic'lebil.

23 Yalni Comam Jesús tet ebnaj iscuwom:

—Yirñ caw yeli chiwalan teyet, caw ya'ta yoc anma k'alom yul isk'ab Comam Dios.

24 Chiwalpaxojan teyete, haca' hunu no' camello tinañ, ¿tom subutaj yec'to no' yul isholanil hunu ch'en acuŕa? Hac tu' ye anma k'alom, caw ya'ta yoc yul isk'ab Comam Dios,* xi Comam.

25 Hayet yaben ebnaj iscuymom Comam hune' tu' caw c'ayilo isc'ul ebnaj, yalni ebnaj tet hunun: “Ta hac tu', ¿mactaxca chicolchahi?” xi ebnaj.

26 Yoc t'añoño Comam yin ebnaj, yalni Comam:

—Hune' ti' mach chik'oji anma iswatx'eni, wal Comam Dios sunil tzet chu iswatx'en Comam, xi Comam Jesús.

27 Yalni naj Pedro tet Comam:

—Mamin, hañoñti'añ bejbilcano sunil tzet ayoñañ yu joc tzujnojañ tawintaj, ¿yuxin tzet chicochahañ ispajoj? xi naj.

28 Yalni Comam:

—Yin caw yeli chiwalan teyete, yet chiapni istiepohal yet chiac'bilob sunil tzet ye tu', Hanin Ak'bilintijan texol yu Comam Dios chinoc tz'orñojan yul incapilan caw c'ulch'ancanoj. Haxa hex chexec' tzujtzun wintati'an, chexoc tz'orñoño yul hunun hecapil, cat heyoc heyilni yin tzet chielico cablahoñeb majan ebnaj Israel.

29 Yuxin mac chisbejcano yatut wuhan maca yuxtaj, yanab, maca ismam, maca ismi', maca yuninal, maca istx'otx'; huntex'an mac tu' caw ec'balto tx'i'al ispaj selet chiak'lax tet, yeb chischah isk'inal mach istañbal. 30 Ha' mac caw ay yelapno ye tinañ, yet chiapni hune' tiepohal tu', caw matxa yelapno chielicoj. Haxa mac machi

* **19:24** Ay te' hum chalni ta isholanil acuŕa chitzotel yin niŕte pulita caw lot'an sat yeb caw txanñe yecañ istel ayco yin isc'ubal coñob Jerusalén.

yelapno ye tinañ chijute jilni, yet chiapni hune' tiempohal tu' caw aycano yelapno chielcanicoj, xi Comam.

20

Yechel yirñ huntেক'an ebnaj munlawom

¹ Yalnipaxo Comam Jesús tet ebnaj iscuymom:

—Anma chioc yul isk'ab Comam Dios lahan haca' hunu naj yahaw munil to yirñ caw sahab sac'ayal issaya' isc'amte' chimunla xol te' uva.

² Hayet yilcha huntেক'an ebnaj yu naj, yalni naj tato hune' denario chak' naj yirñ tz'ayic tet hunun ebnaj, lahwi tu' isto ebnaj munlaho xol yuva naj.

³ Yirñmi ch'en baloñeb yirñ yet yalañ chuman isto naj yul txoñbal, yilni naj huntেক'anxa ebnaj mach ismunil.

⁴ Yalni naj tet ebnaj: “Ay munil inc'atañan, chexintohlahan haca'tic'a caw yehi,” xi naj. Istopaxo ebnaj munil xol yuva naj.

⁵ Naj yahaw munil tu' elpaxto naj yirñ chumanil, yeb yirñ ch'en oxeb, hactic'apax tu' yute yalni naj tet huntেক'anxa ebnaj ilcha yu.

⁶ Yirñxa ch'en howeb xin, istopaxo naj txoñbal hunelxa, yilni naj huntেক'an ebnaj chiec' bey tu' mach ismunil.

Isk'amben naj tet ebnaj: “¿Tzet yirñ xin toñe chiec' tz'ayic teyibañ bey ti'?” xi naj.

⁷ Istak'wi ebnaj: “Mamin, to machi mac chiak'ni yet comunilañ,” xi ebnaj.

Yalni naj tet ebnaj: “Ta chisje hec'ul asi'we munil wintajan, chexintohlahan haca' caw yehi,” xi naj. Isto ebnaj munil yinta naj.

⁸ Haxa yirñ k'ejbiyal xin, yalni naj yahaw munil tu' tet naj chiilni ismunil haca' ti': “Awte sunil ebnaj munlawom cat hatohlan ebnaj. Ebnaj maoc munil yirñ islahobal, ha' ebnaj chatohla babel.

Wal ebnaj caw sahab maichico ismunla xin, islahobal chatohla ebnaj,” xi naj yahaw munil tu'.⁹ Lahwi tu' xin yawtelax ebnaj oc munil yiri ch'en howeb, ha' ebnaj babel tohlalaxi, hune' denario ak'lax tet hunun ebnaj. ¹⁰ Haxa yet yawtelax ebnaj ichico munil yiri caw sahab sac'ayal, ham yalni ebnaj tato ec'bal istohol ebnaj chiak'laxi, yaja' machoj, hune'rie denario ak'laxpaxo tet hunun ebnaj. ¹¹ Hayet ischahni ebnaj istohol tu' yichico ebnaj isbuchwa yiri naj yahaw munil tu',¹² yalni ebnaj: “Ebnaj mahul yet islahobalxa ti' hunxari hora mamunla ebnaj, ¿tzet yiri xin lahan cotoholarí maxawak' yeb ebnaj? Harioriti'ari ec'bal macorimunlahari, yeb xin caw majak' janmahari xol k'a',” xi ebnaj. ¹³ Istak'wi naj yahaw munil tu' tet hune' naj haca' ti': “Hach wet anmahil, mach chinetlihan tawiri yuto majala tato hune' denario chintohlahan hatz'ayic. ¹⁴ Wal xin mawak'an hatohol, paxarítoj. Ta chiwochehan ta lahan chik' ebnaj laríoxa maoc munil yebex, mach hawoc yiri hune' tu'. ¹⁵ Haninti'an chu wak'nihan inmelyuhan tet mac bay chiwochehan, ¿mato chichiwa hac'ul yu c'ul inc'ulan?” xi naj yahaw munil tu'.

¹⁶ Yuxin ha' mac babel tinarí, ha' chicancano yiri islahobal, wal mac islahobal ye tinarí, ha' chioc yiri babel. Hantari mac awtebil yu Comam Dios, yaja' haywarírie mac sic'bililoj, xi Comam.

*Yal Comam Jesús iscamical yiri yoxel
(Mr 10:32-34; Lc 18:31-34)*

17 Yet ayxaco Comam Jesús yeb anma yiri isbel bey Jerusalén, yawtenilo Comam ebnaj cablahoñwañ iscuwymom, yalni Comam tet ebnaj:

18 —Tinañ xin lañan coto bey Jerusalén, yaja' Hanin Ak'bilintijan texol yu Comam Dios, chinálaxicojan yul isk'ab ebnaj yahawil yiri ebnaj sacerdote yeb ebnaj cuywawom yiri isley naj Moisés cat isk'anni ebnaj camical wibañan.

19 Chilahwi tu' cat quinyanicojan ebnaj yul isk'ab ebnaj mach Israeloj, cat isbuchwa ebnaj wiñan, cat quinismak'nihan ebnaj. Chilahwi tu' cat quinyanicañan ebnaj yiri te' culus, yaja' yiri yox tz'ayic cat witzitzbicañan hunelxa, xi Comam.

Yiri tzet isk'an ismi' naj Jacobo yeb naj Juan

(Mr 10:35-45)

20 Yet hune' tiempohal tu' apni ismi' ebnaj isc'ahol icham Zebedeo ilwal yiri Comam Jesús. Tzujan xin ebnaj cawañ tu' yinta ismi', yay jahno ixnam sata Comam yuto ay hune' tzet choche ixnam isk'ana'.

21 Isk'amben Comam tet ixnam:

—Miyay, ¿tzet chawoche hak'ana' wetan? xi Comam. Istak'wi ixnam:

—Mamin, yet chachoc Yahawoj chink'anan tawet tato cawañ wuninti'an chioc tac'atañ. Hunu naj chioc tz'oñno yiri hawatx'k'ab, hunuxa naj chioc tz'oñno yiri hameck'ab, xi ixnam.

22 Istak'wi Comam:

—Hex ti' mach heyoyhtajo tzet chek'ana. ¿Chimyu heyuc'ni hune' vaso ha ha' caw c'ah* haca' hune' chiwuc'an? xi Comam. Istak'wi ebnaj:

* **20:22** Hune' vaso c'ahla ha' chitzotel yiri isya'tajil chihul yibañ Comam

—Ho', chu juc'nihari, xi ebnaj.

²³ Yalni Comam tet ebnaj xin:

—Yeltoni chu heyuc'ni hune' vaso ha ha' caw c'ah chiwalti'an, yaja' wal haninti'an mach wetojan walnihan mac chiay tz'o'ño yin inwatx'k'aban yeb yin inmeck'aban, to hañe Inmaman ohtañe mac tet chak'a, xi Comam.

²⁴ Hayet yaben ebnaj lahoñwañxa iscuwym Comam, caw tit ishowal ebnaj yin ebnaj cawañ tu'.

²⁵ Yet yilni Comam hune' tu', yawtenico Comam ebnaj isc'atañ, yalni Comam:

—Hex ti' caw heyohtaj tato ebnaj ayco yahawo coñob, ay yip ebnaj yibañ coñob tu'. Haxa ebnaj nime winaj yul coñob yahawxa chute isba ebnaj yin anma. ²⁶ Wal texol xin mach c'uluj tato hac tu' cheyute, wal xin ta ay hunu mac ec'bal yelapno ye chabe, ahojab chioc chejaboj. ²⁷ Haxa mac choche ec'bal yelapno chuco texol xin, yak'abico isba chejaboj. ²⁸ Hac tu' wehan Hanin Ak'bilintijan texol yu Comam Dios, mach hulnajojinan yu inchejnih anma, walxinto haca' chejab wecojan xol anma, cat wak'ni camo inbahan hac tu' xin chu intohlalan ismul tx'i'al anma, xi Comam.

Yak' hajlo Comam Jesús isbak'sat cawañ ebnaj mach chu yilni

(Mr 10:46-52; Lc 18:35-43)

²⁹ Hayet yel Comam Jesús yeb ebnaj iscuwym yul coñob Jericó, caw hantañe anma oc tzujno yinta Comam. ³⁰ Ay xin cawañ ebnaj mach chu yilni, tz'oñanayo isti' beh. Hayet yaben ebnaj tato ha' Comam Jesús lañan yec'toj, yahwi ebnaj tet Comam yin caw ip haca' ti':

—Mamin, yuninal isc'ahol naj rey David, caw tz'ayojab hac'ul jiñañ, xi ebnaj.

³¹ Yaja' xin oc anma iscacha' ebnaj yurte isbejni ebnaj yel yaw, yaj caw islahico ebnaj yahwi, yal-nipaxo ebnaj:

—Mamin, isc'ahol jichmam David, caw tz'ayojab hac'ul jiñañ, xi ebnaj.

³² Yet yaben Comam Jesús hune' tu' yoc liñnoj, yawtenti Comam ebnaj isc'atañ, isk'amben Comam tet ebnaj:

—¿Tzet cheyoche chinwax'ehan? xi Comam.

³³ Istak'wi ebnaj:

—Mamin, chijochehañ chawak' hajlo cosatañ, xi ebnaj.

³⁴ Istz'aycañ isc'ul Comam yiñ ebnaj; yanico Comam isk'ab yiñ isbak'sat ebnaj, yiññaena tu' xin ishajlo issat ebnaj, yoc tzujno ebnaj yinta Comam.

21

*Yet yocto Comam Jesús yul coñob Jerusalén
(Mr 11:1-11; Lc 19:28-40; Jn 12:12-19)*

¹ Hayet ayto yapni Comam Jesús yeb ebnaj is-cuywom bey Jerusalén yapni Comam bey Betfagé, iscawilal woñan Olivo. Ischejnito Comam cawañ ebnaj iscuywom, ² yalni Comam tet ebnaj:

—Asi'we bey aldea cosatac'to ti', yet chexapno bey tu' cheyila' hune' no' mi'e burro xecan, ayco yunin no' isc'atañ; chepuholo no' cat heyinoti no' wetan. ³ Yaja' ta ay tzet chihallax teyiñ xin, cheyala' haca' ti': “Ay chiocnico no' yu Comam Jesús, yaja' choñhulañ jak'a'paxojañ no',” quex-chi, xi Comam.

4 Hac tu' yu yijni isba tzet tz'ib'nebilcano yu hune' ischejab Comam Dios yet payat haca' ti':

5 Halwe tet anma ay yul coñob Sión* haca' ti':
Ilwec'anabi, lañan yul hereyal texol, hune' heyahaw ti' caw c'ul isc'ul, ayahto yibañ hune' no' tzeh burro, yunin hune' no' mi'e burro ijtzom,* xiayoj.

6 Isto ebnaj cawañ tu', isyijen ebnaj haca'tic'a yu yalni Comam. 7 Yet yapni ebnaj bey tu' ispuhnilo ebnaj no' mi'e burro tu', yiniti ebnaj no' yeb no' yunin tet Comam. Islitz'banahito ebnaj xil isk'ap isk'año yichiñ no' tzeh burro tu', lahwi tu' yahto Comam yibañ no'. 8 Caw hantañe anma oc tzujno yinta Comam, ay mac islebayo xil isk'ap yul beh. Aypaxo mac inilo xaj te te'† yanayo yul beh bay chiec'to Comam tu'. 9 Sunil anma babelico sata Comam yeb tzujanico yintaj, ichico yawi yiñ caw ip, chalni haca' ti':

—¡Caw niman yelapno naj ti', ha' naj ti' titna yiñ yuninal jichmam rey David! ¡Jala'we tzoti' c'ul yiñ mac chihul coxol yu Comam Dios! ¡Jak'a'we yuch'andiosal tet Comam Dios ay satcañ!* xi anma.

10 Hayet yapni Comam bey Jerusalén, iswejchacariñ anma sunil, isk'ambeni:

—¿Mac anmahil hune' naj ti'? xi anma.

11 Istak'wi hunték'anxa ebnaj:

* 21:5 Ha' woñan Sión bey Jerusalén, ha' bey tu' iswatx'e naj rey David yatut yeb iscapil ebnaj Israel yet payat * 21:5 Zac 9:9

† 21:8 Yayo anma xaj te' ch'ib yul isbeh Comam yuto caw chitzala anma yiñ Comam. Yet payxa tu' hac tu' chute anma yet chocto hunu naj rey yul iscoñob * 21:9 Sal 118:25-26

—Ha' naj ti' Jesús, ischejab Comam Dios ay bey Nazaret yul ismajul Galilea, xi ebnaj.

Yet istzumbenilti Comam Jesús ebnaj chitxořwi yul yatut Comam Dios

(Mr 11:15-19; Lc 19:45-48; Jn 2:13-22)

¹² Lahwi tu' xin yocto Comam Jesús yul yatut Comam Dios, istzumbenilti sunil anma chitxořwi yeb chilok'wi bey tu'. Iswacchancari Comam ismeřa ebnaj helom melyu, ispac'chanpaxocari Comam isřila ebnaj txořom palamuch. ¹³ Yalni Comam tet ebnaj:

—Tz'ibřiebilcano yul Yum Comam Dios haca' ti': “Ha' watutan yet txah yehi,” řiayoj. Yaja' hex ti' haca' hunu isřiach'en elk'om, hac tu' ye heyu, ři Comam.

¹⁴ Hayet ayicto Comam yul yatut Comam Dios tu' yapni huntেক'an ebnaj mach chu yilni yeb ebnaj tx'oj ye yoj; yak'ni cawxo Comam ebnaj. ¹⁵ Hayet yilni ebnaj yahawil yiri ebnaj sacerdote, yeb ebnaj cuywawom yiri ley huntেক'an c'aybalc'ule iswatx'e Comam tu' caw tit ishowal ebnaj; yeb yet yaben ebnaj yalni niřte unin: “Jak'aweco ismay isc'ahol jichmam rey David,” ři, ¹⁶ yalni ebnaj tet Comam:

—řChimhawabe tzet chal niřte unin ti'? ři ebnaj. Istak'wi Comam:

—Ho' chiwabehan, yaja' řtom mařto bay cheyil yul Yum Comam Dios bay chal haca' ti'?:

Ha' niřte unin yeb niřte chi-to-txutxwi ha' chak'an bitřeno habi,* řiayoj, ři Comam.

* **21:16** Sal 8:2

¹⁷ Lahwi tu' yel Comam yul coñob Jerusalén, isto yul coñob Betania, bey tu' xin cancano Comam hune' ak'bal.

Yet istz'acti'nen Comam Jesús hune' te' higuera machi sat

(Mr 11:12-14, 20-26)

¹⁸ Haxa hunxa tz'ayic yiñ caw sahab sac'ayalil, ismeltzo Comam Jesús yul coñob Jerusalén. Yet ayco Comam yiñ isbel tu' isñohchacañ. ¹⁹ Yilnito Comam hune' te' higuera isti' beh, isto Comam yich te', yilni Comam ta machi sat te', xajñe te' aycoj. Yalni Comam yiñ te' haca' ti':

—¡Matxa bak'inal chachsadni! ñi Comam.

Yiññena tu' xin istajilo te'. ²⁰ Hayet yilni ebnaj iscuywom Comam hune' tu', caw c'aycañ isc'ul ebnaj, isk'amben ebnaj tet Comam:

—¿Tzet mayu istajnaló te' yiñ añe? ñi ebnaj.

²¹ Yalni Comam tet ebnaj:

—Yiñ caw yeli chiwalan teyet, ta caw cheyaco heyanna yiñ Comam Dios, machi xin chicabcon hec'ul, maññetaj hune' mayu yiñ te' higuera ti' chisje hewatx'eni. Wal xin tato cheyal tet hune' witz ti': “Heq'uilo haba bey ti' cat ható hawanoyto haba xol ha' mar,” ta quexchi, chiyij isba tzet cheyala. ²² Yuxin ta yiñ sunil heyanna chextxahli tet Comam Dios yet chek'anni hunu tzet ye tu', chiak'lax teyet, ñi Comam.

K'ambelax bay chitit yip Comam Jesús

(Mr 11:27-33; Lc 20:1-8)

²³ Lahwi tu' xin, yapni Comam Jesús yul coñob Jerusalén, yocto Comam yul yatut Comam Dios. Hayet lañan iscuywa Comam xin ishitzico ebnaj

yahawil yir ebnej sacerdote, yeb ebnej ichamta winaj iswi'ehal yir ebnej Israel, isk'amben ebnej tet Comam:

—¿Mac cachchejni hawatx'en huntex'an hawatx'e yet ewi? ¿Mac ak'ni hawip? xi ebnej.

²⁴ Istak'wi Comam:

—Haqintu'an ay hune' ink'ambebalan teyet, ta chepajtze wetan chiwalan mac ak'rie wipan inwatx'enan huntex'an tu'. ²⁵ ¿Mac chejniti naj Juan yanocari ha' iswi' anma? ¿Tom Comam Dios mato ha' anma? xi Comam.

Yichico ebnej yallen tet hunun haca' ti':

—Tato chijala' ta Comam Dios chejniti naj Juan tu', chimyala' naj jet: “¿Tzet yir xin mach heyayto yul heyanna yir tzet yal naj?” xim naj. ²⁶ “Yaja' ta chijalpaxoj ta ha' anma chejne naj, choxiw jalni yuto sunil anma chianayto yul yanma tato naj Juan tu' ischejab Comam Dios ye naj,” xi ebnej.

²⁷ Yuxin tak'wi ebnej tet Comam:

—Mach johtajojari, xi ebnej. Yalni Comam tet ebnej:

—Haqintu'an mach chiwalan mac ak'rie wipan inwatx'enan huntex'an tu', xi Comam.

Yechel yir cawari ebnej c'ahole

²⁸ Yalnipaxo Comam Jesús tet ebnej hunelxa:

—¿Tzet cheyute heyalni yir hune' chiwalti'an? Ay hune' naj mame ay cawari isc'ahol; yalni naj tet naj babel haca' ti': “C'ahol, as munlahari xol te' uva,” xi naj. ²⁹ Istak'wi naj: “¡Mach chintohan!” xi naj. Yaja' tzujanxa xin yoc yir isnabal naj istohi. ³⁰ Lahwi tu' yalnipaxo naj mame tu' tet naj iscab tato chitopaxo naj munil; istak'wi naj: “C'ultic'a mam chintohan,” xi naj. Yaja' xin mach to naj.

³¹ ¿Mac xin najil yijen tzet yal ismam yiri ebnaj cawari tu'? xi Comam. Istak'wi ebnaj:

—Naj babel, xi ebnaj. Yalni Comam:

—Yiri caw yeli chiwalan teyet, ebnaj ik'omilo tohlabal yeb ebix ix tx'oj ye iswi' ha' chioc babel yul isk'ab Comam Dios tesataj. ³² Yuto hulic'o naj Juan anicari ha' iswi' anma quexiscuyu' yiri isc'ulal, yaja' mach heyayto yul heyanna yiri tzet yal naj. Wal ebnaj ik'omilo tohlabal yeb ebix tx'oj ye iswi' yayto yul yanma yiri tzet yal naj. Wal hex ti' xin, waxarica caw heyil huntেক'an tu' yaja' mach hehel hebeybal, yeb xin mach heyayto yul heyanna, xi Comam Jesús.

Yechel yiri ebnaj munlawom mach c'uloj
(Mr 12:1-12; Lc 20:9-19)

³³ Yalnipaxo Comam Jesús tet ebnaj:

—Abewe hune'xa yechel chiwalti'an: “Ay hune' naj yahaw munil tz'unni te' uva sat istx'otx', ispenayo naj istz'unub tu'. Iswatx'en naj bay chiyatz'lax yal te', iswatx'enpaxocari naj hune' ña nimajal yucari istel yuri istarielax hune' peyab tu'. Lahwi tu' xin, yanito naj istz'unub tu' comonal tet huntেক'an ebnaj. Isto naj yul hune'xa coriob caw nahat. ³⁴ Haxa yet yapni istimpohal yuxlax te' uva tu' xin, yanito naj huntেক'an ischejab ischahno ismajul tet ebnaj munlawom tu'. ³⁵ Hayet yapni ebnaj chejab tu' xin, yoc ebnaj istzabnoyo ebnaj, ismak'ni ebnaj hune' naj, hunxa naj mak'bil ispotx'ni ebnaj, haxa hunxa naj xin k'ojlaxcari naj. ³⁶ Haxa yiri iscayel ec'balxa ebnaj chejab yato naj yahaw munil, yaja' xin hactic'apax tu' utelax ebnaj yu ebnaj munlawom tu'.

³⁷ Yiñxa istzujanil xin, ha' caw isc'ahol naj yahaw munil tu' yatoj, istxumni naj haca' ti': 'Wal tet naj inc'aholti'an chimisyije ebnaj,' xi naj. ³⁸ Yaja' hayet yilni ebnaj yapni naj c'ahole tu', yalni ebnaj tet hunun: 'Ha' tet naj ti' chicancano hune' tx'o tx'otx' ti', wal tinañ copotx'owe camo naj haxinwal jetxa chuco hune' istx'otx' naj ti',' xi ebnaj. ³⁹ Yoc ebnaj istzabnoyo naj, yilaxilto naj yintalto peyab tu' yu ebnaj, ispotx'ni ebnaj naj," xi Comam.

⁴⁰ Isk'amben Comam tet ebnaj:

—Yet chihul naj yahaw munil tu', ¿tzettaxca chute naj ebnaj munlawom tu' cheyute heyalni? xi Comam.

⁴¹ Istak'wi ebnaj:

—Matxa chitz'ay isc'ul naj ispotx'ni ebnaj munlawom tx'oj tu', cat yanito naj istz'unub tu' comonal tet huntex'anxa ebnaj munlawom tz'ajan chu yak'ni ismajul yet chiuxlax sat te' uva tu', xi ebnaj.

⁴² Yalni Comam Jesús:

—¿Tom maŕto cheyil yul Yum Comam Dios bay chal haca' ti'?:

Ha' hune' ch'en ch'en mach isje ebnaj watx'emcañ ña yak'aco yiñ ismunil, ha' ch'en caw ec'balto c'ul yoc xe'o ña. Ha' Comam watx'eñe hune' tu', caw xin chic'ay coc'ul jilni,* xiayoj.

⁴³ Yuxin chiwalan teyet ta nanxa coñobal chioç yul isk'ab Comam Dios heseleloj, yuto yijem anma tu' yak'ni ismajul yiñ tzet chiswatx'e tet Comam.

⁴⁴ Wal hune' ch'en ch'en tu', ta ay mac chiayc'ay yibañ ch'en hayebtam isk'ahilal chioqui. Yaja'

* **21:42** Sal 118:22-23

ta ha' ch'en chiayc'ay yibañ, chiquechmoto yalañ ch'en, xi Comam.

⁴⁵ Hayet yaben ebnaj iswi'ehal ebnaj sacerdote, yeb ebnaj fariseo yalni Comam haca' tu', istxumni ebnaj tato yin ebnaj yal Comam huntেক'an yechel tu'. ⁴⁶ Yuxin yoche ebnaj istzabayo Comam, yaja' xiw ebnaj tet anma yuto sunil anma chalni tato ischejab Comam Dios ye Comam Jesús.

22

Yechel yin hune' k'in yet mohyilal (Lc 14:15-24)

¹ Yichipaxico Comam Jesús yalni tet ebnaj, yanco Comam huntেক'an yechel yin cuybanile tu', yalni Comam haca' ti':

² —Ha' anma awtebil yoc yul isk'ab Comam Dios, lahan haca' yak'le anma yin hune' k'in yec'tze hune' naj rey yet ismohyi isc'ahol. ³ Hayet c'ulxa ye sunil, yanito naj ischejab yik'ati ebnaj awtebil yin hune' mohyilal tu'. Yaja' machi hunu ebnaj isjetij. ⁴ Lahwi tu' yanipaxto naj huntেক'anxa ischejab, yalni naj tet ebnaj haca' ti': “Halwe tet anma awtebil tu' tato watx'ebilxa itah. Manchejan potx'laxo hayc'oñ inwacaxan, yeb hunmajanxa no nok' caw bak'ich, watx'ebilxa sunil. ‘Asi'we yin k'in tu’,’ quexchi,” xi naj rey.

⁵ Yaja' ebnaj awtebil tu', ma'xtic'a cam isc'ul ebnaj istita. Hune' naj to ilno ismunil, hunxa naj xin to ilno istxoñ. ⁶ Haxa huntেক'anxa ebnaj xin, oc ebnaj howal yin ebnaj chejab tu', ispotx'lax ebnaj yu ebnaj. ⁷ Hayet yaben naj rey hune' tu' caw tit ishawal naj. Ischejni naj issoldado ispotx'no ebnaj potx'wawom tu', isñuslaxpaxilo

iscoñob ebnaj. ⁸ Lahwi tu' yalnipaxo naj rey tu' tet huntek'anxa ebnaj ischejab: “Sunil tzet chiocnico yin hune' k'iñ ti' watx'ebilxa sunil, yaja' ebnaj awtebil wuhan mach chisjeti ebnaj, yuxin mach istzano ebnaj yul yin hune' k'iñ ti'.” ⁹ Wal tinañ asi'we yulaj calle cat hechejniti sunil mac chiilcha heyu yin hune' k'iñ ti',” xi naj. ¹⁰ Yet yaben ebnaj chejab hune' tu', isto ebnaj yulaj calle, yiniti ebnaj sunil anma chiec' bey tu'. Ay anma c'ul isbeybal, ay anma tx'oj isbeybal. Caw xin nohilo te' ña yu anma yin hune' k'iñ tu'.

¹¹ Hayet yocto naj rey yilno anma cutxanxaco tu', yilni naj hune' naj mach ayoco xil isk'ap yet mohyilal.

¹² Yalni naj rey tet naj: “¿Tzet mayu hawocti bey ti', machi xin xil hak'ap yet mohyilal aycoj?” xi naj. Yaja' xin mañtic'a tak'wi naj. ¹³ Yalni naj rey tu' tet ebnaj ischejab: “C'albawe yoj hune' naj ti' yeb isk'ab naj cat heyanihto naj xol k'ejholo, ha' bey tu' xin chiok'o naj yin, cat isñetx'laho yeh naj,” xi naj. ¹⁴ Wal xin chiwalan teyet, caw tx'i'al mac awtebil yu Comam Dios yaja' haywaññe mac chissiq'uilo Comam, xi Comam Jesús.

*Ch'en tohlabal chiak'lax tet naj yahaw Roma
(Mr 12:13-17; Lc 20:20-26)*

¹⁵ Lahwi tu' ishec'nilo isba ebnaj fariseo, islahitiñen isba ebnaj yin tzet chu yak'ni ayc'ayo ebnaj Comam yin hunu tzoti', cat yoc ebnaj ak'oc'ule yin Comam yalni. ¹⁶ Yuxin yato ebnaj haywañ ebnaj ayco yin ispartido, yeb haywañ

ebnaj ayco yirñ ispartido naj Herodes isc'atañ Comam, yurñe yilwen ebnaj Comam. Yalni ebnaj tet Comam:

—Mam cuywawom, caw johtajañ tato hach ti' isyelalñetic'a chawala, chacuynipaxo anma iswatx'en haca' choche isc'ul Comam Dios. Machi xin comono chawabeto yirñ tzet chal anma, yuto lahan yelapno anma yul hasat. ¹⁷ Yuxin, ¿tzet chawute hawalni yirñ hune' ti': Ch'en tohlabal chiel jirñ yu naj jahaw ay Roma, c'ulmi jak'ni ch'en mato machoj? ñi ebnaj.

¹⁸ Yaja' wal Comam Jesús pet istxumnalo Comam tzet nabil yu ebnaj. Yuxin yal Comam:

—Hex cheyal heba c'ulal ti', ¿tzet yirñ xin chesay yirñ tzet chu wayc'ayan yul hek'ab? ¹⁹ Yewe hunu ch'en melyu cheyak' yirñ hetohlalbal tu' wila'an nañ, ñi Comam.

Yak'ni ebnaj hune' ch'en denario tet Comam.

²⁰ Isk'amben Comam tet ebnaj:

—¿Mac najil ayco yechel sat yeb isbi yirñ ch'en? ñi Comam.

²¹ Istak'wi ebnaj:

—Yechel sat naj jahaw ay bey Roma, yeb xin isbi naj ayco yirñ ch'en, ñi ebnaj. Yalni Comam xin:

—Ak'we tet naj yahaw Roma, baytet yet naj yehi, cat heyak'ni tet Comam Dios baytet yet Comam yehi, ñi Comam.

²² Yet yaben ebnaj yalni Comam hune' tu', caw c'ayilo isc'ul ebnaj, isbejnicano ebnaj Comam.

Isk'ambe ebnaj saduceo yirñ yet chiitzitzbicarñ camom

(Mr 12:18-27; Lc 20:27-40)

²³ Yiñtic'a hune' tz'ayic tu', ay huntেক'an ebnaj saduceo bey ilno Comam Jesús. Ebnaj saduceo tu' mach chayto ebnaj yul yanma tato itzitzbicañ anma camnaxa, yuxin isk'ambe ebnaj tet Comam:

²⁴ —Mam cuywawom, halbilcano yiñ isley naj Moisés haca' ti': “Ta chicam yichamil hunu ix ix, machi xin yuninal naj yeb ix, yilal yik'ni ix yuxta naj camna tu', yuñe ay yuninal naj yeb ix cat yoc yuninalo naj camna tu',” xiayoj. ²⁵ Yaja' yet hunel, coxolti'añ ay hujwañ ebnaj yuxtañe isba. Naj babel mohyi yeb hune' ix yaja' cam naj, machi xin yuninal naj yeb yixal tu', yuxin mohyi naj iscab yeb ix. ²⁶ Yaja' campaxo naj, hactic'apax tu' yu naj isyox, masanta apni yiñ naj ishuj, sunil ebnaj ik'len ix. ²⁷ Lahwi tu' iscampaxo ix. ²⁸ Yuxin hayet chiitzitzbicañ camom, ¿mac ebnaj hujwañ tu' chioc yichamilo ix yuto ishujwañil ebnaj mohyi yeb ix? xi ebnaj.

²⁹ Istak'wi Comam Jesús tet ebnaj saduceo tu':

—Hex ti', mañtaj ha' ye heyu, yuto mach heyohtajo tzet chal yul Yum Comam Dios, yeb mach heyohtajo yip Comam. ³⁰ Wal xin hayet chiitzitzbicañ anma camom matxa chimohyi, yuto lahanxa chielico haca' ebnaj ángel ay satcañ. ³¹ Yiñ yet chiitzitzbicañ anma camom tu', ¿tom mañto cheyil yul Yum Comam Dios bay chal haca' ti'?: ³² “Haninti'an isDiosal naj Abraham, naj Isaac yeb naj Jacob,” xiayoj. Yuxin waxañca cam ebnaj yaja' mach cam ebnaj yiñ hunelñe. Yuto mach isDiosalo camom ye Comam Dios to isDiosal anma itzitz, xi Comam.

³³ Yet yaben anma huntেক'an cuybanile yal Comam tu' caw c'ayilo isc'ul.

*Chejbanile caw ec'bal yelapno yehi
(Mr 12:28-34)*

³⁴ Yet yaben ebnaj fariseo tato matxa yu istak'wi ebnaj saduceo tet Comam Jesús, iscutxbanico isba ebnaj. ³⁵ Xol ebnaj tu' xin ayco hune' naj cuywawom yin ley, ha' naj oc ilweno Comam, yalni naj:

³⁶ —Mam cuywawom, ¿baytet chejbanile caw ec'bal yelapno xol chejbanile aycano yu naj Moisés? xi naj.

³⁷ Istak'wi Comam tet naj:

—Ochewe Comam Dios yin sunil hec'ul, heyanma yeb henabal. ³⁸ Ha' xin hune' chejbanile tu' ha' babel yeb ec'bal yelapno xol hunték'anxa. ³⁹ Ha' hune'xa iscab xin, lahan haca' hune' babel, chal haca' ti': “Xahan cheyil heyet anmahil haca' hexahanñen heba,” xiayoj. ⁴⁰ Hayet chicoyijen cabeb chejbanile ti', lañan coyijen hunték'anxa cuybanile ak'bilcano yu naj Moisés, yeb tzet tz'ibñebilcano yu ebnaj ischejab Comam Dios, xi Comam tet naj.

*Comam Cristo Isc'ahol Comam Dios yehi
(Mr 12:35-37; Lc 20:41-44)*

⁴¹ Hayet cutxantoco ebnaj fariseo tu',

⁴² isk'amben Comam Jesús tet ebnaj:

—¿Tzet cheyute hetxumni yin naj Cristo? ¿Mac yin chitit naj heyalni? xi Comam. Istak'wi ebnaj:

—Yin naj rey David chitit naj, xi ebnaj.

⁴³ Yalnipaxo Comam:

—Yaja' naj David tu', yal naj naj Cristo Yahawoj yet yak'lax yala' naj yu Comam Espíritu Santo yet yalni naj haca' ti':

44 Yal Comam Dios tet Wahawilan: “Ayañ tz'orino yin inwatx'k'aban masanto chiwacojan mac ayco ishowal tawiriñ yalañ hawoj,” xi Comam,* xi naj David.

45 ¿Tzet yin xin yal naj David tu' naj Cristo Yahawiloj tato yin naj titna naj?*

46 Machi hunu ebnaj yu istak'wi yin tzet yal Comam. Ha'tic'a yin hune' tz'ayic tu' xin matxatic'a hunu ebnaj hitzico isk'amben hunu tzet ye tu' tet Comam.

23

Yalilo Comam Jesús istx'ojal ebnaj fariseo yeb ebnaj cuywawom yin ley

(Mr 12:38-40; Lc 11:37-54; 20:45-47)

¹ Lahwi tu' yalni Comam Jesús tet anma yeb tet ebnaj iscuymom:

² —Ebnaj fariseo yeb ebnaj cuywawom yin ley, ha' ismunil ebnaj tu' ha' ton quexiscuyni yin isley Moisés. ³ Yuxin sunil tzet chal ebnaj teyet yijewej, yaja' mach chebeybalñeto tzet chiswatx'e ebnaj, yuto ha' tzet chal ebnaj mach chisbeybalñe ebnaj. ⁴ Ha' cuybanil chak' ebnaj tet anma, lahan haca' hunu ijatz caw al, machi mac chik'oji yinicañ. Wal ebnaj xin nitam hunu yiximal isk'ab ebnaj chishitzico yin. ⁵ C'ul yub ebnaj, caw yijem chute isba ebnaj, yaja' yuñe yillax ebnaj yu anma. Caw nimej chute ebnaj sat no' tz'um bay tz'ibñebilico Istzoti' Comam Dios cat yanico ebnaj no' yin isk'ab, maca yin ispalañ. Chanipaxico

* **22:44** Sal 110:1 * **22:45** Isyelo Comam Jesucristo ta titna yin naj rey David, yaj xin Yahawil naj ye Comam

ebnaj huntেক'an xil isk'ap nimej ishojo isti'. ⁶ Yet chiawtelax ebnaj wa'o yiri k'iriñ, ha' huntেক'an tz'oñobal caw ay yelapnoj ha' chismajilo ebnaj, hac tu' chutepaxo ebnaj yulaj capilla. ⁷ Hayet chiec'paxo ebnaj yulaj calle yochebal ebnaj caw c'ul chu istioñli anma tet ebnaj, yeb xin caw choche ebnaj yabe' tato chihallax cuywawomal yiri ebnaj.

⁸ Wal hex ti' xin, machojab cheyoche chihallax cuywawomal teyiriñ, yuto hune'ñie mac hecuywawom, wal xin heyux'tañe heba. ⁹ Machi hunu mac cheyal hemamo yul sat yibañk'inal ti', yuto hune'ñiech'an Hemam, ha' ton Comam Dios ay yul satcañ. ¹⁰ Machojab cheyoche chihallax iswi'ehal teyiriñ, yuto hune'ñie mac iswi'ehal yeco teyiriñ, ha' ton Comam Cristo. ¹¹ Wal xin ha' mac ec'bal yelapno yehi, yak'abico isba chejabo texol. ¹² Yuto ha' mac chicañ isba, chiilaxayoj, wal mac chiyiyo isba xin, chiilaxcañ.

¹³ Hex cuywawom yiri isley naj Moisés yeb hex fariseo hex ti', cheyal heba c'ulal, ¡caw c'anch'anex! yuto checach yoc anma yul isk'ab Comam Dios. Mach cheyaco heba, machi xin chejépxo chioc mac choche yak'aco isba yul isk'ab Comam Dios. ¹⁴ Hex cuywawom hex ti' yeb hex fariseo hex ti', cheyal heba c'ulal, ¡caw c'anch'anex! yuto cheyilo yatut ebix hun ix, chilahwi tu' caw nimej cheyute yoj hetxah, haca'tañe mach istx'ojal chewatx'e. Wal xin caw ec'balto isya'tajil chiay teyibañ.

¹⁵ Hex cuywawom yiri ley yeb xin hex fariseo hex ti' cheyal heba c'ulal. ¡Caw c'anch'anex! yuto sunil yul sat yibañk'inal ti' yeb yibañ ha' mar

chelahwilo heyeq'ui yuñe hemontenico anma tey-intaj. Ha' mac chimoncha heyu tu' xin chisom-chacanto yul iswi' heyu, cayel ec'balto chischah isya'tajil xol k'a k'a' tesataj.

¹⁶ Hex ti' lahanex haca' hunu mac mach chu yilni, yaja' cheyaco heba ijbalomal. ¡Caw c'anch'anex! Cheyalnipax haca' ti': “Ta ay mac chiak'ni binaho yatut Comam Dios yet chistak'wenico hunu tzet ye tu' yuñ, mach yilalo chisyije. Yaj ta isbi ch'en oro ayicto yul yatut Comam chak' binaho yuñ hunu tzet ye tu', caw yilal isyijeni,” quexchi. ¹⁷ ¡Caw suc hex! Lahanex haca' anma mach chu yilni. ¿Baytet ec'bal yelapno yehi? ¿Tom ch'en oro mato yatut Comam Dios? Wal xin, yu yatut Comam Dios yuxin ay yelapno ye ch'en oro ayicto yul yatut tu'. ¹⁸ Cheyalnipaxoj: “Ta ay hunu mac chiak'ni binaho altar yet chistak'wenico hunu tzet ye tu' yibañ, mach yilalo chisyije. Yaja' ta isbi xahanbal ayahto yibañ altar tu' chak' binahoj, caw yilal chisyije,” quexchi. ¹⁹ ¡Caw lahanex yeb anma mutz'an sat! ¿Baytet caw ec'bal yelapno yehi? ¿Tom ha' xahanbal ayahto yibañ altar tu', mato ha' altar hune' chianico ismay xahanbal tu'? ²⁰ Wal xin ha' mac chiak'ni binaho altar yuñ tzet chala, ha' hun tzet ayahto yibañ altar tu' chak' binahoj. ²¹ Hacpax tu' mac chiak'ni binaho yatut Comam Dios yuñ tzet chala, ha' hun Comam Dios ay bey tu' chak' binahoj. ²² Hacpax tu' mac chiak'ni binaho satcañ yuñ tzet chala, ha' hun istz'oñobal Comam Dios chiyak' binahoj, cat yak'nipaxo binaho Comam tz'oñan yul yehobal tu'.

²³ Hex cuywawom yuñ isley naj Moisés yeb hex

fariseo hex ti', cheyal heba c'ulal. ¡C'anch'anex! cheyak' isdiezmohal te' alawena, te' anix, yeb te' comino, yaja' machi cam hec'ul heyijen chejbanile caw ay yelapno aycano yu Comam Dios; ha' ton hewatx'en istoholal, yeb istz'ay hec'ul yiñ heyet anmahil, yeb xin heyijen tzet chal Comam Dios, yeb heyánico heyánma yiñ Comam, ha' ton hunték'an ti' yilal heyijeni, machi xin chebejpaxo heyijen hunték'anxa tu'. ²⁴ ¡Hex ti' lahanex yeb anma mutz'an sat, yaja' cheyaco heba ijbalomal yiñ hunuxa maca. Hex ti' caw cheyila tato machi hunu no' nich'an us chito xol heyitah, yaja' mach cheyabe hebik'nito no' camello!

²⁵ Hex cuywawom yiñ isley naj Moisés yeb hex fariseo hex ti', cheyal heba c'ulal, ¡caw c'anch'anex! yuto caw c'ul cheyute hetx'ahni yinta hevaso yeb heseç', yaja' wal yul xin, nohnayto yu istz'ilal heyelek' yeb yu heyec'najil.

²⁶ Hex fariseo hex ti', lahanex haca' hunu mac mutz'an issat. Wal xin tx'ahwe babel yul hevaso yeb heseç', haxinwal saj chielpaxico yintaj.

²⁷ Hex cuywawom hex yiñ isley naj Moisés, yeb hex fariseo hex ti', cheyal heba c'ulal. ¡Caw c'anch'anex! yuto lahanex haca' hunu panteón caw c'ul yehico istxohal; caw c'ulch'an jilni, yaja' wal yul xin, nohna yu isbajil camom yeb tz'il.

²⁸ Haca' hunték'an panteón tu' haquex tu'. Hañe yiñ sat anma caw c'ul cheyute heba, wal heyánma xin nohna yu lek'ti'al yeb yu istx'ojal.

²⁹ Hex cuywawom yiñ isley naj Moisés yeb hex fariseo hex ti', cheyal heba c'ulal. ¡Caw c'anch'anex! yuto checayerie hetzantencañ bay

mujan ebnaj ischejab Comam Dios. Chetzantepaxo bay mujan ebnaj c'ul iswatx'e, ³⁰ cheyalni haca' ti': "Tato ayoric'o yiri hune' tiempohal yet ispotx'lax ebnaj ischejab Comam Dios yu ebnaj jichmam, mach chimjaco coba copotx'ni ebnaj," quexchi. ³¹ Hayet cheyalni haca' tu', hex caw ex cheyaliloj tato yiri yuninal ebnaj potx'ni camo ebnaj ischejab Comam tu' quextita. ³² ¡Wal xin ha' tzet ichebilxa yu ebnaj heyichmam tu', lahwecanoj!

³³ Hex ti', lahanex yeb no' laba yuto caw helanex yiri istx'ojal. ¿Tzettaxca chu hecolni heba tet isya'tajil xol k'a k'a' mach istaribal? ³⁴ Chinchejtojan ischejab Comam Dios texol yeb mac itz'at iswi' yiri yet Comam, yeb ebnaj cuywawom. Yaja' xin ay ebnaj chepotx' yul hecapilla, ay ebnaj cheyacañ yiri culus, aypaxo ebnaj chemak' yul hecapilla, yeb xin ay ebnaj chetzumbec'o yul hunun coñob. ³⁵ Teyibañ xin chititcano isya'tajil yu iscamical sunil ebnaj potx'bil; ebnaj c'ul tzet iswatx'e chiichiti yiri iscamical naj Abel masanta yiri iscamical naj Zacarías, isc'ahol icham Berequíás, potx'bil xolbal yatut Comam Dios yeb bay chiak'lax xahanbal. ³⁶ Yiri caw yeli chiwalan teyet, chititcano isya'tajil yibañ anma yiri hune' tiempohal ti' yu iscamical ebnaj tu', xi Comam.

*Caw tz'ay isc'ul Comam Jesús yiri anma ay bey
Jerusalén*

(Lc 13:34-35)

³⁷ Yalnipaxo Comam Jesús:

—¡Hex ah Jerusalén ti' chepotx' camo ebnaj ischejab Comam Dios, cat hek'ojni camo ebnaj ischejti Comam texol! ¡Tx'i'al el quexwawtecojan yul ink'aban, haca' chu yawtenico no' mi'e chiyo nište yunin yalañ isxic', yaja' machi heje! ³⁸ Abewecano tzet chiwalti'an, hune' hecoñob ti' chebeja'canoj, chicancano mañ anmahil. ³⁹ Tinañ xin chiwalcanojan teyet tato matxa chinheyilan masanto yet cheyalni haca' ti': “¡Jak'awe tzalaho coc'ul yiñ mac chul coxol yu Comam Dios!” quexchi, xi Comam.

24

Yal Comam Jesús tato chiuchc'alaxayo yatut Comam Dios

(Mr 13:1-2; Lc 21:5-6)

¹ Lahwi tu', yelti Comam Jesús yul yatut Comam Dios. Hayet lañan yelti Comam tu' xin ishitzico ebnaj iscuwymom Comam isc'atañ, yichico ebnaj isyeni huntেক'an te' ña yetbi isba yeb yatut Comam tu'. ² Yalni Comam tet ebnaj:

—Yiñ caw yeli chiwalan teyet, huntেক'an cheyil ti' chiapni istz'ayical bay chiuchc'alaxtoj. Machi hunu ch'en ch'en latz'bil ti' chican yibañ yet ch'enal,* xi Comam tet ebnaj.

Huntek'an yechel chuyet chihul islahobal tz'ayic
(Mr 13:3-23; Lc 17:22-24; 21:7-24)

³ Lahwi tu' isto Comam Jesús yiñ istzalanil woñan Olivo, yay tz'oño Comam bey tu', ishitzico ebnaj iscuwymom Comam isc'atañ. Hayet ischuquil ebnaj yeb Comam tu' isk'amben ebnaj tet Comam:

* **24:2** Yij isba hune' ti' yu ebnaj soldado romano yiñ habil 70 D.C

—Mamin, hal jetañ, ¿bak'in chu huntেক'an max-awal tu', yeb baytet huntেক'an yechel chisye isba yet toxa chaħhuli yeb yirñ yet chilahwi yul sat yibañk'inal ti'? xi ebnaj.

⁴ Yichico Comam yalni tet ebnaj:

—Caw cheyil heba, machojab mac chexak'ni subchahoj. ⁵ Yuto tx'i'al ebnaj chuli cat isbalnico ebnaj inbihan yirñ, cat yalni: “Haninti'an Cristo inan,” xi ebnaj. Caw xin tx'i'al mac chisubcha yu ebnaj. ⁶ Cheyaben yichicañ howal bey ti', yeb yul huntেক'anxa coñob. Yaja' mach chexxiwi yuto yilal yul huntেক'an tu', yaj maħto istañbalo yul sat yibañk'inal ti'. ⁷ Chak'lecañ howal ej tx'otx' nimeta coñob yeb huntেক'anxa tx'otx' nimeta coñob, cat yanipaxico howal hune' coñob yirñ hune'xa coñob. Caw tx'i'al howal yeb yabil chuli, chulpaxo wahil yeb chixcab yul hunun coñob. ⁸ Yaja' yichebanilñe isya'ilal ye huntেক'an tu'.

⁹ Hex ti', chexilaxto sata ebnaj yahaw coñob yu yak'lax ec'oya' heyanma, cat xin quexispotx'ni camo ebnaj. Sunil anma yul sat yibañk'inal ti' chexcajni yuto tzujanex wintajan. ¹⁰ Yirñ hune' tiempohal tu', tx'i'al mac chiyilo yanma yirñ Comam Dios. Chioc ishowal anma yirñ hunun, cat ishobnicañ anma lek'ti'al yirñ hunun. ¹¹ Tx'i'al ebnaj chalico isba ischejabo Comam Dios, caw xin tx'i'al mac chisubcha yu ebnaj. ¹² Caw chiahcañ anma iswatx'en istx'ojal, yuxin matxa xahano chil anma yet anmahil. ¹³ Ha' mac chitecha yu masanto yirñ islahobal, ha' chicolchahi. ¹⁴ Yaja' wal Tzoti' c'ul yirñ tzet chu yoc anma yul isk'ab Comam Dios, yilal ispujbalaxic'o yul hunun coñob

yuñe yohtañencanilo anma, lahwi tu' cat yul islahobal tz'ayic.

¹⁵ Tz'ibñebilcano yu hune' ischejab Comam Dios chiyij Daniel yin hune' naj chihul etanoto yatut Comam Dios yu istx'ojal chiswatx'e naj. Mac chiilni hune' ti' istxumabiloj.* ¹⁶ Yuxin maquex ayexic'o yul coñob Judea ti' yet chiyuni hune' tu' yilal heyelcañ cat heto iswi'la witz. ¹⁷ Ha' mac ayahto yibañ yac'alil yatut, matxa chiyti yik'alti hunu tzet ye tu' yul yatut, to beh yelcañ. ¹⁸ Wal mac ayto xol ismunil xin, matxa chimeltzo yik'alti xil isk'ap yul yatut. ¹⁹ ¡C'anch'an ebix ix ayxa tzet yehi, yeb ebix chi-to-txutxwi niñte yunin yet chiyuni hune' tu'! ²⁰ Yuxin k'anwe tet Comam Dios, haxinwal machojab yin ñabil chu hune' tu', machojabpaxo yin istz'ayical xewilal chiyuhi. ²¹ Yuto hune' isya'tajil chul yin hune' tiempohal tu', caw nanxa islwi, mañto hunelo chu yichitax iswatx'i yul sat yibañk'inal ti', matxa bak'inal chupaxoj yet chilahwi yec'anoj. ²² Yaja' tato mach chisc'otzba Comam Dios yoj hune' tiempo tu', machim hunu mac chicolchahi. Wal xin chisc'otzba Comam yu iscolni macta sic'bilxa yu.

²³ Yuxin ta ay mac chihalni teyet: “Ay naj Cristo bey ti', lah,” maca “ay naj Cristo bey tu', lah,” ta xi, mach cheyayto yul heyanma. ²⁴ Yuto ay ebnaj chisbalico isba Cristohal, yeb ay ebnaj chalico isba ischejabo Comam Dios. Chisye ebnaj huntেক'an yechel yeb c'aybalc'ule yuñe issubcha anma yu ebnaj. Etza xin chisubchapaxo mac sic'bilxa yu Comam Dios yu ebnaj. ²⁵ Wal xin,

* 24:15 Dn 9:27; 11:31; 12:11

ayto chiwalnicanojan hunték'an ti' teyet. ²⁶ Yuxin ta ay mac chihalni teyet: “As ilwej, ay naj Cristo bey tx'otx' desierto,” ta xi, mach chextohi. Maca ta chihallax teyet: “Ewan ye naj bey ti', lah,” ta xi, mach cheyayto yul heyanma. ²⁷ Yuto haca' jilni isjebla c'uh bay chiahilo tz'ayic, cat isjeplapaxo bay chito tz'ayic, hac tu' chu wulan Hanin Ak'bilintijan texol yu Comam Dios. ²⁸ Ha'tic'a bay ayayo isnimanil hunu camom, ha' tu' chiscutxba isba no' usmij, xi Comam tet ebnaj iscuwymom.

Yiñ tzet chu yul Comam Jesucristo

(Mr 13:24-37; Lc 17:26-30, 34-36; 21:25-33)

²⁹ Yalnipaxo Comam Jesús:

—Chiñelahwi yec'to hunték'an nimeta isya'tajil tu', cat isk'ejholilo yoj tz'ayic, wal ixahaw matxa chimujli, cat istitc'ay tx'umel ay satcañ, cat xin istzicobtañelax sunil tzet ay yip yul satcañ. ³⁰ Lahwi tu' cat isyenicañ isba yechel wulbalan yul satcañ, Hanin Ak'bilintijan texol yu Comam Dios. Wal anma ay yul hunun coñob yul sat yibañk'inal ti', chixiwcañ cat yoc ok'oj yet chiyilni wulan xol moyan. Chinhulan yeb isk'ak'al wipan. ³¹ Hayet chiok' ch'en trompeta yiñ caw ip, chinchejnicojan ebnaj ángel iscutxbaco sunil macta sic'bilxa wuhan yul yibañk'inal. Caw xin sunil yul sat yibañk'inal chiec' ebnaj iscutxbacañ anma sic'bilxa tu'.

³² Txumwec'anab yiñ te' higuera, hayet chiyax-bilo ischon isk'ab te' cat yelilo niñte xaj te', cheyohtañelaj ta toxa chioc ha' ñab. ³³ Hacpax tu' xin yet cheyilni yijni isba sunil tzet chiwalti'an, cheyohtañelaj tato cawilxa wetijan, haca' hunu mac

liñanxaco sat pulta. ³⁴ Yiñ caw yeli chiwalan teyet, sunil hunték'an ti' chij isba yalañto mañto chicam hunték'an anma ayic'lo yiñ hune' tiempohal ti'. ³⁵ Ha' satcañ yeb tx'o tx'otx' chitañiloj, yaja' wal intzoti'an xin machi ec'to yet yijni isba tzet chala.

³⁶ Yaja' wal yiñ tzet tz'ayical yeb tzet orahil chinhultu'an, machi mac ohtañe, nitam ebnaj ángel ay satcañ. Mach wohtapaxojan hanin Isc'ahol Comam Dios inti'an, walxinto hañc'lañe Inmaman ohtañe.

³⁷ Haca' yu anma yiñ istiempohal naj Noé, hac tu' chu anma yiñ hune' tiempohal yet chinhulan, Hanin Ak'bilintijan texol yu Comam Dios. ³⁸ Yuto yet yalañto mañto chihul ha' niman yaxñab, caw matzet chal isc'ul anma yiñ tzet yal naj Noé, caw xin hañe wa'oj yeb ismohyi ayco yiñ isc'ul masanto yet yocto naj Noé yul te' barco. ³⁹ Hayet tona nahul ay anma tu', yul hune' niman yaxñab yibañ, istañilo anma sunil. Haca' yu anma yiñ hune' tiempohal tu', hac tu' chu anma yet chinhul lemnahan, Hanin Ak'bilintijan texol yu Comam Dios. ⁴⁰ K'inalo ta ay cawaño ebnaj winaj hune'ñe chimunlahi yet chiyuni hune' tu', hune' naj chilaxtoj, hune'xa naj xin chicancanoj. ⁴¹ Yeb xin ta ay cawañ ebix hune'ñe lañan iscawni, hune' ix chilaxtoj hune'xa ix chicancanoj.

⁴² Caw majwahañwej, yuto mach heyohatajo tzet tz'ayical chinhulan, hanin Heyahaw inti'an.

⁴³ K'inalo ta yohta hunu naj yahaw ña tzet orahil chul hunu naj elk'om yiñ ak'balil, chimyilo naj iswayañ. Hac tu' xin mach chiocto naj elk'om tu' yelk'alti tzet ay naj. ⁴⁴ Ha' quexpax tu' hex ti', helan cheyute heba, yuto yet matxa nano heyu

cat wul lemnahan, Hanin Ak'bilintijan texol yu Comam Dios, xi Comam Jesús.

Naj chejab yijem yeb naj mach yijemoj
(Lc 12:41-48)

⁴⁵ Yalnipaxo Comam Jesús:

—K'inalo ta ay hunu naj yahaw munil ay haywaño ischejab, ham naj yijem yeb caw helan chacano naj seleloj yu yak'ni tzet chislo ebnaj ismunlawom yet chic'ayayoj. ⁴⁶ Sak'al yet naj chejab ta lañan isyijen naj tzet halbilcano tet yet chiapni naj yahaw tu'. ⁴⁷ Yiñ caw yeli chiwalan teyet, naj yahaw munil tu' chaco naj naj yijem tu' yahawo yiñ sunil tzet aya. ⁴⁸ Yaja' ta mach c'uluj chute isba naj, cat yoc naj yalni haca' ti: “Ya' wahawtu'an, ¿bak'intam chul ya'?” ta xi naj. ⁴⁹ Cat yoc naj ismak'ni ebnaj chejab tu', cat yoc naj wa'oj yeb xin uc'u xol ebnaj uc'um te'. ⁵⁰ Haxa yet istz'ayical mach echmabilo yahaw naj tu' yu, hayet tohna nahul ay naj cat yul lemna yahaw naj tu'. ⁵¹ Hac tu' xin chiak'lax ec'oya' yanma naj yu naj yahaw tu', haca' yak'lax ec'oya' yanma hunték'an ebnaj chal isba c'ulal. Ha' tu' xin chiok' naj cat isñetx'la yeh naj yu isya'tajil, xi Comam.

25

Yechel yiñ lahoñwañ ebix k'opo

¹ Yalnipaxo Comam Jesús:

—Yet chioc Comam Dios Yahawo bey ti', lahan chak'le anma haca' yu lahoñwañ ebix k'opo to yiñ hune' mohyilal yiñ ak'balil. Yito ebix iscantil, isto ebix chahwal yiñ naj mohyom tu'. ² Yaja' xin ay howañ ebix mach helanoj, wal howañxa

ebix xin caw helan ebix. ³ Ebix mach helano tu', hañe te' aceite ayayto yul iscantil ebix, hañe te' yito ebix. ⁴ Wal ebix helan xin isnohtze ebix iscantil, yinipaxto ebix yak'bilxa yaceite yul islimeta. ⁵ Yaja' xin ec'to yorahil yulbal naj chimohyi tu', caw xin k'ahan yechman ebix, matxa chitecha waya'ñ yu ebix yuxin wayca'ñ ebix sunil. ⁶ Haxa yi'ñ chuman ak'bal, yaben ebix yallax haca' ti': “¡Ahañwewanoj! ¡Lañan yul naj chimohyi lah! Elañweti hechaba naj,” xi. ⁷ Yet yaben ebix hune' tu' yahwano ebix, yanico ebix k'a' yi'ñ iscantil. ⁸ Yalni ebix howa'ñ mach helano tu' tet ebix helan haca' ti': “Ak'we nino heyaceite jeta'ñ yuto lañan istañilo k'a' yi'ñ cocantila'ñ lah,” xi ebix. ⁹ Istak'wi ebix helan tet ebix mach helano tu': “Mach chu jak'nihañ heyet, yuto ta chijak'la'ñ hanic'o heyet mach chimchabe hanic' ti' teyi'ñ, mach chimchabepaxoca'ñ jeta'ñ. Wal xin, c'ul ta chexto helok'o heyet,” xi ebix. ¹⁰ Yet ayto ebix howa'ñ lok'o aceite tu', yapni naj chimohyi. Wal ebix caw helan tu' octo ebix yinta naj yi'ñ mohyilal tu', lahwi tu' xin ispebalaxcanilti te' pulta.* ¹¹ Hunepxatic'a xin yapni ebix howa'ñ to lok'o aceite, yoc ebix awocto sat pulta, yalni ebix: “Mamin, Mamin, haj pulta jeta'ñ,” xi ebix. ¹² Istak'wilti naj mohyom tu' tet ebix: “¡Machoj! Yi'ñ caw yel chiwalan, mach quexwohtajojan,” xi naj. ¹³ Yuxin chiwalcanojan teyete, caw helan cheyute heba yuto mach heyohtajoj tzet tz'ayical yeb tzet orahil chinhulan, xi Comam.

Yechel yi'ñ ebnaj oxwa'ñ chejab chahni ch'en

* 25:10 Mt 24:36-44

*melyu**(Lc 19:11-27)*¹⁴ Yalnipaxo Comam Jesús:

—Yet chul Comam Dios Yahawoj, lahan chak'le anma haca' yu ebnaj ischejab hune' naj yahaw munil. Oc yiñ isnabal naj isto bey hune'xa nan coñobal caw nahat, yaja' yet yalañto mañto chito naj, yawten naj ebnaj ischejab yu yanicano naj ismelyu yul isk'ab ebnaj.

¹⁵ Tet hune' naj, howeb mil quetzal yacano naj yul isk'ab naj, wal tet hunxa naj xin, cab mil quetzal yacano naj, haxa tet hunxa naj xin mil quetzalñe yacano naj. Hatatic'a ishelanil hunun ebnaj, hac tu' yu yanicano naj ch'en tet ebnaj. Lahwi tu' isto naj. ¹⁶ Naj chejab chahnicano ch'en howeb mil quetzal, oc naj munil yeb ch'en, caw xin howebto mil ch'en yik' naj yibañilo ch'en howeb mil tu'. ¹⁷ Hapax tu' naj chahnicano ch'en cab mil, cab milto ch'en yik'paxo naj yibañilo ch'en cab mil tu'. ¹⁸ Wal naj chahnicano ch'en hune' mil, ishol naj tx'o tx'otx' ismujni naj ch'en alaxcano tet yu naj yahaw tu'.

¹⁹ Yet caw nimanxa tiempo chielto xin, yul naj yahaw melyu tu', yawten naj ebnaj ischejab yu yilni naj hantaxa ismelyu. ²⁰ Naj chahnicano ch'en howeb mil, ha' naj oc babel yiñ sat naj yahaw melyu tu'. Yanicano naj ch'en howeb mil ak'lax tet yeb ch'en howeb mil yik' naj, yalni naj: “Mamin, howeb mil ch'en hawacano wetan, yaja' xin howebxa mil ch'en chiwik'an yibañilo ch'en,” xi naj. ²¹ Yalni naj yahaw melyu tu' tet naj: “Caw c'ul mayu hamunlahi, yeb caw yijem maxawute

haba. Yu caw c'ul maxawute haba yiri hanic' wacanojan tawet, yuxinto caw hantañeto tzet chiwacanicojan yul hak'ab. Tinañ xin ocañ, ak' tzalaho hac'ul inc'atañan,” xi naj tet naj. ²² Lahwi tu' xin yapni naj chahnicano ch'en cab mil, yalni naj tet naj yahaw melyu tu': “Mamin, cab mil ch'en hawacano wetan, yaja' xin cabtopaxo mil ch'en wik'an yibañilo ch'en,” xi naj. ²³ Yalni naj yahaw melyu tu' tet naj: “Caw c'ul mayu hamunlahi, yeb caw yijem maxawute haba. Yu caw c'ul hawute haba yiri hanic' wacanojan tawet, yuxin caw nimanto tzet chiwacanojan yul hak'ab. Wal tinañ ocañ, ak' tzalaho hac'ul inc'atañan,” xi naj.

²⁴ Haxa yet yapni naj chahni ch'en hune' mil xin, yalni naj tet naj yahaw melyu tu': “Mamin, wohtajan tato hach ti' caw how hach, yuto chahatx' tzet ye tu' mañtajach tz'unñe; chawinipaxocañ tzet ye tu' mañtajach watx'eñeloj. ²⁵ Wal xin quinxiwani, yuxin inmuñan hamelyu yalañ tx'otx', yaja' tinañ xin chiwak'canojan ch'en tawet,” xi naj. ²⁶ Yalni naj yahaw melyu tu' tet naj haca' ti': “Hach ti' caw mach c'ulo hamunlahi, caw isa hach. Ta ha-wohtaj tato chinhatx'cañan tzet ye tu' mañtajinan tz'unñe, yeb ta chiwicañan tzet ye tu' mañtajinan watx'eñeloj, ²⁷ estam hawacto inmelyuti'an yul banco. Hayet maquinhulti'an xin, manchahnihan ch'en yeb yal,” xi naj tet ischejab tu'.

²⁸ Lahwi tu' xin yalni naj tet ebnaj ischejab: “Iwelo ch'en mil quetzal tet naj cat heyak'ni ch'en tet naj ik'ñe ch'en lahoñeb mil. ²⁹ Yuto ha' mac ay tzet aya chiak'lax yak'bil tet, hac tu' xin caw ec'balto tzet ay hune' mac tu'. Wal mac matzet ay xin, ha' nich'an ay yul isk'ab tu', chiilaxilo tet.

³⁰ Hune' naj chejab matzet chiel yirñ ti' hawelto naj xol k'ejholo, ha' bey tu' xin chiok' naj yirñ, cat isrietx'la yeh naj yu isya'tajil," xi naj yahaw tu', xi Comam.

Yet chilni Comam Jesucristo yirñ tzet chielico anma

³¹ Yalnipaxo Comam Jesús:

—Hanin Ak'bilintijan texol yu Comam Dios, chinhulan Yahawilo yeb isk'ak'al wipan, cat yul-paxo ebnaj ángel wintajan, cat way tz'orñojan yul incapilan. ³² Wal anma ay yul hunun coñob yul sat yibañk'inal ti', chicutxico insatajan, cat inpohnihan xol, haca' chu ispohni naj tariem me', no' me' xol no' chiw. ³³ No' me' tu' yirñ iswatx'k'ab naj chaco no', wal no' chiw xin yirñ ismeck'ab naj ch'oc no'. ³⁴ Hanin Yahawil inti'an* chiwalan tet anma ayco yirñ inwatx'k'aban haca' ti': "Hex xahechah isc'ulal Inmaman, ocañwe yul hune' ehobal watx'ebil teyet yu Inmaman. Hune' ti' watx'ebil yettax iswatx'i hune' yul sat yibañk'inal ti'. ³⁵ Yuto hayet inñochahan, heyak'ni tzet chinlohan. Yet istaj inti'an heyak'ni ha' wuc'u'an, yet wec'an ink'ana'an bay chinwayan, heyak'ni bay quinwayan. ³⁶ Yet lañanxa wel t'ilnojan, heyak'ni xil ink'apan; yet ya'ayinan, hebey quinhetuclenogan. Yet ayinictojan yul preso, hebey quinheyilnojan," quinchiñetic'ahan tet anma tu'. ³⁷ Ha' anma watx'en istoholal tu' xin, chisk'ambe wetan haca' ti': "Mamin, ¿bak'ini cachñohcha tu' jak'nihañ tzet chalo? yeb ¿bak'ini taj hati' jak'nihañ ha'

* **25:34** Hune' tzoti' Rey yirñ castilla chitzotel yirñ Comam Jesucristo.

hawuc'u? ³⁸ ¿Bak'ini xin hak'an bay cachway jetañ, jak'nihañ bay cachwayi? yeb ¿bak'ini matxa xil hak'ap, jak'nihañ xil hak'ap? ³⁹ ¿Bak'ini cachyabilnipaxoj, cobeyañ cachcotuclenojañ, yeb yet hawocto yul preso, coñbeyañ cachjilnojañ?” xi anma tu'. ⁴⁰ Chiwalnihan tet haca' ti': “Yiñ caw yeli chiwalan teyet, yet hecolwa yiñ hunu ebnaj wuxťajan, waxańca caw comon yeq'ui, wińan hewatx'e sunil huntেক'an tu',” quinchińetic'ahan tet.

⁴¹ Lahwi tu' xin chiwalnihan tet anma ayco yiñ inmeck'aban: “Elańwe yiñ insatan hex tz'acti'ńebilexxa ti', asi'we xol k'a k'a' mach istańbal watx'ebilxa tet naj matzwalil yeb tet ebnaj ischejab naj. ⁴² Yuto yet inńohchahan, mańtic'a heyak' nino tzet inlohan, yet istaj inti'an, mańtic'a heyak' nich'ano ha' wuc'u'an. ⁴³ Yet wec'an ink'ana'an bay chinwayan, mańtic'a heyak' bay quinwayan. Yet matxa xil ink'apan mańtic'a heyak' hunu xil ink'apan. Yet ya'ayinan yeb yet ayinictojan yul preso, mańtic'a quinhetuclehan,” quinchińetic'ahan tet. ⁴⁴ Yaja' chisk'ambe anma tu' wetan: “Mamin, ¿bak'ini cachńohchahi, yeb istaj hati', cachec'paxo hak'ana' bay cachwayi, yeb yet matxa xil hak'ap, machi xin cońcolwahań tawiń? Yebpaxo, ¿bak'ini cachyabilni yeb hawocto yul preso? ¿Machi xin cońcolwapaxojań tawiń hawalni?” xi anma tu'. ⁴⁵ Yaja' chintak'wihan tet: “Yiñ caw yeli chiwalan teyet, yet mach quexcolwa yiñ hunu ebnaj wuxťajan, yeb ebix wanaban, waxańca caw comonńe yeq'ui, wińan mach quexcolwa tu',” quinchińetic'ahan tet. ⁴⁶ Ha' huntেক'an anma

tu' xin, chitocano yiñ isya'tajil yiñ hunelñe. Wal anma watx'en isc'ulal, chischah isk'inal mach istaribal, xi Comam Jesús.

26

Islahti'ñe isba ebnaj Israel yiñ tzet chu yak'ni camo ebnaj Comam Jesús

(Mr 14:1-2; Lc 22:1-2; Jn 11:45-53)

¹ Lahwi yalnicanó Comam Jesús hunték'an tu' xin, yalni Comam tet ebnaj iscuymom:

² —Hex ti' heyóhtaj tato cabexañe k'iñ Pascua, yiñ k'iñ tu' xin chinalaxicojan yul isk'ab anma cat walaxcañan yiñ culus, Hanin Ak'bilintijan texol yu Comam Dios, xi Comam.

³ Yiñtic'a hune' tz'ayic tu' xin, ebnaj iswi'ehal yiñ ebnaj sacerdote, yeb ebnaj ichamta winaj yul coñob tu', iscutxbaco isba ebnaj bey yatut naj Caifás, naj yahawil yiñ ebnaj sacerdote.

⁴ Islahti'ñen isba ebnaj yiñ tzet lek'ti'al chal ebnaj yiñ Comam Jesús, yuñe istzabnayo ebnaj, cat yak'ni camo ebnaj Comam yalni. ⁵ Yalni ebnaj tet hunun:

—Yaja' mach yiño k'iñ, haxinwal mach chiah bulna anma, xi ebnaj.

Yet isjobnayo hune' ix ix añ caw xuk' sam yibañ iswi' Comam Jesús

(Mr 14:3-9; Jn 12:1-8)

⁶ Yet ayxa Comam Jesús yul coñob Betania xin, isto Comam yatut naj Simón, naj aytic'aco yabil chiyij lepra yiñ. ⁷ Yet ayco Comam wa'o sat meña, yapni hune' ix ix isc'atañ Comam. Ik'bil hune' ch'en limeta yu ix, alabastro isbi, nohna ch'en

yu hune' añ caw xuk' sam, yeb caw ay istohol. Isjobnayo ix yibañ iswi' Comam. ⁸ Hayet yilni ebnaj iscuwym Comam hune' tu' istit ishowal ebnaj yĩñ ix, yalni ebnaj:

—¿Tzet yĩñ xin toñe chietalaxto hune' añ ti'? ⁹ Hune' añ ti' caw ay istohol, majaltam matxorilaxtoj, cat ispohlaxcañ istohol yĩñ anma meba', ñi ebnaj.

¹⁰ Hayet yaben Comam Jesús hune' tu', yalni Comam:

—¿Tzet yĩñ xin cheyiti hehowal yĩñ ix? Hune' maswatx'e ix wiñti'an, caw c'ul. ¹¹ Anma meba' ayñetic'aco texol, walinan xin mach sunilbal tiempo ayinic'ojan texol. ¹² Hune' ix ti' masjobayo ix hune' añ caw xuk' sam wibañan yuñe c'ulxa ye innimanilan yet chinmujlaxan. ¹³ Yĩñ caw yeli chiwalan teyet, bajxañetu'wal chihallax Tzoti' c'ul yet colbanile chihallaxpaxo hune' maswatx'e ix ti', hac tu' xin chiak'lax binaho ix, ñi Comam Jesús tet ebnaj iscuwym.

*Yaco naj Judas Comam Jesús yul isk'ab camical
(Mr 14:10-11; Lc 22:3-6)*

¹⁴ Naj Judas Iscariote, naj ayco istz'ajo ebnaj cablahoñwañ iscuwym Comam Jesús, to naj isc'atañ ebnaj iswi'ehal yĩñ ebnaj sacerdote, ¹⁵ yalni naj tet ebnaj:

—¿Hanta cheyak' wetan, chiwacojan naj Jesús yul hek'ab? ñi naj. Yalten ebnaj treinta melyu naba plata tet naj. ¹⁶ Hac tu' xin yu yichico naj issayni yĩñ tzet chu yanico naj Comam yul isk'ab ebnaj.

*Yet iswa'cano Comam Jesús yeb ebnaj iscuwym
yirñ kiñ Pascua*

(Mr 14:12-25; Lc 22:7-23; Jn 13:21-30; 1Co 11:23-26)

¹⁷ Haxa yet yayilo babel tz'ayic k'iñ Pascua, yet chiwahlx ixim pan machi yañal, ishitzico ebnaj iscuwym Comam isc'atañ, isk'amben ebnaj:

—Mamin, ¿baytu'wal chawoche chicowatx'ehañ tzet chicoło yirñ k'iñ Pascua ti'? xi ebnaj.

¹⁸ Istak'wi Comam:

—Asi'we yul coñob, yet chexapnoj cat heto bey yatut hune' naj, cat heyalno tet naj: “Ma-coñischejtijañ Comam cuywawom jalañ tawet tato hanic'xañe tiempohal ayc'o coxolañ, yuxin ha' bey hawatut ti' choñhulañ jec'tzehañ k'iñ Pascua ti' yeb Comam,” quexchi, xi Comam.

¹⁹ Lahwi tu', isto ebnaj iscuwym Comam Jesús, isyijen ebnaj haca'tic'a yu yalni Comam. Yoc ebnaj iswatx'en tzet chilolax yirñ k'iñ Pascua.

²⁰ Haxa yet yah ak'bal xin, yoc Comam wa'o sat mexa yeb ebnaj cablahoñwañ iscuwym tu'. ²¹ Yet lañan iswa' Comam yeb ebnaj tu', yalni Comam:

—Yirñ caw yeli chiwalan teyet, ay hune' mac texol ti' chinanocojan yul isk'ab camical, xi Comam.

²² Yet yaben ebnaj hune' tu', caw oc bisc'ulal yirñ isc'ul ebnaj. Yoc ebnaj isk'ambeno tet Comam yirñ hununtajil:

—Mamin, ¿machmitajinan? xi ebnaj yirñ hununtajil.

²³ Istak'wi Comam:

—Ha' hune' mac hune'ñe chu wanaytojan ink'aban yul plato yebi ha' chinanocojan yul

isk'ab camical. ²⁴ Hanin Ak'bilintijan texol yu Comam Dios, yilal wec'an yin camical, haca' yalni yul Yum Comam Dios. Yaja', ic'anch'an naj chinanicojan yul isk'ab camical! Ayxic'a mach pitzc'a naj yul sat yibañik'inal ti',* xi Comam.

²⁵ Naj Judas naj chianico Comam yul isk'ab camical tu', isk'ambe naj:

—Mam cuywawom, ¿tom haninan? xi naj. Istak'wi Comam:

—Ho', hachtoni, xi Comam.

²⁶ Yet lañan iswa' Comam, yinicañ ixim pan, yak'ni Comam yuch'andiosal tet Comam Dios, isk'axponayo Comam ixim. Lahwi tu' yak'ni Comam ixim tet ebnaj iscuywom; yalni Comam:

—Wawej, hune' ti' yechel* innimanilan yehi, xi Comam.

²⁷ Yinipaxocañ Comam ch'en vaso, yak'ni Comam yuch'andiosal tet Comam Dios. Lahwi tu' yak'ni Comam ch'en vaso tu' tet ebnaj, yalni Comam:

—Uc'we hune' ti' hesunil, ²⁸ yuto ha' hune' ti' yechel inchiq'uilan chimalto yu istañ ismul tx'i'al anma, yuñe yijnicano isba istrato Comam Dios.

²⁹ Chiwalpaxojan teyet tato matxa chiwuc'an yal te' uva masanto yet chioc Inmaman Yahawilal catto wuc'nihan yin yac'tohal hunelxa, xi Comam tet ebnaj.

Yal Comam Jesús ta chal naj Pedro ta mach yohtajo naj Comam

(Mr 14:26-31; Lc 22:31-34; Jn 13:36-38)

* 26:24 Sal 41:9 * 26:26 1Co 11:23-32

³⁰ Hayet lahwi isbitñencano ebnaj bit tet Comam Dios, isto Comam Jesús yeb ebnaj bey woñan Olivo. ³¹ Yalni Comam tet ebnaj iscuymom tu':

—Yiñ hune' ak'bal ti' chicabconocañ heyanna wiñan hesunil, yuto tz'ibñebilcano haca' ti': “Chinpotx'an naj tañem me', cat ispujnacanto no' me' tu',” xiayoj. ³² Yaja' yet chinitzitzbicañan xin, chinbabitajan tesata bey Galilea, xi Comam.

³³ Yalni naj Pedro tet Comam:

—Mamin, waxañca sunil mac chicabconocañ isc'ul tawiñ, yaja' walinan, machoj, xi naj.

³⁴ Yalni Comam Jesús tet naj:

—Yiñ caw isyelal chiwalan tawet, yiñ hune' ak'bal ti' oxelxa chawala ta mach quinhawohtajojan yet chiok'ocañ no' icham chiyo, xi Comam tet naj.

³⁵ Istak'wi naj Pedro:

—Waxañca chinak'lax camojan tawinta Mamin, yaja' mach chu walnihan ta mach cachwohtajojan, xi naj. Haca'tic'a yu yalni naj Pedro tu', hac tu' yu yalnipaxo ebnaj sunil.

*Txahli Comam Jesús bey Getsemaní
(Mr 14:32-42; Lc 22:39-46)*

³⁶ Lahwi tu' xin, isto Comam Jesús yeb ebnaj iscuymom bey hune' peyab chiyij Getsemaní, yalni Comam tet ebnaj:

—Canañwecano tz'oñno bey ti', chintohan txahlo cosatato ti', xi Comam.

³⁷ Yinito Comam naj Pedro yeb ebnaj cawañ isc'ahol icham Zebedeo yintaj. Yoc hune' niman bisc'ulal yiñ yanma Comam, caw xin ya' yuco yiñ yanma. ³⁸ Yalni Comam tet ebnaj:

—Caw chiwabehan isya'il isbisc'ulal camical yin wanmahan. Canañwecano bey ti'; jiwelo hewayañ wintajan! Xi Comam.

³⁹ Lahwi tu' xin ishitzilo Comam hanic' yin ebnaj, yay jahno Comam, yay xulno sat tx'otx'. Yichico istxahli: “Mam, ta chisje hac'ul colinan tet hune' isya'tajil chul wibañti'an; yaj mach haca' chiwochehan, to haca'ojab tzet chal hac'ul,” Xi Comam.

⁴⁰ Lahwi tu' yul Comam bay cancano ebnaj oxwañ, caw xin chiway ebnaj yet yapni Comam, yalni Comam tet naj Pedro:

—¿Tom mach chitecha heyu heyinilo hewayañ hunu orahil wintajan? ⁴¹ Iwelo hewayañ, tx-ahlañwe tet Comam Dios haxinwal mach chex-ayc'ay yul isk'ab istx'ojal. Wal heyanna hinan isyijen tzet chal Comam Dios, yaja' wal henimanil xin mach chitecha ilwebal yu, Xi Comam.

⁴² Istopaxo Comam txahlo hunelxa, yalnipaxo Comam yin istxah: “Mam, ta mach chiec'ayo hune' ti' wibañan, yuhojab haca' chal hac'ul,” Xi Comam.

⁴³ Ismeltzopaxo Comam isc'atañ ebnaj, caw xin yexñe isway ebnaj yuto caw mach chitecha naj wayañ yu ebnaj. ⁴⁴ Lahwi tu' istopaxo Comam txahlo yin yoxel, haca'tic'a yu yalni Comam yin babelal yeb yin iscayel, hactic'apax tu' yu yalni Comam. ⁴⁵ Lahwi tu' xin ismeltzo Comam bay ay ebnaj iscuwym tu', yalni Comam tet ebnaj:

—¿Tom yexñeto hewayi, yeb hexewi? Wal tinañ maapni yorahil walaxicojan, Hanin Ak'bilintijan texol yu Comam Dios, yul isk'ab anma mulum.

⁴⁶ Aharñewewanoj, torñwey yuto lañan yul naj chianicojan yul isk'ab camical, ñi Comam tet ebnaj.

Yet istzablaxayo Comam Jesús

(Mr 14:43-50; Lc 22:47-53; Jn 18:2-11)

⁴⁷ Yet lañan istzotel Comam Jesús tu', yapni naj Judas, naj ayco istz'ajo ebnaj cablahoñiwañ iscuymom Comam. Caw xin hantañe ebnaj tzujan yinta naj, ik'bil yespada yeb iste' ebnaj yu; chejbil ebnaj yu ebnaj iswi'ehal yin ebnaj sacerdote, yeb ebnaj ichamta winaj iswi'ehal coñob Israel. ⁴⁸ Wal xin halbilxa tet ebnaj yu naj Judas tu' yin tzet chu yanico naj Comam yul isk'ab ebnaj, yet yalni naj:

—Ha' naj chintz'ohan isk'otx, ha' naj chetzabayoj, ñi naj. ⁴⁹ Yuxin hayet ishitzico naj isc'atañ Comam, yalni naj:

—¿Hanic' hawe Mam cuywawom? ñi naj. Istz'ohni naj isk'otx Comam.

⁵⁰ Yalni Comam tet naj:

—Hach amigo, ha' tzet chihul hawub watz'e tinañ, ñi Comam.

Istit bulna ebnaj istzabnoyo Comam.

⁵¹ Yaja' ay hune' naj iscuymom Comam yihti yespada yul yatut, ispitnilto naj istxiquin hune' ischejab naj yahawil yin ebnaj sacerdote. ⁵² Yalni Comam Jesús tet naj:

—Ayto hawespada yul yatut yuto ha' mac espada chak'a, espada chipotx'nipaxo camoj.

⁵³ ¿Tom mach chu ink'annihan cablahoñeb majan ebnaj ángel tet Inmaman tinañ ta chiwochehan?

⁵⁴ Yaja' ta hac tu', machim chiyij isba tzet tz'ibñebilcano yul Yum Comam Dios wiñan bay chala tato yilal yuni hunttek'an ti', ñi Comam.

⁵⁵ Lahwi tu', yalni Comam tet ebnaj apni tu':

—¿Tom elk'ominan teyet yuxin ik'bil heyespada yeb hete' wiñan chexhul quinhetzabnoyojan? Hunun tz'ayic inbeyan cuywal yul yatut Comam Dios texol, yaja' mach quinhetzabayojan. ⁵⁶ Yaja' tinañ, yilal yuni sunil hunttek'an ti' yuñe yijni isba sunil tzet tz'ibñebilcano yu ebnaj ischejab Comam Dios yet payat, xi Comam.

Wal ebnaj iscuywom Comam xin elcañ ebnaj, yanicano ebnaj Comam ischuquil.

Ilaxto Comam Jesús sat ebnaj iswi'ehal coñob Israel

(Mr 14:53-65; Lc 22:54-55, 63-71; Jn 18:12-14, 19-24)

⁵⁷ Lahwi tu' yinito ebnaj Comam Jesús bey yatut naj Caifás, naj yahawil yin ebnaj sacerdote. Ha' bey tu' xin cutxanico ebnaj cuywawom yin isley naj Moisés, yeb ebnaj iswi'ehal coñob. ⁵⁸ Wal naj Pedro xin nahat tzujan isto naj yinta Comam, yapni naj yamak'il yatut naj yahawil yin ebnaj sacerdote tu', yay tz'oñino naj xol ebnaj chitañen yatut Comam Dios yu yilni yin tzet chielico Comam.

⁵⁹ Wal ebnaj iswi'ehal yin ebnaj sacerdote yeb ebnaj yahawil yin lahti' xol ebnaj Israel issay ebnaj mac chioc halno lek'ti'al yin Comam yuñe iscawxico camical yibañ. ⁶⁰ Caw xin tx'i'al mac octoj, ishobnicañ ebnaj lek'ti'al yin Comam, yaja' mañtic'a hunu tzet oc ismulo Comam. Lahwi tu' yapni cawañxa ebnaj, ⁶¹ yalni ebnaj:

—Hune' naj ti' jabehañ yalni naj haca' ti': “Hanti'an chu wuchc'anayojan hune' yatut Comam

Dios ti', cat wanicañan isselel yirñ oxeb tz'ayic," ñi naj, ñi ebnaj yirñ Comam.

⁶² Yah liñno naj yahawil yirñ ebnaj sacerdote, yalni naj tet Comam:

—¿Tzet yirñ xin mach chařtak'wi? ¿Tzet ye huntেক'an chal ebnaj ti' tawirñ? ñi naj.

⁶³ Yaja' mařtic'a tak'wi Comam tet naj, lahwi tu' yalnipaxo naj:

—Yirñ isbi Comam Dios itzitz, hal yirñ isyelal jetañ. ¿Ham hach ti' Cristo, Isc'ahol Comam Dios? ñi naj.

⁶⁴ Istak'wi Comam tet naj:

—Ho', hanintonan haca' hawalni ti'. Chiwalan teyet tato Hanin Ak'bilintijan texol yu Comam Dios cheyil woc tz'orñojan yirñ iswatx'k'ab Comam Dios caw aycano yip, cat heyilni wulan xol moyan, ñi Comam.

⁶⁵ Yet yaben naj yahawil ebnaj sacerdote tzet yal Comam tu', istzilnilo naj xil isk'ap yu ishowal, yalni naj tet ebnaj yetbi tu':

—Hune' mayal naj ti', caw tx'oj yul sat Comam Dios. Yuxin tinañ matxa yilal chicok'an anma chihalni ismul naj, wal xin hañ-caw-orñ majabe istx'ojal istzotel naj. ⁶⁶ Yuxin, ¿tzet cheyute heyalni hex ti'? ñi naj. Istak'wi ebnaj:

—Ay ismul naj, camojab naj, ñi ebnaj.

⁶⁷ Istzublico ebnaj yirñ sat Comam, ismak'nipaxo ebnaj Comam, ay ebnaj xin pak'nilto sat Comam, ⁶⁸ chalni ebnaj:

—Hach Cristo, txumiloj mac macachmak'ni, ñi ebnaj tet Comam.

*Yal naj Pedro ta mach yohtajo naj Comam Jesús
(Mr 14:66-72; Lc 22:56-62; Jn 18:15-18, 25-27)*

⁶⁹ Yet tz'orñanayo naj Pedro isti' yamak'il te' ña tu', ishitzico hune' ix chejab isc'atañ naj, yalni ix:

—Hach ti' hawetbi haba yeb naj Jesús ah Galilea, ñi ix.

⁷⁰ Wal naj Pedro tu' yeba naj yiñ sat sunil anma, yalni naj:

—Mach wohtajojan tzet chawala, ñi naj.

⁷¹ Haxa yet yapni naj bey ispultahil yamak'il te' ña tu', yalni hunxa ix tet anma cutxanico bey tu':

—Naj ti' yetbi isba naj yeb naj Jesús ah Nazaret, ñi ix.

⁷² Yaja' yeba naj hunelxa, yalni naj:

—Caw chabe Comam Dios, ¡mach wohtajojan hune' naj tu'! ñi naj.

⁷³ Hunepixto xin ishitzico huntেক'an ebnaj isc'atañ naj, yalni ebnaj:

—Yiñ caw yeli, hach ti' hawetbi haba yeb ebnaj chieć' yinta naj Jesús ti' yuto ixtañ cotxumnilojañ hatzoteli, ñi ebnaj.

⁷⁴ Yaja' oc naj Pedro tu' istz'acti'ñe isba, yalni naj:

—Caw chabe Comam Dios mach wohtajojan hune' naj tu', ñi naj. Lañantotic'a xin yok'cañ hune' no' icham chiyo. ⁷⁵ Hac tu' yu isnaniti naj Pedro yiñ tzet yal Comam yet yalni Comam haca' ti': “Oxelxa chawala ta mach quinhawohtajojan yet chieć'cañ no' icham chiyo,” ñi Comam. Lahwi tu' yelti naj Pedro bey tu', yoc naj ok'o sic'lebil.

27

Yet yilaxto Comam Jesús sata naj Pilato

(Mr 15:1; Lc 23:1-2; Jn 18:28-32)

¹ Haxa yet issajbilo xin, islahti'ñen isba ebnaj iswi'ehal yíñ ebnaj sacerdote, yeb ebnaj ichamta winaj iswi'ehal coñob tu' yíñ tzet chu yak'lax camo Comam Jesús. ² Lahwi tu' isc'alnayo ebnaj Comam, yinito ebnaj Comam sata naj gobernador ah Roma chiyij Poncio Pilato.

Iscamical naj Judas

³ Wal naj Judas, naj anico Comam yul isk'ab ebnaj tu', hayet yilni naj ta cawxico camical yibañ Comam, istac isc'ul naj yu istx'ojal iswax'e tu', isto naj yak'nopaxo ch'en treinta plata tet ebnaj iswi'ehal yíñ ebnaj sacerdote yeb tet ebnaj iswi'ehal coñob, ⁴ yalni naj tet ebnaj:

—Caw mawaco inmulan, yuto mawacojan hune' naj machi ismul yul isk'ab camical, xi naj. Istak'wi ebnaj tet naj:

—¡Tzet jocañ tawiñ, ila tzet chawute haba! xi ebnaj.

⁵ Hayet yaben naj hune' tu' xin istiñnicanicto naj ch'en melyu tu' yul yatut Comam Dios. Lahwi tu' isto naj ist'uribano isba.

⁶ Ebnaj iswi'ehal yíñ ebnaj sacerdote issic'cañ ebnaj ch'en melyu tu', yalni ebnaj:

—Huntek'an ch'en melyu ti' mach chu jahnayto ch'en xol ch'en ofrenda, yuto istohol camical ye ch'en, xi ebnaj.

⁷ Islahti'ñen isba ebnaj, islok'ni ebnaj hune' tx'o tx'otx' chihallax: “Istx'otx' naj wata'em xi,” yu yoc camposantohal bay chimujlax anma nan coñobal

chicam bey yul coñob Jerusalén tu'. ⁸ Yuxin *Istx'otx'al Chic'* occano isbiho hune' tx'o tx'otx' tu', ha' xin chihallax yirñ tx'otx' tinañ. ⁹ Hac tu' yu yijni isba tzet halbilcano yu naj Jeremías, yet yalni naj: “Yicañ ebnaj ch'en treinta plata, ch'en yak' ebnaj Israel istoholo hune' naj. ¹⁰ Yirñ ch'en xin islok' ebnaj istx'otx' naj watx'em xi, hac tu' yu yalni Comam Dios Jahawil wetan,”* xicano naj Jeremías yul Yum Comam Dios.

Yet yilaxto Comam Jesús sata naj Pilato

(Mr 15:2-5; Lc 23:3-5; Jn 18:33-38)

¹¹ Yet ayco Comam Jesús sata naj Pilato isk'amben naj tet Comam:

—¿Tom yahawil anma Israel hawehi? xi naj. Istak'wi Comam:

—Ho', yeli haca' hawalni ti', xi Comam.

¹² Wal ebnaj iswi'ehal ebnaj sacerdote yeb ebnaj iswi'ehal coñob, caw oc ebnaj ak'oc'ule yirñ Comam. Yaja' wal Comam xin maxtic'a tak'wi ninoy.

¹³ Yuxin yal naj Pilato tet Comam:

—¿Tom mach chawabe tzet chal ebnaj ti' tawirñ? xi naj.

¹⁴ Yaja' maxtic'a tak'wi Comam tet naj Pilato tu', yuxin caw c'ayilo isc'ul naj yirñ Comam.

Yet iscawxelaxico camical yibañ Comam Jesús

(Mr 15:6-20; Lc 23:13-25; Jn 18:38–19:16)

¹⁵ Yirñ hunun k'irñ Pascua chisbejtzo naj gobernador tu' hunun ebnaj presowom, yaja' ha'tic'a mac chal isc'ul anma ha' chibejtzolaxi. ¹⁶ C'uxan xin ayco hune' naj Barrabás isbi yul preso, caw

* **27:10** Zac 11:12-13

ohtabil naj yu anma. ¹⁷ Yet cutxanico anma tu' isk'amben naj Pilato tet anma:

—¿Mac cheyoche chinbejtzohan, tom naj Barrabás mato naj Jesús, naj cheyal Cristohal? ĩi naj.

¹⁸ Yal naj hune' tu' yuto yohta naj ta yu ayco ishowal ebnaj iswi'ehal sacerdote yiñ Comam yuxin ilaxto Comam sata naj.

¹⁹ Yet ayicto naj Pilato yul iscapil tu', yapni tzoti' tet naj yu yixal haca' ti': “Mach chawaco haba xol ebnaj yiñ hune' naj machi ismul tu', yuto hayet may ak'bal ay hune' inwayican caw xiwquila yiñ naj,” ĩito ix tet naj.

²⁰ Wal ebnaj iswi'ehal yiñ ebnaj sacerdote yeb ebnaj ichamta winaj yul coñob tu', oc ebnaj ak'oc'ule tet anma ta chala ta chibejtzolax naj Barrabás cat yak'lax camo Comam Jesús.

²¹ Isk'ambenpaxo naj gobernador tu' tet anma:

—Yiñ ebnaj cawañ ti', ¿mac cheyoche chinbejt-zohan? ĩi naj. Istak'wi anma tu' sunil:

—¡Naj Barrabás chabejtzo! ĩi anma.

²² Isk'amben naj:

—¿Tzet xin chiwutehan naj Jesús ti' heyalni, naj chihallax Cristohal ti'? ĩi naj. Istak'wi anma sunil:

—Ahojab naj yiñ culus, ĩixariñe anma.

²³ Isk'amben naj Pilato tu':

—¿Tzet xin istx'ojal iswatx'e naj? ĩi naj. Yaja' wal anma tu' caw ec'balto ah yaw, yalni haca' ti':

—¡Camojab naj yiñ culus! ĩixariñe anma.

²⁴ Hayet yilni naj Pilato ta caw ec'balto ah wejna anma, matxa hunuxa tzet tz'aj yute' naj, isk'anniti naj ha ha'. Yoc naj istx'ahno isk'ab yiñ sat sunil

anma yu isyenilo naj tato machi yoc naj yir̄ iscamical Comam Jesús. Lahwi tu' yalni naj:

—Mach wibañojan chitit iscamical hune' naj ti', wal xin teyibañ chitocanoj, xi naj.

²⁵ Istak'wi anma sunil:

—Waxańca chioc iscamical naj tu' comulojañ yeb yibañ juninalañ, xixańe anma.

²⁶ Hac tu' yu isbejtzon naj Pilato naj Barrabás, ischejni naj hatelaxo Comam Jesús. Lahwi tu' yanico naj Comam yul isk'ab ebnaj yu yalaxcañ yir̄ culus.

²⁷ Yinito ebnaj soldado Comam Jesús bey ispalacio naj gobernador tu'. Yet yapni Comam xin, iscutxbanico isba ebnaj soldado, yoc hoyno ebnaj yir̄ Comam. ²⁸ Yinilo ebnaj xil isk'ap Comam, yanico ebnaj hune' xilk'ape caj yir̄ Comam. ²⁹ Isbak'onayo ebnaj huntেক'an te' tx'ix coronahil, yahnato ebnaj yir̄ iswi' Comam. Yanipaxico ebnaj hune' te' yul isk'ab Comam, yichico ebnaj istzebi yir̄ Comam, chila xin ay jahno ebnaj sata Comam, yalni ebnaj:

—¡Tzalajoñwe yir̄ naj yahawil anma Israel ti!! xi ebnaj.

³⁰ Istzublipaxico ebnaj yir̄ Comam, yinilo ebnaj te' ayco yul isk'ab ismak'nico ebnaj te' yir̄ iswi' Comam. ³¹ Lahwi yetancano ebnaj Comam, yinilo ebnaj hune' xilk'ape caj yaco ebnaj yir̄ Comam tu', yanipaxico ebnaj xil isk'ap Comam. Lahwi tu' yinito ebnaj Comam yu yalaxcañ yir̄ culus.

*Yet yalaxcañ Comam Jesús yir̄ culus
(Mr 15:21-32; Lc 23:26-43; Jn 19:17-27)*

³² Hayet lañan yilaxto Comam bay chialaxcañ yirñ culus, istzabnayo ebnaj soldado hune' naj ah Cirene, Simón isbí, ischejnico ebnaj naj yinoto isculus Comam.

³³ Hayet yapni ebnaj bey hune' tx'otx' chiyij Gólgota, chihallaxpaxo *Isbajil Wi'e*, ³⁴ issomni ebnaj yal te' uva yeb huntেক'an te' c'ahla telaj, yak'ni ebnaj yuc'u' Comam. Yaja' yet yablen Comam matxa isje Comam yuc'u'.

³⁵ Hayet ayxacañ Comam yirñ culus yu ebnaj, yoc ebnaj soldado tu' yilweno isba yirñ xil isk'ap Comam yu ispohnicañ ebnaj yirñ. Hac tu' yu yijni isba tzet tz'ibñebilcano yu ischejab Comam Dios yet payat bay chala: “Ispohcañ ebnaj xil ink'apan yirñ, yocpaxo ebnaj yilweno isba mac c'ul yirñbal yirñ xil ink'aptu'an,”* xiayoj.

³⁶ Lahwi tu', yoc tz'orño ebnaj istañen Comam.

³⁷ Yanico ebnaj hayeb tz'ib yibañ iswi' Comam yirñ te' culus tu' bay chala tzet yirñ xin ak'lax camo Comam. Ha' huntেক'an tz'ib tu' xi haca' ti': “Ha' naj ti' Jesús Yahawil anma Israel,” xicoj.

³⁸ Aypaxo cawañ ebnaj elk'om alaxcañ yirñ culus yinta Comam. Hune' naj ah yirñ iswatx'k'ab Comam, hune'xa naj xin ah yirñ ismeck'ab Comam.

³⁹ Ha' macta chiec'to bey tu' oc buchwal yirñ Comam, chisbilen iswi', ⁴⁰ chalni haca' ti':

—¡Hach ti', hawala tato chawuchac'ayo yatut Comam Dios, cat hawanicañ isselel yirñ oxeb tz'ayic hawalni! ¡Yuxin colayti haba tato yel chawala Isc'ahol Comam Dios hawehe! ¡Ayañti yirñ te' culus tu'! xi ebnaj.

* 27:35 Sal 22:18

⁴¹ Hapxax tu' ebnaj iswi'ehal yiñ ebnaj sacer-dote yeb ebnaj cuywawom yiñ isley naj Moisés yeb ebnaj ichamta winaj iswi'ehal coñob tu', oc ebnaj buchwal yiñ Comam, chalni ebnaj:

⁴² —Naj ti' iscol naj anma, wal naj xin mach chu iscolni isba. Tato yeli ha' naj ti' Jahawil hañon Israel hoñ ti', jila' yinayti isba naj yiñ culus, wal tu' chijaco janma yiñ naj. ⁴³ Chicawxi isc'ul naj yiñ Comam Dios yalni yuxin jila' yul Comam Dios colwal yiñ naj tato caw yeli ochebil naj yu Comam, yuto chal naj tato Isc'ahol Comam Dios ye naj, xi ebnaj.

⁴⁴ Hapxax tu' ebnaj elk'om alaxcañ yiñ culus yinta Comam, ocpaxo ebnaj buchwal yiñ Comam.

Yet iscam Comam Jesús

(Mr 15:33-41; Lc 23:44-49; Jn 19:28-30)

⁴⁵ Yet chumanil isk'ejholilo yul sat yibañk'inal ti' masanto yiñ ch'en oxeb yiñ k'ejbiyalil sajbipax-iloj. ⁴⁶ Yiñ hune' orahil tu' ah yaw Comam Jesús yiñ caw ip, yalni Comam:

—Elí, Elí, ¿lama sabactani?* xi Comam. Chal yelapnoj: Hach inDiosal, hach inDiosal, ¿tzet yiñ xin chinhabejcanojan? xi.

⁴⁷ Ay xin huntেক'an ebnaj aben hune' tu', yalni ebnaj:

—Ham naj Elías, ischejab Comam Dios chawte naj, xi ebnaj.

⁴⁸ Ay xin hune' yetbi ebnaj to yiñ añe yinoti hune' esponja, islahbanayto naj xol pahla vino, isc'alnico naj yiñ iswi' hune' te' ah, yanahto naj yiñ

* **27:46** Sal 22:1

isti' Comam. ⁴⁹ Yaja' cachlax naj yu huntex'anxa ebnaj haca' ti':

—Maʔtoñe bela, jila' tato chul naj Elías iscolo' naj, ʕi ebnaj.

⁵⁰ Yahwipaxo Comam yiñ caw ip hunelxa, lahwi tu' xin iscamiloj. ⁵¹ Yiññaena tu' istzilmoyo k'ap k'ap aycañ yul yictabal yatut Comam Dios, cab ayico k'ap. Ichiti istzilbanil k'ap yiñ iswi', yay-canilo yiñ yojtabanil.* Yec'paxo hune' niman chixcab, ispohto ch'en nimeta ch'en yu. ⁵² Ay xin ej ch'en ñach'en bay mujan camom hajlohi; tx'i'al xin ebnaj ayxaco yul isk'ab Comam Dios itzitzbicañ. ⁵³ Hato xin yet yitzitzbicañ Comam Jesús yelti ebnaj bay mujan tu'. Lahwi tu' isto ebnaj yul coñob Jerusalén, tx'i'al mac xin ilni ebnaj. ⁵⁴ Hayet yaben naj capitán yeb issoldado chitañen Comam hune' chixcab tu' caw xiwcañ ebnaj, yeb yet yilni ebnaj sunil tzet yuhi, yalni ebnaj:

—Ha' hune' naj macam tu', yiñ caw yeli Isc'ahol Comam Dios ye naj, ʕi ebnaj.

⁵⁵ Ay xin huntex'an ebix t'añanto yilni nahat yiñ tzet chuhi. Ha' ebix tu' tit yinta Comam bey Galilea, iscolwapaxo ebix yiñ Comam. ⁵⁶ Xol ebix ayco ix María añ Magdala, yeb ix María ismi' naj Jacobo yeb naj José, yeb xin ismi' ebnaj isc'ahol icham Zebedeo.

*Yet ismujlax Comam Jesús
(Mr 15:42-47; Lc 23:50-56; Jn 19:38-42)*

* **27:51** Yet istzilmoyo k'ap k'ap aycañ yul yictabal yatut Comam Dios, ha' chal yelapnoj ta matxa cuarto txahul yul yatut Comam, yebpaxo matxa chisk'an Comam no nok' yiñ xahanbal yiñ comul, to ha' Comam Jesucristo oc xahanbalil yu istohlancano ismul anma. 2Co 3:14

⁵⁷ Ay hune' naj caw k'alom chiyij José, ah coñob Arimatea. Naj tu' iscuymom Comam Jesús ye naj. ⁵⁸ Haxa yíñ k'ejbiyal xin, isto naj isc'atañ naj Pilato, yoc naj isk'anni isnimanil Comam yu ismujni naj. Hac tu' yu ischejni naj Pilato ebnaj is-soldado yak'no isnimanil Comam tet naj. ⁵⁹ Lahwi ischahni naj isnimanil Comam tu', ispicchnico naj hune' sávana caw saj yeb caw c'ul yíñ isnimanil Comam. ⁶⁰ Ay xin hune' ch'en niman ch'en holbil yu naj; yet naj ye ch'en, caw ac'to ch'en, maʔto hunu camom chialaxicto yul ch'en, ha' tu' xin yacto naj isnimanil Comam. Yanicanico naj hune' ch'en niman ch'en ismajiloj, lahwi tu' ispaxto naj. ⁶¹ Wal ix María ah Magdala yeb hune'xa ix chiyij María, cancano tz'oño ebix sata bay mujlax Comam tu'.

Alaxico ebnaj soldado istañe' bay mujlax Comam Jesús

⁶² Haxa yíñ hune'xa tz'ayic, yet istz'ayical xewilal, isto ebnaj yahawil yíñ ebnaj sacerdote yeb ebnaj fariseo yila' naj Pilato, ⁶³ yalni ebnaj tet naj:

—Mam jahaw, chiconatijañ tato yet itzitzto hune' naj lek'ti' tu' yal naj tato yíñxa yoxeb tz'ayic iscam naj cat yitzitzbicañ naj hunelxa, ⁶⁴ yuxin tinañ chicok'anañ tawet, ato nino istañemal bay mujan naj, masanto hecal yíñ k'ejbiyal. Ta mach xin apnita ebnaj iscuymom naj cat yinito ebnaj isnimanil naj, cat yalni ebnaj tet anma tato itzitzbicañ naj xol camom. Yíñ haca' tu' ec'balto hune' lek'ti'al ti' sata hune' lek'ti'al yaco naj yet itzitzto naj, xi ebnaj.

⁶⁵ Istak'wi naj Pilato tet ebnaj:

—C'ultic'a, iweto ebnaj soldado teyintaj cat heto hecawxenocano bay mujan naj haca' chal hec'ul, xi naj.

⁶⁶ Lahwi tu' isto ebnaj yeb ebnaj soldado. Iscawxencano ebnaj bay mujan Comam, yanicanico ebnaj hune' sello yiñ ch'en ch'en ayco ismajilo ch'en bay mujan Comam. Yanicanico ebnaj ebnaj soldado istañenoj.

28

Yet yitzitzbicañ Comam Jesús xol camom
(Mr 16:1-8; Lc 24:1-12; Jn 20:1-10)

¹ Lahwi yec'canto istz'ayical xewilal, haxa yet issajbilo yiñ babel tz'ayic yiñ semana, caw sahab to ix María ah Magdala yeb hune'xa ix chiyij María tu' yila' bay mujan Comam. ² Hayet lañan isto ebix tu' yec' hune' niman chixcab yuto ayilo hune' yángel Comam Dios bay mujan Comam tu'. Yinilo naj hune' ch'en ch'en ayco ismajilo isti' bay mujan Comam, yay tz'oñno naj yibañ ch'en. ³ Caw chijepa yiñ naj haca' isjepla c'uh. Wal xil isk'ap naj xin caw sajhopoñe. ⁴ Hayet yilni ebnaj soldado hune' tu' isluyluncañ ebnaj yu xiwquilal, yah pac'na ebnaj haca' camom. ⁵ Yalni naj ángel tet ebix cawañ tu':

—Mach cheggiwi, wohtajan tato ha' Comam Jesús alaxcañ yiñ culus, ha' lañan hesayni. ⁶ Wal xin matxa Comam ayicti bey ti', to xaitzitzbicañ haca' yu yalni teyet. Ilwec'anab bay ec'le Comam. ⁷ Tinañ xin as halwe tet ebnaj iscuwymom tato maitzitzbicañ Comam xol camom. Chibabito Comam tesata bey Galilea, ha' bey tu' cheyila'

Comam. Ha' huntেক'an ti' manhul wala'an teyet, xi naj ángel tu' tet ebix.

⁸ Hayet yaben ebix huntেক'an tu', isto ebix yalno yiriñ añe tet ebnaj iscuwym Comam; caw xiw ebix, yaja' xin caw tzalapaxo ebix yaben hune' tu'. ⁹ Hayet ayco ebix yiriñ isbel tu' xin, isyeni isba Comam tet ebix, istioxi Comam tet ebix. Ishitzico ebix isc'atañ Comam, yay jahno ebix sata Comam, yoc lak'no ebix yiriñ yoj Comam. ¹⁰ Yalni Comam tet ebix:

—Mach chexxiwi, as halwe tet ebnaj wuxťajan tato chito bey Galilea, ha' bey tu' chinyila'an ebnaj, xi Comam.

Yal ebnaj soldado yiriñ tzet yuhi

¹¹ Yet lahwi isto ebix tu', isto haywañ ebnaj soldado ayco istañeno Comam tu' yul coñob. Yalni ebnaj tet ebnaj iswi'ehal yiriñ ebnaj sacerdote yiriñ tzet yuhi. ¹² Yet yaben ebnaj hune' tu' isto ebnaj islahiti'ñeno isba yeb ebnaj ichamta winaj iswi'ehal coñob Israel. Yak'ni ebnaj niman melyu tet ebnaj soldado tu', ¹³ yalni ebnaj tet ebnaj:

—Hac ti' cheyute heyalni haca' ti': “Yet lañan cowayañ yet ak'balil yul ebnaj iscuwym naj yelk'anoto isnimanil naj,” quexchi. ¹⁴ Yaja' ta chabelo naj gobernador hune' tu' matzet chal hec'ul, choñocañ tzotelo teyiñ tet naj haxinwal matzet chitit teyibañ, xi ebnaj.

¹⁵ Lahwi tu' ischahnilo ebnaj ch'en melyu tet ebnaj yahawil yeco yiriñ ebnaj sacerdote yeb ebnaj cuywawom yiriñ ley. Yalni ebnaj soldado tet anma haca'tic'a yute yalni ebnaj tet ebnaj. Hune' lek'ti'al

isnacañ ebnaj tu', yexrieto yallax xol anma Israel tinañ.

Yak'cano Comam Jesús ischejbanil ebnaj iscuymom

(Mr 16:14-18; Lc 24:36-49; Jn 20:19-23)

¹⁶ Lahwi tu', isto ebnaj hunlahoñwañ iscuymom Comam Jesús bey Galilea yin istzalanil hune' woñan bay yal Comam ta chiapni ebnaj. ¹⁷ Ha' bey tu' xin yil ebnaj Comam, yoc ebnaj yanoco ismay Comam, yaja' xin ay hun cawañ ebnaj cabcon isc'ul. ¹⁸ Ishitzico Comam isc'atañ ebnaj iscuymom tu', yalni Comam:

—Quinyacojan Comam Dios Yahawo yin tzet ay yul satcañ yeb yin tzet ay yul sat yibañk'inal ti'. ¹⁹ Tinañ xin as cuywe anma yul hunun coñob yul sat yibañk'inal ti' cat yoc yul ink'aban. Cheyacanocañ ha' iswi' yin isbi Comam Dios Mame, yeb yin inbihan, hanin Isc'ahol Comam Dios inti'an, yeb yin isbi Comam Espíritu Santo. ²⁰ Checuyuni anma isyijen sunil cuybanile xawak'an teyet. Walinan xin ayinñetic'acojan heyetbiho yin sunil-bal tiempo masanto yet chilahwi hune' yul sat yibañk'inal ti', xicano Comam Jesús tet ebnaj iscuymom.

Nuevo Testamento yin abxubal
New Testament in Jakalteko Eastern; jac
(GT:jac:Jakalteko)

copyright © 1997 Wycliffe Bible Translators, Inc.

Language: Jakalteko

Translation by: Wycliffe Bible Translators, Inc.

Copyright Information

© 1997, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Jakalteko

© 1997, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 11 Nov 2022 from source files
dated 29 Jan 2022

b5bce385-9ed7-5701-9edc-e221ef239a1c